

**କରନ୍ତି ମଣ୍ଡଳୀ ନିମନ୍ତେ ପାଠଲଙ୍କ ଲିଖିତ
ପ୍ରଥମ ପତ୍ର
କରନ୍ତି କୁଲମିତାକି ପାଞ୍ଚୁଲ ରାଚାମାନି ର.
ଲମ୍ବର ଆକୁ
ମୂଲ୍ୟ ହାଡ଼ା**

କରନ୍ତି କୁଲମିତା ର ଲମ୍ବର ଆକୁ ପାଣ୍ଡୁଆହାମାନି ପାଞ୍ଚୁଲ ତାଣ୍ଡାଟି ଜୀସୁ କ୍ରୀସ୍ତତି ଜାର୍ନାତି ୫୫ ବାର୍ଷୀ ଜେତ ରାସ୍ତି ଆହାମାତେ ୧:୧ । ପାଞ୍ଚୁଲ ତାଣ୍ଡାଟି ରାସ୍ତି ଆହାମାନି ଜଡେକା ଆକା ବିତ୍ରାଟି ଇଦି ଆହିମାନେ ର ଲମ୍ବର ଆକୁ । ଏଝାସି ଏପିସିୟତା ମାଟିବେଲାତା ଇ ଆକୁ ରାଚା ମାଣ୍ଡିତେସି ୧୭:୫-୯ । ମାକିଦନିୟାଟି କରନ୍ତିତା ହାଜାଲି ମନ କିନି ନବେଏ ଇ ଆକୁ ରାଚାମାତେସି ।

ପାଞ୍ଚୁଲ ଇ ଆକୁତା କୁଲମି ଗତି ଗତି ଆନାୟି ଲାଗେଏତି କାମାତି ଜୁପ୍ତକା ତଲେ ହାଡ଼େକା ପାପୁ କାମା ଆହିମାନାଣି କୁଲମିତି ଲକୁ ତାଣ୍ଡାଟି ଝେଞ୍ଜାନା ଝେଣ୍ଡେ ଝେସାଲି ମନ ହୀହିମାନେସି । କରନ୍ତି ଗାଡ଼ା ଲାଗେଏ ପଲେଏ ପାପୁ କାମାୟାଁ କିହିମାନାୟି ଝେଙ୍ଗାମାତେ । ଇଞ୍ଜା ଗାଡ଼ାତା ମାଟି କୁଲମି ହାଡ଼େକା କାଙ୍ଗାଲା ଆହିମାତେରି । ଏଦାଆଁ ଅଣ୍ପାନା ଏଝାରାକି ତିନା ଉନାଣି, ବୀହା ଆନାଣି ଅଡେ କିନାଣି, ହାକି ଅଡେ ଝେଣ୍ଡେ ନିଙ୍ଗିନାଣି, ସାତା ଜୀସୁନନାୟି ଏନାୟି ଇ ବାରେ କାତା ଆକୁତା ରାଚାନା ତସାମାନେସି ୧୩ ।

ପଢିତା ମାନାୟି

- ୧. ଜହରା କିହାନା ପୁଣ୍ଡିକିନାୟି । ୧:୧-୯
- ୨. କୁଲମିକା ଗତି ଆନି କାତା ଜାପ୍ନାୟି । ୧:୧୦-୪:୨୧
- ୩. ଲାଗେଏତି ପାପୁ କାମା ଅଡେ ଦାଞ୍ଜକିନି କାତା । ୫:୧-୭:୨୦
- ୪. ବୀହା, ପେଣ୍ଡକା ବମାୟାଁତି ବଗୁ, ଜାଟୁ ଆହାନା ପ୍ରାଡାନା, ସୁଦ୍ଦାଞ୍ଜୁତି ଦାନା, ଇଞ୍ଜା ଝେଣ୍ଡେ ନିଙ୍ଗିନି କାତା । ୭:୧-୧୫:୫୮
- ୫. ଲେମ୍ବିନି କାତା, ଜାହରା ଅଣ୍ପୁ ଇଞ୍ଜା ରାପ୍ନାୟି । ୧୭

^୧ ନାନୁ ପାଞ୍ଜୁଲ, ମାହାପୁରୁତି ମନତଲେ କ୍ରୀସ୍ତ ଜୀସୁ ତାଣାଟି ଆଚାନା ପାଣ୍ଡୁଝି ଆହାମାନାତେଏଁ, ଅଡ଼େ ମା ତାୟି ସସ୍ତ୍ରନା ତଲେ, ^୨ *କରକ୍ତି ଗାଡ଼ାତା ମାନି ମାହାପୁରୁ କୁଲମିତାକି ଇ ଆକୁ ରାଡ଼ିମାନେରି; ଆମିନି ବାରେଜାଣା ଏଞ୍ଜାରିତାଣା, ପ୍ରବୁ ଜୀସୁ କ୍ରୀସ୍ତ ଦରୁତଲେ ପ୍ରାଡ଼ାନା କିହିମାନେରି, ଏଞ୍ଜାରିତଲେ କ୍ରୀସ୍ତ ଜୀସୁ ତାଣା ସୁବୁ ଆହାନା ହାଟ୍‌କି ଆହାମାନି ମାହାପୁରୁ ଲକୁତେରି ମୀରୁ ।

^୩ ମିଙ୍ଗେତାକି ମା ଆବା ମାହାପୁରୁ ଅଡ଼େ ପ୍ରବୁ ଜୀସୁ କ୍ରୀସ୍ତ ତାଣାଟି କାର୍ମାମେହନାୟି ଅଡ଼େ ହିଡ଼ଡ଼ି ଆପେ ।

କ୍ରୀସ୍ତ ତାଣାଟି ବର

^୪ କ୍ରୀସ୍ତ ଜୀସୁ ତାଣାଟି ମିଙ୍ଗେ ହାହାମାଞ୍ଜାନି ମାହାପୁରୁତି ଆମିନି କାର୍ମାମେହନାୟି, ଏଦାଆଁତାକି ନାନୁ କାଲେଏ ମିଙ୍ଗେତାକି ମାହାପୁରୁଇଁ ଜହରା କିହିମାଇଁ, ^୫ ଏଦାଆଁତାକି ଇଚିହଁ ଏଞ୍ଜାଣି ତାଣା ବାରେ କାତାତା, ହାରେକା କିହଁ ବାରେଲେହେଁତି ଜାପୁନି ତାଣା ଅଡ଼େ ବାରେଲେହେଁତି ବୁଦିତା ମୀରୁ ଗାଡ଼ି ବାଡ଼କା ମାଞ୍ଜେରି; ^୬ ଇଲେଆହଁ କ୍ରୀସ୍ତତି ସାକି ମୀ ତାଣା ତାରି ଆହାମାନେ । ^୭ ଇଦାଆଁତାକି ମୀରୁ ମା ପ୍ରବୁ ଜୀସୁ କ୍ରୀସ୍ତତି ତଞ୍ଜା ଆହାଲିତାକି କାପୁ କାଚାନା ଏନି କାର୍ମାତି ଦାନାତା ଉଣା ଆହାହିଲଅତେରି; ^୮ ମା ପ୍ରବୁ ଜୀସୁ କ୍ରୀସ୍ତତି ଦିନାତା ଏନିକଁ ମୀରୁ ଦହ ହିଲଆଗାଟାତେରି ଆଡ଼େରି, ଇଦାଆଁତାକି ଏଞ୍ଜାସି ମିଙ୍ଗେ ରାନ୍ତି ଦିନା ପାତେକା ତାରିକିହା ଇଟାନେସି । ^୯ ମାହାପୁରୁ ନାମୁଗାଟାସି, ଆମ୍ବାଆରି ତାଣାଟି ମୀରୁ ତାନି ମୀରୁଏସି ଜୀସୁ କ୍ରୀସ୍ତ, ମା ପ୍ରବୁ ତାଣା ଆଣ୍ଡିନାଣାକି ହାଟ୍‌କି ଆହାମାଞ୍ଜେରି ।

ନାମିତି କୁଲମି ବିତ୍ରା ଗତି ଆନାୟି

^{୧୦} ଏ ତାୟିୟାଁ ଅଡ଼େ ତାଙ୍ଗିସ୍ତାତେରି, ମା ପ୍ରବୁ ଜୀସୁ କ୍ରୀସ୍ତ ଦରୁତଲେ ନାନୁ ମିଙ୍ଗେ ବାଡ଼ିମାଲିମାଞ୍ଜାଇଁ, ଏନିକଁ ମୀରୁ ବାରେଜାଣା ତେରି ରଣ୍ଡିଏ କାତା ଜଲିଦେରି, ଅଡ଼େ ମୀ ବିତ୍ରା ଗତି ଆଅତେରି, ସାମା ମୀରୁ ରଣ୍ଡିଏ ମନ ରଣ୍ଡିଏ ଅଣ୍ଡୁ ତଲେ କାଲ୍‌ଝି ଆବୁ । ^{୧୧} ଇଚିହଁ, ଏ ନା ତାୟିୟାଁ ଅଡ଼େ ତାଙ୍ଗିସ୍ତାତେରି,

* ୧:୨ ୧:୨ କାମା ୧୮:୧

ଲୁହାଣି କୁଟମିଟି ମୀ କାତା ନା ତାଣା ଇଦି ତଞ୍ଜା ଆହାମାନେ, ମୀ ବିତ୍ରା ଗଡ଼ହା ମାନେ । ୧୨ *ନାନୁ ଝେସ୍ତାନି କାତା ଇଦି, ମୀ ବିତ୍ରାଟି ଆମ୍ବା ଆମ୍ବାଆରି ଏଲେଇନେରି, ନାନୁ ପାଞ୍ଜୁଲ ଝାକି ତାତେଏଁ, ଇଞ୍ଜା ଆମ୍ବାଆରି ନାନୁ ଆପଲ ଝାକି ତାତେଏଁ, ନାନୁ କେପା ଝାକି ତାତେଏଁ ଅଡ଼େ ଏଚରଜାଣା ନାନୁ କ୍ରୀସ୍ତ ଝାକି ତାତେଏଁ ଇଞ୍ଜା ମାନେରି । ୧୩ କ୍ରୀସ୍ତ ବାଗା ଆହାମାନେସି କି ? ମିଲେତାକି ପାଞ୍ଜୁଲ କି ପାସି ମୁଣ୍ଡାତା ହାହାମାନେସି ? ଆଆତ ମୀରୁ କି ପାଞ୍ଜୁଲ ଦରୁତଲେ ବାପ୍ତିସ୍ମ* ଅହାମାଞ୍ଜେରି ?

୧୪ ☆ଇଦାଆଁତାକି କ୍ରିସ୍ତ ଅଡ଼େ ଗାୟ ପିସପେ ମୀ ବିତ୍ରା ଆମ୍ବାଆରାଇଁ ଜିକେଏ ବାପ୍ତିସ୍ମ† ହାହାହିଲଅଁ ଇଞ୍ଜା ନାନୁ ମାହାପୁରୁଇଁ ଜହରା କିହିମାଇଁ, ୧୫ ଏଚେତା ମୀରୁ ନୀ ଦରୁତଲେ ବାପ୍ତିସ୍ମ‡ ଅହାମାଇଁ ଇଞ୍ଜା ଆମ୍ବାଆରି ଏଲେଇଞ୍ଜଅରି । ୧୬ *ଅଡ଼େ ସିପାନତି କୁଟମିଇଁ ଜିକେଏ ବାପ୍ତିସ୍ମ§ ହାହାମାଇଁ; ଇଞ୍ଜାରି ପିସପେ ନାନୁ ଅଡ଼େ ଆମ୍ବାଆରାଇଁ ବାପ୍ତିସ୍ମ* ହାହାମାଇଁ ଇଞ୍ଜା ନା ଅଣ୍ପୁତା ହିଲେଏ । ୧୭ ଇଚିହଁ କ୍ରୀସ୍ତ ନାଲେ ବାପ୍ତିସ୍ମ† ହାହାଲିତାକି ପାଣ୍ଡାମାଞ୍ଜଅସି, ସାମା ନେହଁ କାରୁ ଝେସାଲି ପାଣ୍ଡାମାଞ୍ଜାନେସି; ଏଦି ଜିକେଏ ବଲୁତି ରାହଁ କିନି ତାଣା ଆଏ, ଏଚେତା ପାଟେ କ୍ରୀସ୍ତତି ପାସିମୁଣ୍ଡା ଉଜେଏ ଆନେ ।

କ୍ରୀସ୍ତ ମାହାପୁରୁତି ବାଡ଼ୁୟୁ ଅଡ଼େ ବୁଦି

୧୮ ଇଚିହଁ ନାସା ଆହିମାନି ଲକୁତାକି ପାସି ମୁଣ୍ଡାତି କାତା ଉଜେଏତାୟି, ସାମା ଗେଲପି ଆହିମାନି ମା ବାରେଜାଣା ତାକି ଏଦି ମାହାପୁରୁତି ବାଡ଼ୁୟୁ । ୧୯ ଇଦାଆଁତାକି ରାସ୍କି ଆହାମାନେ,

“ନାନୁ ବୁଦିଗାଟାରି ବୁଦି ନାସଞ୍ଜି କିଇଁ,
 ଅଡ଼େ ବୁଦିଗାଟାରି ବୁଦି ଅପଅଁ ।”

☆ ୧:୧୨ ୧:୧୨ କାମା ୧୮:୨୪ * ୧:୧୩ ୧:୧୩ମୁଞ୍ଜିନାୟି ☆ ୧:୧୪ ୧:୧୪ କାମା ୧୮:୮; କାମା ୧୯:୨୯; ରମି ୧୭:୨୩ † ୧:୧୪ ୧:୧୪ମୁଞ୍ଜିନାୟି ‡ ୧:୧୫ ୧:୧୫ମୁଞ୍ଜିନାୟି
 ☆ ୧:୧୬ ୧:୧୬ ୧କର ୧୭:୧୫ § ୧:୧୭ ୧:୧୭ମୁଞ୍ଜିନାୟି * ୧:୧୭ ୧:୧୭ମୁଞ୍ଜିନାୟି
 † ୧:୧୭ ୧:୧୭ମୁଞ୍ଜିନାୟି

୨୦ ବୁଦିଗାଟାରି ଆମ୍ବିୟା ? ମେରା ଜାପ୍‌ନାରି ଆମ୍ବିୟା ? ଇ ଜୁଗୁତି କାତା କାଟଞ୍ଜିକିହ୍ନାଁ ଝେହ୍‌ନାରି ଆମ୍ବିୟା ? ମାହାପୁରୁ କି ଦାର୍ତ୍ତିତି ବୁଦିଇଁ ଉଜେଏତାୟି ଇଞ୍ଜିଁ ଝେସାହିଲଅସି ?

୨୧ ଇଚିହ୍ଁ ମାହାପୁରୁତି ବୁଦି ତଞ୍ଜାଆହାମାଚି ଜିକେଏ ଦାର୍ତ୍ତି ଜାହାରା ବୁଦିତଲେ ମାହାପୁରୁଇଁ ପୁନାଆତାକି ମାମ୍ବୁଝେକ୍‌ହାମାନି କାତା ଉଜେଏତାୟି, ଆଡ଼ିଜିକେଏ ନାମ୍ବୁ ଗାଟାରାଇଁ ଗେଲ୍‌ପାଲିତାକି ମାହାପୁରୁ ଅଣ୍ପିତେସି । ୨୨ ଇଚିହ୍ଁ ଜୀହୁଦିକ୍ଷା ସିନା ପାରିନେରି, ସାମା ଗ୍ରିକ୍ ଲକୁ ବୁଦିତି ପାରିନେରି । ୨୩ ସାମା ମାମ୍ବୁପାସି ମୁଣ୍ଡାତା ହାଡ଼ି କ୍ରୀସ୍ତତି କାତା ଝେକ୍‌ହି ମାନମି, ଏଞ୍ଜାସି ଜୀହୁଦି ଲକୁତାକି ସାତୁ ଲେହେଁତାସି ଅଡ଼େ ଜୀହୁଦିଆଆତି ଲକୁତାକି ବୁଦି ହିଲ୍ୟାଆଲେହେଁ । ୨୪ ସାମା ଜୀହୁଦି ଆପାରି କି ଜୀହୁଦିଆଆତାରି ଆପାରି, ଆମ୍ବାଆରି ହାଟ୍‌କି ଆଡ଼ାରି, ଏଞ୍ଜାରାକି କ୍ରୀସ୍ତ ମାହାପୁରୁତି ବାଡ଼ୁୟୁ ଅଡ଼େ ମାହାପୁରୁତି ବୁଦି ଲେହେଁ । ୨୫ ଇଚିହ୍ଁ ମାହାପୁରୁତି ବୁଦି ହିଲ୍ୟାଆଗାଟାୟି ମାଣ୍‌ସିୟାତି ବୁଦି କିହ୍ନାଁ ହାରେକା ବୁଦି, ଅଡ଼େ ମାହାପୁରୁତି ଆଡ଼ାଆ ଗାଟାୟି ମାଣ୍‌ସିୟାତି ବାଡ଼ୁୟୁ କିହ୍ନାଁ ହାରେକା ବାଡ଼ୁୟୁ ଗାଟାୟି ।

୨୬ ଏ ତାୟିୟାଁ ଅଡ଼େ ତାଜିୟା ମିଜେ ହାଟାମାନି କାତା ଅଣ୍ପାପାବୁ, ଦାର୍ତ୍ତିତି ଲକୁତି ଅଣ୍ପୁ ଲେହେଁ ହାରେକା ବୁଦିଗାଟାରି, ହାରେକା ବାଡ଼ୁୟୁ ଗାଟାରି, କି କାଜା କୁଡ଼ା ଗାଟାରି ହାଟ୍‌କି ଆହାହିଲଅରି; ୨୭ ଏଦାଆଁତାକି ମାହାପୁରୁ ବୁଦି ଗାଟାରାଇଁ ଲାଜା କିହାଲିତାକି ଦାର୍ତ୍ତିତି ବୁଦି ହିଲ୍ୟାଆଗାଟାଣି ଆଡ଼ିତେସି, ଅଡ଼େ ବାଡ଼ୁୟୁ ଗାଟାଣି ଲାଜା କିହାଲିତାକି ମାହାପୁରୁ ଦାର୍ତ୍ତିତି ବାଡ଼ୁୟୁ ହିଲ୍ୟାଆଗାଟାରାଇଁ ଆଡ଼ିତେସି । ୨୮ ଅଡ଼େ ଏନାୟି ଦାର୍ତ୍ତି ନକିତା ମାନି ଗାଟାୟି, ଏ ବାରେ ଉଜେଏ କିହାଲି, ମାହାପୁରୁ ଦାର୍ତ୍ତିତି ହାଣି, ଇଞ୍ଜା ଅପାଆଗାଟାଣି, ହାଅ, ମାନି ହିଲ୍ୟାଆଗାଟାଣି ଆଡ଼ିତେସି । ୨୯ ଅଡ଼େ ଏନାୟି ଦାର୍ତ୍ତି ନକିତା ମାନି ଗାଟାୟି, ଏ ବାରେତି ଉଜେଏ କିହାଲିତାକି ମାହାପୁରୁ ଦାର୍ତ୍ତିତି ଉଣା ଅଡ଼େ ଅପାଆଗାଟାଣି ହାଅ ଉଜେଏତାଣି ଆଡ଼ିତେସି । ୩୦ ସାମା ଏଞ୍ଜାଣି ତାକି ମୀରୁ କ୍ରୀସ୍ତ ଜୀସୁ ତାଣା ମାଞ୍ଜେରି, ଏଞ୍ଜାସି ମାହାପୁରୁ ତାଣାଟି ମାଜେତାକି

ବୁଦି, ଇତିହାସ ଦାର୍ମୁଗାଗାସି, ସୁଦୁଗାଗାସି ଅଡ଼େ ଗେଲପିନି ଲେହେଁ ଆହାମାନେସି । ୩୧ ଇଦାଆଁତାକି, ଦାର୍ମୁପତିତା ରାସ୍ତକି ଆହାମାନେ, “ଆମ୍ବାଆସି ବଡପଣ ଆନେସି, ଏଞ୍ଜାସି ମାହାପୁରୁ ତାଣା ବଡପଣ ଆପାସି ।”

୨

ପାସି ମୁଣ୍ଡାତା କ୍ରୀସୁ ହାଡ଼ି କାବୁ

୧ ଏଦାଆଁତାକି ଏ ତାୟିୟାଁ ଅଡ଼େ ତାଜିସ୍ତାତେରି, ଏଚେତା ନାନୁ ମୀ ତାଣା ହାଜାମାଚେଏଁ, ଏଚିବେଲା ମାହାପୁରୁତି ତରୁମାନି ସାତା କାତାତି ଗାଡ଼ି ବୁଦି ଗାଗାରିଲେହେଁ ମୀ ତାଣା ଝେକ୍‌ହାମାଚେଏଁ ଏଲେକ୍‌ ଆଏ । ୨ ଇତିହାସ ଜୀସୁ କ୍ରୀସୁ, ଇତିହାସ ପାସି ମୁଣ୍ଡାତା ହାଡ଼ି ଜୀସୁ କ୍ରୀସୁ ପିସ୍‌ପେ ମୀ ତାଣା ଅଡ଼େ ଏନାଆଁ ଜିକେଏ ପୁଞ୍ଜାଲି ଅଣ୍‌ପାଆଚେଏଁ । ୩ ଅଡ଼େ, ନାନୁ ବାଡ଼ୁଲୁ ହିଲାଆନା, ଆଜି ଅଡ଼େ ତୀରୁରି ତୀରୁଗିହାଁ ମୀ ତାଣା ମାଚେଏଁ; ୪ ଇଦାଆଁତାକି ନା ଜାପ୍‌ନାୟି ଅଡ଼େ ଝେକ୍‌ନାୟି ମାଣ୍‌ସି ବୁଦିତି ନେହାଁ ହାଡ଼ାଲେହେଁ ଆଆନା ମାହାପୁରୁତି ସୁଦୁଜୀଞ୍ଜୁତି ବାଡ଼ୁଲୁ ତସ୍‌ପି ଆହାମାନେ । ୫ ମୀ ନାମୁ ଏନିକ୍‌ ମାଣ୍‌ସିୟାଁତି ବୁଦିତା ତୀରି ଆଆନା ମାହାପୁରୁତି ବାଡ଼ୁଲୁତା ତୀରି ଆନେ ।

ମାହାପୁରୁତି ବୁଦି

୬ ଆଡ଼ିଜିକେଏ ମାମ୍ବୁ ସୁଦୁଜୀଞ୍ଜୁତା ପାତାଆନି ବୁଦିଗାଟି ଲକୁତାଣା ବୁଦିତିକାତା ଝେହ୍‌ନମି, ସାମା ଏଦି ଇ ଜୁଗୁତି ବୁଦି ଆଏ, ଅଡ଼େ ଇ ଜୁଗୁତି ଗାଡ଼େକା ତାକି ନାସା ଆନି ସାଲ୍‌ଞ୍ଜି କିନାରି ବାଡ଼ୁଲୁତି ହାର୍‌ଞ୍ଜି କିନାରି ବୁଦି ଆଏ । ୭ ସାମା ନାନୁ ତରୁମାନି ଲେହେଡ଼ି ମାହାପୁରୁତି ବୁଦିତିକାତା ଝେସିମାଲ୍; ଏ ତରୁମାନି ମାହାପୁରୁ ବୁଦି ମା ଗାଞ୍ଜୁରମି ତାକି ଦାରତିତି ଗାଡ଼ି ଆଆ ନକେଏ ଆଚାନା ଇଚ୍‌କି ଆହାମାଚେ । ୮ ଇ ଜୁଗୁତି ସାଲ୍‌ଞ୍ଜି କିନାରି ଜିକେଏ ଆମ୍ବାଆରି ଏଦାଆଁ ପୁଞ୍ଜାହିଲଅରି, ଏନାଆଁତାକି ଇତିହାସ ଏଞ୍ଜାରି ଏଦାଆଁ

☆ ୨:୩ ୨:୩ କାମା ୧୮:୯

ପୁଞ୍ଜାମାଟିହଁମା ଗାଞ୍ଜୁରମିଗାଟି ପ୍ରବୁଞ୍ଜ କୁସତା ପାୟାଆତେରିମା ।
 ୯ ସାମା ଏନିକିହଁ ଦାମ୍ବୁପତିତା ରାସ୍ତକି ଆହାମାନେ,
 “କାନୁ ଏମିନାଣି ମେସା ହିଲେଏ, କିୟଁ ଏମିନାଣି ଝେଞ୍ଜା ହିଲେଏ,
 ଅଡ଼େ ମାଣ୍ଡସିୟାଁ ହିୟାଁତା ଏମିନାଣି ଅଣ୍ଡପା ହିଲଅରି,
 ଏ ବାରେତି ମାହାପୁରୁ ତାଙ୍ଗେ ଜୀଞ୍ଜୁ ନନାରାକି କିହାମାନେସି ।”
 ୧୦ ସାମା ମାହାପୁରୁ ମାଙ୍ଗେତାକି ସୁଦୁଜୀଞ୍ଜୁ ତଲେ ବାରେ
 ତସାମାଞ୍ଜାନେସି; ଏନିକି ଏ ସୁଦୁଜୀଞ୍ଜୁ ବାରେ କାତା, ହାଅ,
 ମାହାପୁରୁତି ଡ଼ଗୁମାନି କାତା ଜିକେଏ ପାରିନେସି । ୧୧ ମାଣ୍ଡସିତି
 କାତା ବାରେ ମାଣ୍ଡସି ତାଣା ମାନି ଜୀଞ୍ଜୁ ପିସପେ ଅଡ଼େ ଆମ୍ବାଆସି
 ପୁନେସି ? ଏଲେକିହଁ ଏ ମାହାପୁରୁ କାତା ବାରେ ମାହାପୁରୁ ଜୀଞ୍ଜୁ
 ପିସପେ ଆମ୍ବାଆସି ପୁନଅସି । ୧୨ ଏନିକି ମାହାପୁରୁ ତାଣାଟି ମାଙ୍ଗେ
 କାର୍ମାମେହନି ତାଣାଟି ହାପକି ଆହାମାନି କାତା ବାରେ ମାର ପୁଞ୍ଜାଲି
 ଆଡ଼ିନାୟି, ଏଦାଆଁତାକି ମାର ଦାରତିତି ଜୀଞ୍ଜୁ ପ୍ଲାଞ୍ଜାନା ମାହାପୁରୁତି
 ଜୀଞ୍ଜୁ ବେଟା ଆହାମାନାୟି ।

୧୩ ଏ ବାରେ କାତା ଜିକେଏ ମାର ମାଣ୍ଡସିତି ବୁଦିଟି ଜାପାମାନି ବଲୁ
 ତଲେ ଝେସିହିଲାଆୟି, ସାମା ସୁଦୁଜୀଞ୍ଜୁତି କାତା ବାରେ ସୁଦୁଜୀଞ୍ଜୁତି
 କାତାତଲେ ତେଲ୍‌ହି କିହାନା ସୁଦୁଜୀଞ୍ଜୁ ତଲେ ଜାପାମାନି ବଲୁ
 ତଲେ ଝେସିମାନାୟି । ୧୪ ସାମା ଦାରତିତି ମାଣ୍ଡସି ମାହାପୁରୁତି
 ସୁଦୁଜୀଞ୍ଜୁତି କାତା ବାରେ ଅପଅସି, ଏନାଆଁତାକି ଇତିହଁ ଏ
 ବାରେ ତାନି ନକିତା ଉଜେଏତାୟି, ଅଡ଼େ ଏଞ୍ଜସି ଏ ବାରେତି
 ତେଲ୍‌ହାଲି ଆଡ଼ଅସି, ଇତିହଁ ଏ ବାରେ ସୁଦୁଜୀଞ୍ଜୁ ତଲେ ନୀହାଁୟି
 କିଞ୍ଜିଆନେ । ୧୫ ସାମା ଆମ୍ବାଆରାକି ସୁଦୁଜୀଞ୍ଜୁ ମାନେ, ଏଞ୍ଜସି ବାରେ
 କାତା ନେହଁକି ଅଣ୍ଡପିନେସି, ଆଡ଼ିଜିକେଏ ଆମ୍ବାଆସି ଏଞ୍ଜାଣାଞ୍ଜ
 ଅଣ୍ଡପଅସି । ୧୬ ଏନାଆଁତାକି ଇତିହଁ,
 “ଆମ୍ବାଆସି ମାହାପୁରୁତି ଅଣ୍ଡପୁ ପୁଞ୍ଜାମାନେସି,
 ଇଞ୍ଜା ଏଞ୍ଜସି ଏଞ୍ଜାଣାଞ୍ଜ ଜାପହାଲି ଆଡ଼ିନେସି ?”
 ସାମା ମାମ୍ବୁ କ୍ରୀସ୍ତତି ମନ ବେଟା ଆହାମାନମି ।

୩

କୁଲମିତା ଗଡ଼ହା

୧ ଏ ନା ତାୟିୟା ଅଡ଼େ ତାଙ୍ଗିୟାତେରି ନାନୁ ସୁଦୁଜୀଝୁ ବେଟାଆହାମାନି ଲକୁଣି ଝେହ୍ନିଲେହେଁ ମିଙ୍ଗେ ଝେସାଲି ଆଡାଆତେଏଁ, ସାମା ଆଙ୍ଗା ତଲେ ମାନି ଲକୁ ଅଡ଼େ କ୍ରୀସ୍ତ ତାଣା ନାମୁତି କକାରି ପଦାଣି ଝେହ୍ନିଲେହେଁ ମିଙ୍ଗେ ଝେସ୍ତାତେଏଁ । ୨ ନାନୁ ମିଙ୍ଗେ ପାଲୁ ଉର୍ହାନା ଆର୍ଝା ରାନ୍ଦା ହିୟାଆତେଏଁ, ଏନାଆଁତାକି ଇଚିହ୍ନି ଏଲେତି ରାନ୍ଦା ତିଞ୍ଜାଲି ଆଡ଼ିହିଲିଆତେରି, ଅଡ଼େ ନୀଏଁ ଜିକେଏ ଆଡ଼ଅତେରି, ୩ ନୀଏଁ ପାତେକା ମୀରୁ ଦାର୍ଡତି ନାମାଆତି ଲକୁ ମାଣ୍ଡକି ତଲେ ମାଞ୍ଜେରି, ଏନାଆଁତାକି ଇଚିହ୍ନି ମୀ ବିତ୍ରା ତାହାରା ଅଡ଼େ ଗଡ଼ହା କିନାୟିମାନେ, ଏନାଆଁତାକି ମୀରୁ ଦାର୍ଡତି ନାମାଆତି ଲକୁତେରି ଆଏକି ଇଞ୍ଜା ମାଣ୍ଡସି ନୀତିନି ଲେହେଁ ନୀତି ହିଲଅତେରି ? ୪ ଏଡ଼େତା ରଅସି ଏଲେଇନେସି, “ନାନୁ ପାଝୁଲ ତାଣା ତାତେଏଁ” ଅଡ଼େ ରଅସି ଏଲେଇନେସି “ନାନୁ ଆପଲ ତାଣା ତାତେଏଁ” ଏତେଟିଏ ମୀରୁ ଦାର୍ଡତି ନାମାଆତି ଲକୁତେରି ଆଏକି ?

୫ ଆପଲ ଆମ୍ବାଆସି ? ପାଝୁଲ ଆମ୍ବାଆସି ? ଏଞ୍ଜାରି ଝାରଇ ସେବା କିନାରି, ଆମ୍ବାଆରି ତାଣାଟି ବାରେତାକି ପ୍ରବୁ ଏନିକି ହୀହାମାନେସି ଏଲେକି ମୀରୁ ନାମାମାଞ୍ଜେରି । ୬ ନାନୁ ଉହାମାଈ, ଆପଲ ଏୟୁ ହୀହାମାନେସି, ସାମା ମାହାପୁରୁ ପାଡ଼ି କିହାମାନେସି । ୭ ଇଚିହ୍ନି ଆମ୍ବାଆସି ଉହିନେସି ଇଞ୍ଜା ଆମ୍ବାଆସି ଏୟୁ ହୀନେସି ଏଞ୍ଜାସି ଏନାସି ଆଏ, ସାମା ଆମ୍ବାଆସି ପାଡ଼ି କିନି ମାହାପୁରୁ ଏଞ୍ଜାସି କାଜାସି । ୮ ଆମ୍ବାଆସି ଉହିନେସି ଅଡ଼େ ଆମ୍ବାଆସି ଏୟୁ ହୀନେସି ଏଞ୍ଜାରି ରିଆରି ରଲେଏତାରି, ସାମା ବାରେଜାଣା ତାନି କସ୍ତତି ଲେକାତଲେ କୁଲି ବେଟାଆନେରି । ୯ ଇଚିହ୍ନି ମାୟୁ ମାହାପୁରୁ ତଲେ ଆଣ୍ଡାନା କାମା କିନାତମି, ମୀରୁ ମାହାପୁରୁତି ତାସା ବୁମି ଅଡ଼େ ମାହାପୁରୁତି ଇଲୁ ।

୧୦ ନାଙ୍ଗେ ହୀପକି ଆହାମାଞ୍ଜାନି ମାହାପୁରୁତି କାର୍ମାତଲେ ନାନୁ ର ବୁଦିଗାଟି ଇଲୁ ଦହ୍ନି ଲକୁ ଲେହେଁ ପୁନାଦି କିହାମାଈ, ଅର ରଅସି ଏଦାଣି ଲାକ ଇଲୁ ଦସି ମାନେସି, ସାମା ବାରେଜାଣା ତାନି ଲାକ ଏନିକି ଦସି ମାନେରି ଏନାଆଁତାକି ଜାଗ୍ରାତା ଆପେରି । ୧୧ ଇଚିହ୍ନି ଆମିନି ପୁନାଦି କିଞ୍ଜିଆହାମାନେ, ଏଦାଣି ପିସ୍ପେ

☆ ୩:୨ ୩:୨ ଏବୁ ୫:୧୨,୧୩ ☆ ୩:୪ ୩:୪ ୧କର ୧:୧୨ ☆ ୩:୭ ୩:୭ କାମା ୧୮:୪-୧୧; କାମା ୧୮:୨୪-୨୮

ଏକକାନ୍ତି ପୁନାଦି ଆତ୍ମାଆସି କିହାଲି ଆଡ଼ଅସି, ଏ ପୁନାଦି ଜୀସୁ କ୍ରୀସ୍ତ । ୧୭ ସାମା ଆତ୍ମାଆସି ଏ ପୁନାଦି ଲାକ ବାଂଗାରା, ଝେଣ୍ଡି, ଗାତି ଦାରାଗାଟି ଖାଲୁକା, ମାରୁକା, ଜାଡ଼ା, ଅଡ଼େଡ଼ ଓକା ତଲେ କିନେସି, ୧୮ ଆତିହୁଁ ଆତ୍ମାଆରି କାମା ଏନିଲେହେଁତାୟି ଏଦି ତଞ୍ଜାଆନେ, ଇଚିହୁଁ ଏ ନେରୁ ଏଦି ତହୁନେ, ଏ ନେରୁ ହିରୁତଲେ ତଞ୍ଜାଆନେ, ଇଞ୍ଜା ବାରେଜାଣାତି କାମା ଏନିଲେହେଁତାୟି ଏ ହିରୁ ତାୟିପାରି କିନେ । ୧୪ ଆତ୍ମାଆସି ଏନିକିଁ ଇଲୁ ଦସା ମାନେସି ଏଝାଣି କାମା ଏଲେକିଁ ତୟିତିହୁଁ ଏଝାସି ଏ ଦାନା ବେଟା ଆନେସି । ୧୫ ଇଞ୍ଜା ଆତ୍ମାଆରି କାମା ଝେହାହାନେ, ଏଝାଣିଝାୟି ନାସଞ୍ଜି ଆନେ, ଆତିଜିକେଏ ଏଝାସି ଗେଲପି ଆନେସି, ସାମା ଏଦି ହିରୁ ବିତ୍ରାଟି ହଟା ହାତି ସମାନା ଆନେ ।

୧୬ *ମୀରୁ ପୁଞ୍ଜାହିଲଅତେରି କି ମୀରୁ ମାହାପୁରୁତି ଇଲୁତେରି, ଅଡ଼େ ମାହାପୁରୁତି ସୁଦୁଜୀଝୁ ମୀ ହିୟାଁତା ବାସା କିନେ । ୧୭ ଆତ୍ମାଆସି ମାହାପୁରୁ ଲକୁଇଁ ନାସା କିନେସି, ମାହାପୁରୁ ଏଝାଣାଇଁ ନାସା କିନେସି, ଇଚିହୁଁ ମାହାପୁରୁତି ଇଲୁ ଅଟହାୟି ଇଞ୍ଜା ମୀରୁଏ ଏଝାଣି ଇଲୁ ।

୧୮ ଆତ୍ମାଆସି ତାନୁଏ ତାଙ୍ଗେ ନାଡ଼ିକିହା କତାଆପେସି, ଆମିନି ଲକୁ ଇ ଦାରୁତିତା ବୁଦି ଗାଟାତେଏଁ ଇଞ୍ଜୁଁ ଅଣପିନେସି, ଆତିହୁଁ ଏଝାସି ଏନିକିଁ ବୁଦିଗାଟାସି ଆନେସି ଏଦାଆଁତାକି ଦାରୁତିତି ଲକୁତାଣା ବୁଦି ହିଲାଆଗାଟି ଲକୁ ଲେହେଁ ଆପେସି । ୧୯ ଇଚିହୁଁ ଇ ଦାରୁତିତି ବୁଦି ମାହାପୁରୁ ନକିତା ବୁଦି ହିଲାଆଗାଟାୟି, ଏଦାଆଁତାକି ରାସକି ଆହାମାନେ, “ମାହାପୁରୁ ବୁଦି ଗାଟାରାଇଁ ତାମି ସୁତ୍ରମି ତଲେ ପାନ୍ଦାତା ଆହନେସି;” ୨୦ ଅଡ଼େ ରାସକି ଆହାମାନେ “ବୁଦିଗାଟାରି ଅଣପୁ ବାରେ ଉଜେଏତାୟି ଇଞ୍ଜୁଁ ପ୍ରବୁ ପୁଞ୍ଜାମାନେସି ।” ୨୧ ମାଣସି ତାଣା ଆତ୍ମାଆସି ବତପଣ ଆଆପେସି, ଇଚିହୁଁ ବାରେ ମୀଦିଏ । ୨୨ ପାଞ୍ଜୁଲ, ଇଞ୍ଜୁ କି ଆପଲ, ଇଞ୍ଜୁ କେପା*, ଇଞ୍ଜୁ ଅଡ଼େ ଦାରୁତି ଇଞ୍ଜୁ କି ଜୀଝୁ ଇଞ୍ଜୁ, କି ହାନାୟି ଆପେ, ନୀଏଁ ତାୟି ଆପେ, କି ତାୟିତାୟି ଆପେ, ଏ ବାରେଏ ମୀଦି । ୨୩ ସାମା ମୀରୁ କ୍ରୀସ୍ତତି ଲକୁତେରି ଅଡ଼େ କ୍ରୀସ୍ତ ମାହାପୁରୁ ତାଣାତାସି ।

☆ ୩:୧୭ ୩:୧୭ ୧କର ୭:୧୯; ୨କର ୭:୧୭

* ୩:୨୨ ୩:୨୨ ପିତର

୪

ଜୀସୁ ତାଣାଟି ପାଶୁଓଡ଼ି ଆହାମାନାରି

^୧ ଲକ୍ଷୁ ମାଙ୍ଗେ କ୍ରୀସ୍ତତି ସେବା କିନାରି, ଅଡ଼େ ମାହାପୁରୁତି ଡଗ୍ନାମାନି ଇଲୁତି ଗୁମୁସ୍ତା ଇଞ୍ଜି ଅଣ୍ପାପେରି । ^୨ ଇଲେଆହି ଗୁମୁସ୍ତା ବେଟାଆହାମାନି ମାଣ୍ପି ଜାହାରା ପ୍ରୁ ତାଣା ମାନି ଗାଟାସି ତଞ୍ଜା ଆପାସି । ^୩ ସାମା ମୀ ତାଣାଟି ଆପେ କି ଆମିନି ନୀହାଁୟି କିନି ତାଣା ନୀହାଁୟି କିଓ ଆନାୟି ନା ତାକି ଏଡ଼ି କାଜା କାତା ଆଏ, ଇଲେକି ନାନୁ ଜାହାରାଇଁ ନୀହାଁୟି କିହା କଡ଼ଅଁ । ^୪ ଇତିହିଁ ନାନୁ ନା କପାଟି ଏନାଆଁ ପୁଞ୍ଜାହିଲଅଁ, ଆଡ଼ିଜିକେଏ ନାନୁ ଇମ୍ପାଆଁ ଦହୁ ହିଲଆ ଗାଟାଡେଏଁ ଇଞ୍ଜି ତଞ୍ଜା ଆହାହିଲଅଁ, ସାମା ଆମ୍ପାଆସି ନା ନୀହାଁୟି କିୟାନେସି, ଏଞ୍ଜାସି ପ୍ରୁ । ^୫ ଏଡ଼ାଆଁତାକି, ତୀରିକିତି ଦିନା ଖାଆ ନକେଏ ଇତିହିଁ ପ୍ରୁ ଖାଆ ନକେଏ ମୀରୁ ଆମ୍ପାଆରାଇଁ ନୀହାଁୟି କିଆଦୁ, ଏଞ୍ଜାସି ଆନ୍ଦେରିତା ଡଗ୍ନାମାନି ବାରେ ଉଜେଡ଼ିତା ତହୁନେସି, ଅଡ଼େ ହିୟାଁତି ଅଣ୍ପୁ ବାରେ ଏଞ୍ଜାସି ଖେହୁନେସି, ଏଡ଼ିବେଲା ବାରେଜାଣା ମାହାପୁରୁ ତାଣାଟି ଗାଞ୍ଜୁରମି ବେଟାଆଡ଼େରି ।

^୬ ଏ ତାୟିୟାଁ ଅଡ଼େ ତାଜିସ୍ତାଡେରି, ନାନୁ ମୀରୁ ଜାପାଲି ତାକି ଇ ବାରେ କାତା ନାନୁ ନାଙ୍ଗେ ଅଡ଼େ ଆପଲଇଁ ତସାଁ ଖେସିମାଞ୍ଜାଇଁ, “ଇତିହିଁ ଏନାୟି ରାସ୍ତକି ଆହାମାନେ ଏ କାତାଟି ଗାଣ୍ପାଆଦୁ,” ଇଦାଆଁ ମୀରୁ ମା ତାଣାଟି ଜାପାଦୁ, ଅଡ଼େ ଏନିକିଁ ମୀ ବିତ୍ରାଟି ଆମ୍ପାଆସି ରଅଣି ଖାକିଟି ଅଡ଼େ ରଅଣାଇଁ ଅପାଆନା ବଡ଼ପଣ ଆଆଦୁ । ^୭ ମିଙ୍ଗେ ଆମ୍ପାଆସି କାଜାସି କିହାଁ ମାଞ୍ଜାନେସି ? ଅଡ଼େ ମୀରୁ ଏନାଆଁ ଦାନା ଲେହେଁ ବେଟାଆହା ହିଲଅଡେରି, ଇଲେକିଁ ମୀଦି ଏନାୟି ମାନେ ? ସାମା ମୀରୁ ଏଡ଼ାଆଁ ଦାନା ଲେହେଁ ବେଟାଆହାମାଞ୍ଜେରି, ଆଡ଼ିହିଁ ମୀରୁ ଦାନା ଆଏ ଇନି ଲେହେଁ ଏନାଆଁତାକି ବଡ଼ପଣ ଆହିମାଞ୍ଜେରି ?

^୮ ମୀ ବାରେ ଲଡ଼ାମାନାଣି ବେଟାଆଡ଼େରିଏ କି ? ଇଚେକାଟିଏ ମୀରୁ ବାଡ଼କା ହାଚେରିଏ କି ? ମା ପିସ୍ପେ ମୀରୁ ରାଜା ଆହାମାଞ୍ଜେରି ? ହାଅ, ମୀରୁ ରାଜା ଆହାମାଡ଼ିହିଁ ନେହିଁ ଆଡ଼େମା, ଏନିକିଁ ମାମ୍ପୁଜିକେଏ ମୀ ତଲେ ସାଲଓଡ଼ି କିହାଲି

ଆଡ଼ିତମିମା । ୯ ଏଦାଆଁତାକି ଇତିହାସ ନା ଅଶ୍ୱପୁତା ମାର ପାଣ୍ଡୁଞ୍ଜି
 ଆହାମାନାତାୟି, ମାର ମାହାପୁରୁତି ଡଣ୍ଡତା ହେରପି ଆହାମାନି
 ତାମୁତି ଲକୁ ସମାନା ତସାମାଞ୍ଜାନେସି, ଇତିହାସ ମାମ୍ମୁଦାର୍ତତା,
 ମାହାପୁରୁତି ଦୃତୁୟାଁ ଇଞ୍ଜା ମାଣ୍ଡସିୟାଁ ନକିତା ଲାଜାକିଞ୍ଜି ଆନାତମି
 ଲେହେ ଆହାମାନମି । ୧୦ ମାମ୍ମୁ କ୍ରୀସ୍ତ ତାକି ବୁଦି ହିଲାଆ ଗାଟାତମି,
 ସାମା ମୀରୁ କ୍ରୀସ୍ତ ତାକି ବୁଦି ଗାଟାତେରି; ମାମ୍ମୁ ବାଡ଼ୟୁ ହିଲାଆ
 ଗାଟାତମି, ସାମା ମୀରୁ ବାଡ଼ୟୁ ଗାଟାତେରି; ମୀରୁ ଗାଞ୍ଜୁରମି
 ବେଟା ଆନାତେରି, ସାମା ମାମ୍ମୁ ବେଟା ଆଆଗାଟାତମି । ୧୧ ନୀର୍ବ
 ପାତେକା ମାମ୍ମୁ ହାକି, ଅଡ଼େ ଏସକି ଗାଟାତମି, ଗେଞ୍ଜିତି ହିମ୍ବୁରି
 ହୁଟାମାନମି, ଅଡ଼େ ମାଡ଼ା ବେଟାଆହି ମାନମି, ଇଞ୍ଜା ବାସାଟାୟୁ
 ହିଲାଆନା ରେଜିମାନମି । ୧୨ ☆ମା କେୟୁଟି ଝାହୁତି କାମା କିହିମାନମି,
 ଆମ୍ମାଆସି ବାକା ଇଟାସାରେ, ମାମ୍ମୁ ଏଞ୍ଜାରାଇଁ ବର ହୀହିମାନମି, ସାମ୍ମୁ
 ହିୟାତିହାଁ ଜିକେଏ ଅରୁହିମାନମି । ୧୩ ମାଞ୍ଜେ ଲାଜା କିୟାତିହାଁ
 ଜିକେଏ ମାମ୍ମୁ ଆଣ୍ଡିଆନି କାତା ଝେସିମାନମି; ନୀର୍ବ ପାତେକା ମାମ୍ମୁ
 ଦାର୍ତତି ତୁକାଁ ଜାଣୁ ଅଡ଼େ କିଟସି ରୁଡିତି ଲେହେ ଆହାମାନମି ।

୧୪ ନାନୁ ମିଞ୍ଜେ ଲାଜା ହୀହାଲି ଇ ବାରେ କାତା ରାଡିମାଞ୍ଜାଅଁ,
 ସାମା ନା ଜୀଞ୍ଜୁତି ମୀରକା ଇଞ୍ଜାଁ ଅଶ୍ୱପାନା ମିଞ୍ଜେ ସେଡନା
 ହୀହାଲିତାକି ଇ ବାରେ କାତା ରାଡିମାଞ୍ଜାଇଁ । ୧୫ ଇତିହାସ କ୍ରୀସ୍ତ
 କାତା ମିଞ୍ଜେ ଜାପୁନାରି ଦସ ମାଣା ଲକୁ ଡୟିନେରି, ଆଡ଼ିଜିକେଏ
 ହାରେକା ତାଞ୍ଜିୟାଁ ହିଲଅରି; ଇତିହାସ କ୍ରୀସ୍ତ ଜୀସୁ ତାଣା ନାନୁ ମିଞ୍ଜେ
 ନେହାଁ କାବୁତଲେ ମୀ ତାଞ୍ଜି ଲେହେ ଆହାମାଇଁ । ୧୬ ☆ଏଦାଆଁତାକି
 ନାନୁ ମିଞ୍ଜେ ବାତିମାଲିମାଞ୍ଜାଇଁ ନାନୁ କିହିମାନି ଲେହେଁ କିଦୁ ।
 ୧୭ ଏଦାଆଁତାକି ନାନୁ ତିମତିଇଁ ମୀ ତାଣା ପାଣ୍ଡିମାଞ୍ଜାଇଁ, ଏଞ୍ଜାସି
 ମାହାପୁରୁ ତାଣା ନା ଜୀଞ୍ଜୁତି ନାମୁତି ମୀରଏସି; ଏନିକାଁ ନାନୁ
 ବାରେଞ୍ଜାକି ବାରେ କୁଲମିକାଣା ଜାପୁହି ମାଇଁ, ଏଲେକାଁ ଏଞ୍ଜାସି
 ମିଞ୍ଜେ ନା କ୍ରୀସ୍ତ ଲେମ୍ବିନାଣି ଅଶ୍ୱପି କିୟାନେସି ।

୧୮ ନାନୁ ମୀ ତାଣା ଝାହି ହିଲଅଁ ଇଞ୍ଜାଁ ଅଶ୍ୱପାନା ଏତରଜାଣା
 ବଡପଣ ଆହିମାଞ୍ଜେରି । ୧୯ ସାମା ମାହାପୁରୁ ମନ କିତିହାଁ, ନାନୁ

☆ ୪:୧୨ ୪:୧୨ କାମା ୧୮:୩ ☆ ୪:୧୭ ୪:୧୭ ୧କର ୧୧:୧; ପିଲିପି ୩:୧୭

ମୀ ତାଣ୍ଡା ତବେ ଖାଇଁ; ଅଡ଼େ ଆମ୍ବାଆରି ବତପଣ ଆହିମାନେରି,
 ଏଞ୍ଜାରି କାତାତଲେ ଆଏ, ସାମା ବାଡ଼ୁୟୁତି ସିନିକିଇଁ । ୨୦ ଇତିହିଁ
 ମାହାପୁରୁତି ରାଜି ଖାରଇ ଜଲିନି କାତାତଲେ ଆଏ, ସାମା ବାଡ଼ୁୟୁ
 ତଲେ ତଞ୍ଜାଆନେ । ୨୧ ମୀ ଅଣ୍ପୁ ଏନାୟି ? ନାନୁ ବାଡ଼ୁଗା ଆସାଁ ମୀ
 ତାଣ୍ଡା ଖାଇଁ କି ଜୀଞ୍ଜୁ ନନାଣି ଆସାନା ଇଞ୍ଜାଁ ସୁଦୁ ସୁଞ୍ଜାଲ୍ୟା ଗାଟି ଜୀଞ୍ଜୁ
 ଆସାଁ ଖାଇଁ ?

୫

କୁଲମି ବିତ୍ରାମାନି ଲାଗେଏତାୟି

୧ ସାତେଏ ଝେଙ୍ଗାମାନେ କି ମୀ ବିତ୍ରା ଦାରିକାମା ମାନେ,
 ଅଡ଼େ ମୀ ତାଣ୍ଡା ଇଲେତି ଦାରିକାମା ମାନେ, ଅଡ଼େ ଇଲେତାୟି
 ଜୀହୁଦିଆଆତାରି ତାଣ୍ଡା ଜିକେଏ ଆଏ, ଇଲେକିଁ ରଅସି ତାମି
 ଆବା ତକ୍ତିନି ଇଚାମାନେସି । ୨ ଅଡ଼େ, ଆମ୍ବାଆସି ଇଲେତି କାମା
 କିହାମାନେସି, ଏଞ୍ଜାସି ଏନିକିଁ ମୀ ତାଣ୍ଡାଟି ହେକ କିଞ୍ଜିଆନେସି,
 ଏଦାଆଁତାକି ଦୁକୁଆହିଁ ତୀଆନା ବତପଣ ଆହିମାଞ୍ଜେରି ? ୩ ସାମା
 ନାନୁ ଆଙ୍ଗା ତଲେ ହିଲାଆତି ଜିକେଏ ଏମ୍ବାଆଁ ମାନିଲେହେଁ ମାଇଁ,
 ଆମ୍ବାଆସି ଇଲେତି କାମା କିହାମାନେସି, ନାନୁ ମାନି ଲେହେଁ ପ୍ରବୁ
 ଜୀସୁ ଦରୁତଲେ ଏଞ୍ଜାଣି ବିଚାରା କିହା ରାହାମାଇଁ, ୪ ଇତିହିଁ
 ମୀରୁ ଅଡ଼େ ନା ପ୍ରବୁ ଜୀସୁ ବାଡ଼ୁୟୁ ତଲେ କୁଡ଼ା ଆନାଟି ନା ଜୀଞ୍ଜୁ
 ଜିକେଏ ଏମ୍ବାଆଁ ଡ଼ୟିନେ ଇଞ୍ଜାଁ ପୁଞ୍ଜାମାଇଁ, ୫ ଇଞ୍ଜାଁ ଇଲେତି
 ଲକୁଇଁ ଆଙ୍ଗା ତଲେ ନାସା ଆହାଲି ସୟତାନ କେୟୁତା ହେରପିନାୟି
 ମାନେ, ଏନିକିଁ ପ୍ରବୁ ଜୀସୁତି ଦିନାତା ଏଞ୍ଜାଣି ଜୀଞ୍ଜୁ ଗେଲପି ଆହାଲି
 ଆଡ଼ିନେ ।

୬ *ମୀରୁ ଇଲେଆହିଁ ବତପଣ ଆନାୟି ନେହେଁ ଆଏ । ମୀରୁ
 ପୁଞ୍ଜାହିଲଅତେରି, “ଇଚରା ପୁଲ୍ୟାଏୟୁ ବିତିତା ମାନି ଗୁଣ୍ଡାତି ପୁଲ୍ୟା
 କିନେ ।” ୭ ମୀରୁ ପୁଲ୍ୟା ତିନାଆ ଲକୁତେରି, ଏଦାଆଁତାକି ଏନିକିଁ
 ମୀରୁ ପୁଞ୍ଜିନି ଡ଼କା ଆହାଲି ଆଡ଼ିଦେରି, ଏଦାଆଁତାକି ପୁଞ୍ଜଇ ପୁଲ୍ୟା
 ଏୟୁତି ହପ୍ପହା ତୁହ୍ପଦୁ; ଏଦାଆଁତାକି ଇତିହିଁ ମା ପିସପିଆନି ପାରୁତି
 ମେଣ୍ଡା ତାଲୁ, ଇତିହିଁ କ୍ରୀସ୍ତ, ଜିକେଏ ପୂଜା କିଞ୍ଜିଆହାମାନେସି ।

☆ ୫:୭ ୫:୭ ଗାଲା ୫:୯

୮ ଏଦାଆଁତାକି ୱାଦୁ, ମାର ପାପୁ ଅଡ଼େ ଲାଗେଏତି ପୁଞ୍ଜଇ କାମାତି ରୁଟି ପଞ୍ଜକିନି ଗୁଣ୍ଡା ତଲେ ପାରୁଁ କିଆନା ତୀରି ଅଡ଼େ ସାତା ତଲେ ପୁଲ୍ୟାଏୟୁ ହିଲାଆ ରୁଟିତି ପାରୁଁ କିନ ।

୯ ଦାରି କାମାକିନାରି ତଲେ ଆଣ୍ଡାଆଦୁ ଇଞ୍ଜିଁ ନାନୁ ନା ଆକୁତା ରାଚାମାଚେଏଁ; ୧୦ ଇ ଦାରୁତିତି ଦାରିକାମା କି ଦନ ଜୁପକା, ଏଚକାତାରି ଦିଶ୍‌ସୁ ସରୁ ଆନାରି, ପେଶକା ବମାୟା ପୂଜା କିନାରି ତଲେ ଆମ୍ବାଆସି ଏଚେଲା ଆଣ୍ଡାଆସି, ଏଦ୍ଦି ଆଏ, ଏଲେଆଡ଼ିହିଁ ଦାରୁତିତି ହଚା ହାନାୟିମାନେ; ୧୧ ଇତିହିଁ ନା ରାଚିନି ଅଣ୍ଡାପୁ ଇଦି ମାଚେ, ଇତିହିଁ ଆମିନି ଲକୁତି ତାୟି ଇଞ୍ଜିଁ ୱେଙ୍ଗାନା, ଦାରିକାମା, ଦନ ଜୁପକା, ପେଶକା ବମାୟା ପୂଜା, ନିନ୍ଦା ଗାଚାରି, କାଡ଼ୁ ବୁଡୁ, ଏଚକାତାରି ଦିଶ୍‌ସୁତି ସରୁ ଆନେରି, ଆଡ଼ିହିଁ ଏଲେତାରି ତଲେ କୁଡ଼ାଆଦୁ, ଅଡ଼େ ଏଞ୍ଜାରିତଲେ ରାନ୍ଦା ଜିକେଏ ତିନାଆଦୁ ।

୧୨ ପାଙ୍ଗାତି ଲକୁତି ନାହାଁୟି କିହାଲି ନାନୁ ଆମ୍ବାଆଚେଏଁ ? ସାମା କୁଲମି ବିତ୍ରା ଆମ୍ବାଆରି ମାନେରି ଏଞ୍ଜାରି ବିଚାରା ମୀରୁ କିଅତେରି କି ? ୧୩ ସାମା ଆମ୍ବାଆରି ପାଙ୍ଗାତା ମାନେରି ମାହାପୁରୁ ଏଞ୍ଜାରି ବିଚାରା କିନେସି । ଦାମ୍ବୁ ସାସ୍ତେରିତା ରାମ୍ବକି ଆହାମାନେ, “ମୀ ତାଣାଟି ଲାଗେଏତି ଲକୁଣି ଏଚକା କିଦୁ ।”



କ୍ରୀସ୍ତାନା ତାୟିୟାଣି ଦାଞ୍ଜାକିନି ମେରା

୧ ମୀ ବିତ୍ରାଟି ଆମ୍ବାଆରି କପାଟି କାତା ମାତିସାରେ ଏଞ୍ଜାସି ନାହାଁୟି କିହାଲି ମାହାପୁରୁ ଲକୁତାଣା ହାଲାଆନା ଦାମ୍ବୁ ହିଲାଆଗାଟି ନାହାଁୟି କିନାଣି ତାଣା ଅହାଲି ଏନିକିଁ ସାସା ମାନେ ? ୨ ମାହାପୁରୁ ଲକୁ ଇ ଦାରୁତିତି ନାହାଁୟି କିନେରି, ଇ କାତା କି ମୀରୁ ପୁଞ୍ଜାହିଲଅତେରି ? ଇଞ୍ଜା ଦାରୁତି ମୀ ତାଣା ନାହାଁୟି କିଞ୍ଜିଆନେ, ଆଡ଼ିହିଁ ଇ ଇଚି ଇଚି କାତାଟି ନାହାଁୟି କିୟାଲି ଆଡ଼ଅତେରି କି ? ୩ ମୀରୁ ଲାକପୁରୁତି ଦୁଡୁୟାୟି ଜିକେଏ ବିଚାରା କିନାୟି ଇ କାତା ମୀରୁ ପୁଞ୍ଜାହିଲଅତେରି କି ? ଆଡ଼ିହିଁ ଦାରୁତିତି ଜାମ୍ଲିତି ଜିକେଏ ନାହାଁୟି କିନାୟି ମାଙ୍ଗେତାକି ଉସାସା ଆୟେଏ କି ? ୪ ମୀ ଜୀଞ୍ଜୁତି କାତା ଏନ୍ଦାୟି, ସାମା

ନୀହାୟି କିୟାଲି ଏନ୍ତି ଦାରତିତି କାତା ମାଚିହଁ, ଏଦାଆଁ ନୀହାୟି କିୟାଲି କୁଲମିତି ପୁନାଆ ଗାଟାରାଇଁ ନୀହାୟି କିୟାଲି ହାଟିଦେରି କି ? ୫ ନାନୁ ମିଙ୍ଗେ ଲାଜା ହାହାଲିତାକି ଇଦାଆଁ ଖେସିମାଞ୍ଜାଇଁ । କ୍ରୀସୁଇଁ ନାମାମାନି ତାୟିୟାଁ ବିତ୍ରା ଆହିମାନି ଗଡ଼ହାତି ତୁକ୍‌ହାଲି, ଇଲେତି ର ବୁଦିଗାଟାସି ଜିକେଏ କୁଲମିତା ଆମ୍ବାଆସି ହିଲଅସି କି ? ୬ ସାମା ନାମୁଗାଟି ତାୟି ଅର ତାୟି କପାଟି ନୀହାୟି ଇଲୁତା ଦାଞ୍ଜା କିନେସି, ଏଡି ଜିକେଏ ନାମାଆଗାଟାରି ତାଣା !

୭ ସାମା ମୀ ମୀ ବିତ୍ରାତି କାତାତାକି କର୍ତ୍ତା ଦାଞ୍ଜା କିହିମାଞ୍ଜେରି, ଏମ୍ବାଆଁ ସାତେଏ ଦହ ଗାଟାତେରି, ଏନାଆଁତାକି ଲାଗେଏତାଣି ଅରୁହି ହିଲଅତେରି ? ଏନାଆଁତାକି ନାସଞ୍ଜି ଆନାଣି ଅପିହିଲଅତେରି ? ୮ ସାମା ମୀରୁ ମୀରୁଏ ଲାଗେଏ ଅଡେ ନାସା କିହିମାଞ୍ଜେରି, ଅଡେ ଏଦାଆଁ ତାୟିୟାଁଣି କିହିମାଞ୍ଜେରି । ୯ ଅଡେ ଦାମ୍ବୁ ହିଲାଆ ଗାଟାରି ମାହାପୁରୁ ରାଜିତି ଅଦିକାରା ଆଅରି, ଇଦାଆଁ କି ମୀରୁ ପୁଞ୍ଜାହିଲଅତେରି ? ନାଡିକିଞ୍ଜି ଆଆତୁ, ଦାରିକାମା, କି ପେଣକା ବମାୟାଁ ପୂଜା କିନାରି, ଲାଗେଏତି କାମାକିନାରି, ଆବା ଆବାୟାଁ ଦହ କିଞ୍ଜିଆନାରି, ୧୦ ସରୁ କିନାରି, ଦନ ଜୁପକା, କାଡ଼ୁ ବୁଡୁ, ଲକୁଣି ନିନ୍ଦା କିନାରି, ଏଟକାତାରି ଦିଶ୍‌ସୁ ମୀଞ୍ଜିନାରି, ଇଞ୍ଜାରି ମାହାପୁରୁ ରାଜିତା ଅଦିକାରା କିହାଲି ଆଡ଼ଅରି । ୧୧ ଅଡେ, ମୀ ବିତ୍ରା ଆମ୍ବା ଆମ୍ବାଆରି ଇଲେକଁ ମାଚେରି; ସାମା ପ୍ରବୁ ଜୀସୁ କ୍ରୀସୁ ଦରୁତଲେ ଇଞ୍ଜା ମାହାପୁରୁତି ସୁଦୁଜୀଞ୍ଜୁ ତଲେ ମୀରୁ ନରଞ୍ଜି ଆହାମାଞ୍ଜେରି, ଇଞ୍ଜା ସୁଦୁଗାଟାତେରି ଆହାନା ତୀରିଗାଟାତେରି ଇଞ୍ଜାଁ ଖେଙ୍ଗା ମାଞ୍ଜେରି ।

ମାହାପୁରୁତି ଗାଞ୍ଜୁରମି ତାକି ଆଙ୍ଗାତି ଲେମ୍ବିନାୟି

୧୨ ✧ଆମ୍ବାଆସି ଏଲେଇନେସି “ନାଙ୍ଗେ ବାରେ କାମା କିହାଲି ଅଦିକାରା ହାପକି ଆହାମାଞ୍ଜାନେ,” ସାତା କାତା, ସାମା ବାରେ କାମା ନିଙ୍ଗେତାକି ନେହାୟି ଆଏ, ନାଙ୍ଗେ ବାରେ କାମା କିହାଲି ହେଲ ମାନେ ସାମା ନାଙ୍ଗେ ଲକ୍‌ହାଲି ଆମ୍ବାଆରାକି ଏଚେଲା ପାରୁ ହାଅଁ । ୧୩ ଏଚରଜାଣା ଏଲେଇନେରି “ରାନ୍ଦା ବାଣ୍ଡି ତାକି ଇଞ୍ଜାଁ ବାଣ୍ଡି ରାନ୍ଦା ତାକି ।” ସାମା ମାହାପୁରୁ ଇ ରିଶ୍‌ଆଁତି ଜିକେଏ ମେକ୍‌ନେସି । ଆଙ୍ଗା

✧ ୬:୧୨ ୬:୧୨ ୧କର ୧୦:୨୩

ଦାରି କାମାତାକି ଆଏ, ସାମା ପ୍ରବୁତି ସେବାତାକି, ଅଡ଼େ ପ୍ରବୁ ଆଙ୍ଗା ତାକି । ୧୪ ମାହାପୁରୁ ପ୍ରବୁ ଜୀସୁଇଁ ହାକିଟି ନିକହେସି, ଇଞ୍ଜା ତାନି ବାଡ଼ୁୟୁ ତଲେ ମାଙ୍ଗେ ଜିକେଏ ନିକହାନେସି ।

୧୫ ମୀ ଆଙ୍ଗା କ୍ରୀସ୍ତତି ଆଙ୍ଗା ଲେହେଁ, ଇଦାଆଁ ପୁଞ୍ଜାହିଲଅତେରି କି ? ଆତିହିଁ ନାନୁ କ୍ରୀସ୍ତତି ର ଆଙ୍ଗା ଅହାନା ଦାରେଣି ଆଙ୍ଗା କିଇଁ ? ଏଦି ଏତେଲା ଜିକେଏ ଆଆପେ । ୧୬ ଅଡ଼େ ଆମ୍ବାଆସି ଦାରେଣି ତଲେ ଆଣ୍ଡିନେସି ଏଞ୍ଜାସି ଏଦାନିତଲେ ରଣ୍ଡିଏ ଆଙ୍ଗା ଆନେସି, ଇଦାଆଁ ମୀରୁ ପୁଞ୍ଜାହିଲଅତେରି ? ଏଦାଆଁତାକି ଦାମ୍ବୁପତିତା ରାୟ୍‌କି ଆହାମାନେ “ଏ ତକ୍ତି ତକ୍ତା ରଣ୍ଡିଏ ଆଙ୍ଗା ଆନୁ ।” ୧୭ ସାମା ଆମ୍ବାଆସି ପ୍ରବୁ ତଲେ ଆଣ୍ଡିନେସି, ଏଞ୍ଜାସି ଏଞ୍ଜାଣିତଲେ ରଣ୍ଡିଏ ଜୀସୁ ଆନେସି ।

୧୮ ଦାରିକାମାଟି ହେକ ଆଦୁ, ମାଣ୍ଡସି ଏନ୍ଦି ପାପୁ କିନେସି, ଏଦି ଆଙ୍ଗାତି ଲାଗେଏ କିନେସି, ସାମା ଆମ୍ବାଆସି ଦାରିକାମା କିନେସି, ଏଞ୍ଜାସି ତାନି ଆଙ୍ଗା କପାଟି ପାପୁ କିହମାନେସି । ୧୯ ☆ମୀ ଆଙ୍ଗା ମାହାପୁରୁ ତାଣାଟି ବେଟାଆହାମାନି ମୀ ହିୟାଁ ବିତ୍ରା ସୁଦୁଜୀସୁ ବାସାଆନ୍ଦି ଦେଝୁଡ଼ି, ଇଦାଆଁ ମୀରୁ ପୁଞ୍ଜାହିଲଅତେରି କି ? ଅଡ଼େ ମୀରୁ ମୀରୁଏ ମିଆତେରି ଆଏ; ସାମା ମାହାପୁରୁତି ଲକୁତେରି । ୨୦ ଇତିହିଁ ମୀରୁ ଗାଡ଼ି ଦାରାତଲେ କଡ଼ଝି ଆହାମାଞ୍ଜେରି; ଏଦାଆଁତାକି ମୀ ଆଙ୍ଗା ତଲେ ମାହାପୁରୁତି ଗାଝୁରମି କିଦୁ ।



ବୀହା ଆନ୍ଦି ମେରା

୧ ମୀରୁ ମୀ ଆକୁତା ଆମିନି କାତା ରାଟା ମାଞ୍ଜେରି, ଏ ବାରେତାକି ନାନୁ ଝେସ୍ତାନାୟି ଇଦି, “ଇୟାନି ତୀଗାଆ ଗାଟାୟି ଆବାକି ନେହେଁ;” ୨ ସାମା ଦାରି କାମାତି ଆଜିତାକି ବାରେ ଆବାୟାକି ଜାହାରା ତକ୍ତି ମାଣ୍ଡେ, ଅଡ଼େ ଇୟାସିକାକି ଜାହାରା ତକ୍ତା ମାଣ୍ଡେସି । ୩ ତକ୍ତା, ତକ୍ତିନାକି ଏନାୟି ଲଡ଼ା ଏଦାଆଁ ହୀପାସି, ଇଞ୍ଜା ଏଲେକିହିଁଏ ତକ୍ତି ତକ୍ତାକି ତାନି ଲଡ଼ାମାନାଣି ହୀପେ, ଅଡ଼େ ତାମଙ୍ଗେ ଏନାୟି ଲଡ଼ାମାନାଣି ପୂରା କିନାୟିମାନେ । ୪ ତକ୍ତି ତାନି ଆଙ୍ଗାତି ମୁହେଁ ଅଦିକାରା ହିଲେଏ, ସାମା ତକ୍ତାକି ମାନେ । ଏଲେକିହିଁଏ ତକ୍ତାକି

☆ ୭:୧୯ ୭:୧୯ ୧କର ୩:୧୭; ୨କର ୭:୧୭

ତାନି ଆଙ୍ଗାତି ମୁହେଁ ଅଦିକାରା ହିଲେଏ, ସାମା ତକ୍ତନାକି ମାନେ ।
 * ତାମ୍ବୁ ତାନି ତାଣାଟି ଏଟକା ଆହାନା ଡୟାଆପୁ; ସାମା ପ୍ରାତାନା
 କିହାଲି ଏଚରଦିନା ପାତେକା ରିଆତେରି ରଣ୍ଡିଏ ମନ୍ ଆହାନା
 ଏଟକା ଡୟାଲି ଆଡିଦେରି; ଅଡେ ମୀ ଆଙ୍ଗାତି ଦୁପକାତାକି
 ଡୟାଲି ଆଡାଆକି ସୟତାନ ଏନିକି ମିଙ୍ଗେ ତାୟିପାରି କିୟେଏ,
 ଏଦାଆତାକି ଝେଣ୍ଡେ ଆଣ୍ଡିଆଦୁ ।

୨ ସାମା ନାନୁ ହୁକୁମି ହାନି ଲେହେଁ ଝେହୁଆନାହାଁ ଜାପୁନି
 ଲେହେଁ ଝେସିମାଲ୍ । ୨ ଆତିହୁଁ ଜିକେଏ ଏନିକି ବାରେ ଲକୁ
 ନାଲେହେଁକି ଆନେରି, ଇଦି ନା ଅଣ୍ଡପୁ । ସାମା ଆମ୍ବାଆରି
 ଇଲେତି ଦାନା, ଅଡେ ଆମ୍ବାଆରି ଏଲେତି ଦାନା ମାହାପୁରୁ ତାଣାଟି
 ବେଟାଆହାମାନେରି ।

୮ ସାମା ନାନୁ ବାହା ଆଆତି ଲକୁଇଁ ଇଞ୍ଜା ରାଣ୍ଡେଣିସିକାଣି
 ଝେସିମାଲ୍, ଏଞ୍ଜି ନାଲେହେଁକି ଡୟିଡିହୁଁ ଏଞ୍ଜିସିକାକି ନେହେଁ ।
 ୯ ସାମା ଏଞ୍ଜି ଆଙ୍ଗାତି ଲକୁହାଲି ଆଡିହିଲାର ଇଡିହୁଁ ଏଞ୍ଜି ବାହା
 ଆପୁ; ଇଡିହୁଁ ଆଙ୍ଗା ଲାଗେଏଡି କାମାତା ଝେନିକିହାଁ, ବାହା ଆନାୟି
 ନେହେଁ ।

୧୦ *ସାମା ବାହା ଆଡି ଲକୁଇଁ ନାନୁ ହୁକୁମି ହାହିମାନେସି, ତକ୍ତ ତାନି ତକ୍ତା ତାଣାଟି ଏଟକା
 ଆଆପେ । ୧୧ ସାମା ଏଡି ରଣ୍ଡିଏ ଏଟକା ଆନେ, ଆତିହୁଁ ଏଡି ବାହା
 ଆଆପେ, ଇଞ୍ଜା ତାନି ତକ୍ତାତଲେ ଅଡେ ଆଣ୍ଡାପେ; ଅଡେ ତକ୍ତା ତାନି
 ତକ୍ତନି ହେଲ ହାଆପେସି ।

୧୨ ଏଟକା ତାରାଇଁ ନାନୁ ଝେସିମାଲ୍, ମା ବିତ୍ରା ଆମ୍ବାଆରି
 ତକ୍ତ କ୍ରୀସୁଇଁ ନାମାହିଲୀଆତି ଜିକେଏ ତକ୍ତାତଲେ ଡୟାଲି ମନ୍
 କିତିସାରେ, ଆତିହୁଁ ଏ ତାୟି ଏ ତାଜିନି ହେଲ ହାଆପେସି ।
 ୧୩ ଏଲେକିହୁଁ ଆମିନି ତକ୍ତ ମାହାପୁରୁଇଁ ନାମାଆତି ତକ୍ତାକି ବାହା
 ଆହାମାନେ, ଇଞ୍ଜା ଏଡି ଏଞ୍ଜାଣିତଲେ ଡୟାଲି ମନ୍ କିନେ, ଏଡି ତାନି
 ତକ୍ତାଇଁ ପିହୁଆପେ । ୧୪ ଇଡିହୁଁ ନାମାଆତି ତକ୍ତା ନାମିଡି ତକ୍ତ
 ତାକି ମାହାପୁରୁ ତାଣାଟି ସୁଦୁ ଆହାମାନେସି, ଅଡେ ନାମାଆତି ତକ୍ତ
 ନାମିଡି ତକ୍ତା ତାକି ମାହାପୁରୁ ତାଣାଟି ସୁଦୁ ଆହାମାନେ; ଆଆତିହୁଁ

☆ ୭:୧୦ ୭:୧୦ ମାତି ୫:୩୨; ୧୯:୯; ମାର୍କ ୧୦:୧୧,୧୨; ଲୁକ ୧୭:୧୮

ମନୀ ମନୀରକା ମାସ୍ତକା ଲାଗେଏ ଆଡ଼ତରିମା, ସାମା ନୀଏଁ ଏଞ୍ଜାରି ସୁଦୁଗାଟାରି । ୧୫ ସାମା ନାମାଆ ଗାଟାସି କି ନାମାଆ ଗାଟାୟି ଏଟ୍ଟକା ଆହାଲି ମନ କିତିହଁ ତାମି ମନଲେହେଁ ଏଟ୍ଟକା ଆପାରି; ଇଲେତି ତାଣା ତାୟି କି ତାଙ୍ଗି ଦସ୍ତି ଆହାହିଲାତ; ମାହାପୁରୁ ମିଙ୍ଗେ ହିଡ଼ଡ଼ି ତଲେ ମାଞ୍ଜାଲି ଆଟାମାଞ୍ଜାନେସି । ୧୬ ନୀନୁ ନାମିତି ତକ୍ତି ଆହାନା ନୀ ତକ୍ତିକି ଗେଲ୍ପିନାତି ଆଡ଼ି, ଇଦାଆଁ ପୁଞ୍ଜାହିଲଅତିକି ? ଇଞ୍ଜା ନୀନୁ ନାମିତି ତକ୍ତି ଆହାନା ନୀ ତକ୍ତିନାକି ଗେଲ୍ପିନାତି ଆଡ଼ି, ଇଦାଆଁ ପୁଞ୍ଜାହିଲଅତିକି ?

ମାହାପୁରୁ ଆଟାମାନି ମାଣ୍ଡକି ଲେହେଁ ନୀତିନାୟି

୧୭ ଇତିହଁ ପ୍ରବୁ ଆମ୍ବାଆରାକି ଏନିକଁ ଦାନା ହାହାମାନେସି, ମାହାପୁରୁ ଆମ୍ବାଆରାକି ଏନିକଁ ହାଟାମାନେସି, ଏଞ୍ଜାସି ଏଲେକଁ ତାକାପେସି, ନୀନୁ ବାରେ କୁଲମିତି ଏଲେକିହଁ ଏ ହୁକୁମି ହାହିମାକ୍ । ୧୮ ଆମ୍ବାଆସି ତଲୁ ଦାପିଆହାଁ ହାଟ୍ଟକି ଆହାମାନେସି ? ଏଞ୍ଜାସି ତଲୁ ଦାପି ଆଡ଼ି ସିନାତି ତକ୍ତିଆପେସି; ଆମ୍ବାଆସି ତଲୁ ଦାପି ଆଆନା ହାଟ୍ଟକି ଆହାମାନେସି ? ଏଞ୍ଜାସି ତଲୁ ଦାପି ଆଆପେସି । ୧୯ ତଲୁ ଦାପି ଆନାୟି କି ଆଆଗାଟାୟି କାଜା କାତା ଆଏ, ସାମା ମାହାପୁରୁ ହୁକୁମି ମାନଡ଼ି ଆନାୟି କାଜା କାତା । ୨୦ ବାରେ ଜାଣାକ୍ ଏନିକଁ ମାହାପୁରୁ ହାଟାମାନେସି ଏଲେକଁ ମାଣ୍ଡେସି । ୨୧ ମୀରୁ ହଲିୟାଙ୍ଗା ଆହାମାଟାଟି ହାଟ୍ଟକି ଆହାମାଞ୍ଜେରି ? ଅଣ୍ଡାଆଦୁ; ସାମା ଗେଲ୍ପିଆୟାଲି ଆଡ଼ିଦେରି ଆତିହଁ ଗେଲ୍ପି ଆୟାଲି ପାରୁ ପାରାଦୁ । ୨୨ ଆମ୍ବାଆସି ହଲେଏସି ଆହାଁ ପ୍ରବୁ ତାଣା ହାଟ୍ଟକି ଆହାମାନେସି, ଏଞ୍ଜାସି ପ୍ରବୁତି ଗେଲ୍ପି ଆଡ଼ାସି; ଏଲେକିହଁ ଏ ଆମ୍ବାଆସି ଗେଲ୍ପିଆହାଁ ହାଟ୍ଟକି ଆହାମାନେସି ଏଞ୍ଜାସି କ୍ରୀସୁତି ହଲେଏସି । ୨୩ ମୀରୁ ହାରେକା ଦାରାତଲେ କଡ଼ି ଆହାମାଞ୍ଜେରି; ମାଣ୍ଡସିୟାତି ହଲିୟାଙ୍ଗାତେରି ଆଆଦୁ । ୨୪ ତାୟିୟା ଅଡ଼େ ତାଙ୍ଗିସ୍ତାତେରି, ମାହାପୁରୁ ମିଙ୍ଗେ ହାଟାଟାଟି ମୀରୁ ଏନିକଁ ମାଟେରି ଏଲେଆହଁ ଏ ମାହାପୁରୁ ତଲେ ଡ଼ୟିନାୟି ମାନେ ।

ବୀହା ଆଆତି ଲକୁ ଇଞ୍ଜା ରାଣ୍ଡେଶିସିକା କାତା

୨୫ ଡାଆସିକା କାତା, ନାନୁ ପ୍ରବୁ ତାଣାଟି ଏନ୍ଦି ହୁକୁମି ବେଟା ଆହାହିଲଅଁ; ସାମା ପ୍ରବୁତି କାର୍ମାଟି ନାମୁଗାଟାସି ଆହାନା ନା ଅଣ୍ପୁତା ଖେସିମାଞ୍ଜାଇଁ ।

୨୬ ନାନୁ ଅଣ୍ପିମାଞ୍ଜାଇଁ, ମାଣ୍ସି ଏନ୍ଦିକଁ ମାନେସି, ନୀର୍ବିତି କସ୍ତ ବାଦା ତାକି ଏଲେକିହଁ ଏ ମାନାୟି ନେହେଁ । ୨୭ ନାନୁ ତକ୍ତି ତଲେ ଦସ୍ପି ଆହାମାଞ୍ଜି ? ଆତିହଁ ପିସ୍ପି ଆହାଲି ଅଣ୍ପାଆନି, ଇଞ୍ଜା ନାନୁ ତକ୍ତି ତାଣାଟି ପିସ୍ପି ଆହାମାଞ୍ଜି ? ଆତିହଁ ତକ୍ତିନି ଇଟାଲି ଅଣ୍ପାଆନି । ୨୮ ସାମା ନାନୁ ବାହା ଆହାମାଞ୍ଜି, ଆଡିଜିକେଏ ପାପୁ କିହାହିଲଅତି; ଅଡେ ଡାଆପଦା ବାହା ଆହାମାନେ, ଆଡିଜିକେଏ ଏଡି ପାପୁ କିହାହିଲେଏ, ଆଡିଜିକେଏ ଇଲେତି ଲକୁ ଆଙ୍ଗାତା ହାରେକା କସ୍ତ ବେଟାଆନୁ, ଅଡେ ମାରୁ ଏମ୍ପାଟି ଏନ୍ଦିକଁ ଗେଲ୍ପି ଆଡେରି ଇଦି ନା ଅଣ୍ପୁ ।

୨୯ ସାମା ଏ ତାୟିୟାଁ ଅଡେ ତାଙ୍ଗିସ୍ତାତେରି ନା ଅଣ୍ପୁ ଇଦି, ଦିନା ତାଗେ ଏଦାତେୟିଏ, ଏଦାଆଁତାକି ଆମ୍ବାଆରାକି ତକ୍ତି ମାନେ, ଏଞ୍ଜାସି ତକ୍ତି ହିଲାଆଲେହେଁ ମାଣ୍ମେସି । ୩୦ ଅଡେ ଆମ୍ବାଆରି ତ୍ରୀହି ମାନେରି, ଏଞ୍ଜାରି ତ୍ରୀହି ହିଲାଆ ଲକୁ ଲେହେଁ ଆପେରି; ଅଡେ ଆମ୍ବାଆରି ରାହାଁ କିହିମାନେରି, ଏଞ୍ଜାରି ରାହାଁ କିହି ହିଲାଆ ଲକୁ ଲେହେଁ ଆପେରି; ଇଞ୍ଜା ଆମ୍ବାଆରି କଡିନେରି ଏଞ୍ଜାରି ଅଦିକାରା ବେଟାଆଆତି ଲେହେଁ ଆପେରି; ୩୧ ଅଡେ ଆମ୍ବାଆରି ଦାର୍ଡିତି ଦିଶ୍ପୁ ଲେମ୍ବିମାନେରି ଏଞ୍ଜାରି ଲେମ୍ବାଆଗାଟି ଲକୁ ଲେହେଁ ଆପେରି; ଏଦାଆଁତାକି ଇତିହଁ ଇ ଦାର୍ଡିତି ଖାଣା ତିରିମ୍ବିହି ମାନେ ।

୩୨ ସାମା ମାରୁ ଏନ୍ଦିକଁ ଅଣ୍ପଅତେରି ଏଡି ନା ଅଣ୍ପୁ, ଆମ୍ବାଆସି ବାହା ଆଆତାସି ଏଞ୍ଜାସି ଏନ୍ଦିକଁ ପ୍ରବୁଇଁ ରାହାଁ କିଞ୍ଜିକିହାଲି ଖାର୍ଇ ପ୍ରବୁତି କାମା ଅଣ୍ପିନେସି; ୩୩ ସାମା ଆମ୍ବାଆସି ବାହା ଆହାମାନେସି ଏଞ୍ଜାସି ଏନ୍ଦିକଁ ତାନି ତକ୍ତିନି ରାହାଁ ଗାଟାସି ଆନେସି, ଏଦାଆଁତାକି ଦାର୍ଡିତି କାତା ଅଣ୍ପିନେସି ଇଞ୍ଜା ତାନି ମନ ବାଗା ଆନେ । ୩୪ ବାହା ଆଆତି ଇୟାସିକା ଅଡେ ଡାଆସିକା ଆଙ୍ଗା ଇଞ୍ଜା ଜୀଞ୍ଜୁତା ସୁଦୁ ଆହାଲି ପ୍ରବୁତି କାତା ଆସାନା ଅଣ୍ପିନୁ; ସାମା ଆମ୍ବାଆୟି ବାହା ଆହାମାନେ ଏଡି ଏନ୍ଦିକଁ ଜାହାରା ତକ୍ତାଇଁ ରାହାଁ କିୟାଲି ଆଡିନେ, ଏଦାଆଁତାକି ଦାର୍ଡିତି କାତା ଅଣ୍ପିନେ ।

୩୫ ଇ କାତା ନାନୁ ମୀ ନେହେଁତାକି ଝେସିମାଞ୍ଜାଇଁ, ମିଙ୍ଗେ କସ୍ତୁ ହୀନି ମେରା ତଲେ ଦସ୍ତି ଆହାଲି ଝେସିମାଞ୍ଜଅଁ, ସାମା ମୀରୁ ଏନିକିଁ ମାନି କିହାଁ ରଣ୍ଡିଏ ମନତଲେ ପ୍ରବୁ ତାଣା ଡୟିଦେରି, ଏଦାଆଁତାକି ଝେସିମାଞ୍ଜାଇଁ ।

୩୬ ସାମା, ଆମ୍ବାଆସି ତାଙ୍ଗେତାକି ରାସ୍ପପଆଡ଼ି ମାଙ୍ଗାନି ଡାଆବେଲା ରାଡେତୟିଏ ଇଞ୍ଜିଁ ଅଶ୍ପିନେସି, ଅଡେ ଏଞ୍ଜାସି ମୁର୍ସାନା ମାଞ୍ଜାଲି ଆଡାଆସାରେ ଅଡେ ତାଙ୍ଗେ ଲଡାଆରେ ଆତିହଁ ତାନି ମନତା ଏନାୟି ମାନେ ଏଲେଆହଁ ବାହା ଆନାୟି ମାନେ, ଏମ୍ବାଆଁ ପାପୁ ହିଲେଏ, ଏଦାଆଁତାକି ଏଞ୍ଜି ବାହା ଆପୁ । ୩୭ ସାମା ଆମ୍ବାଆସି ହିୟାତା ତାରି ମାନେସି, ଅଡେ ବାହା ଆହାଲି ମନ କିଅସି ଇଞ୍ଜା ଆମ୍ବାଆସି ତାନି ମନତି ଲକହାଲି ଆଡିନେସି ଅଡେ ଏଞ୍ଜାସି ତାନି ମନତା ଏନାଆଁ କିହାଲି ଅଶ୍ପାମାନେସି ଆତିହଁ ଏଞ୍ଜାସି ତାଙ୍ଗେ ରାସାମାନି ଡାଆ ପଡାଇଁ ବାହା ଆଆତଁ ନେହେଁ । ୩୮ ଏଦାଆଁତାକି ଆମ୍ବାଆସି ତାଙ୍ଗେ ରାସାମାନି ଡାଆ ମାଙ୍ଗାନି ବାହା କିନେସି ଏଞ୍ଜାସି ନେହଁ କିନେସି, ଅଡେ ଆମ୍ବାଆସି ବାହା ଆଅସି ଏଞ୍ଜାସି ଏଦାଆଁ କିହାଁ ହାରେକା ନେହଁ କିନେସି ।

୩୯ ବାହା ଆଡି ତକ୍ତି ତାନି ତକ୍ତା ଜୀଝୁ ମାନି ପାତେକା ଦସ୍ତି ଆହା ଡୟିନେ; ସାମା ତକ୍ତା ହାଡିସାରେ ଏ ତକ୍ତି କ୍ରୀସ୍ତ ତାଣା ନାମାମାନି ଆମ୍ବାଆରାଇଁ ମନ ଏଞ୍ଜାଣାକି ବାହା ଆୟାଲି ଆଡିନେ । ୪୦ ସାମା ନା ଅଶ୍ପପୁତା, ଏଦି ଏନିକିଁ ମାନେ ଏଲେକିହଁ ଏ ଡୟିତିହଁ ହାରେକା ରାହାତଲେ ଡୟିନେ, ଇଦି ମାହାପୁରୁ ଜୀଝୁତି ହେଲ ଇଞ୍ଜିଁ ନାନୁ ଅଶ୍ପିମାଇଁ ।

୮

ପେଣ୍ଡାକା ବମାୟାକି ଡାକାମାନି ରାନ୍ଦାତି କାତା

୧ ପେଣ୍ଡାକା ବମାୟାକି ଡାକାମାନି ବଗୁଡି କାତା ନାନୁ ଝେହନାୟି ଇଦି, “ବାରେତାକି ବୁଦି ମାନେ” ଇଞ୍ଜିଁ ମୀରୁ ଝେସିମାଞ୍ଜେରି, ଏଦାଆଁ ମାମୁ ପୁଞ୍ଜାମାନମି । ବୁଦି ତାହାରା କିଞ୍ଜିକିୟାନେ, ସାମା ଜୀଝୁନାୟି କାଲୁଞ୍ଜି କିୟାନେ । ୨ ଆମ୍ବାଆସି ଏନି କାତାତା ଜିକେଏ ନାନୁ ପୁଞ୍ଜାମାଇଁ ଇଞ୍ଜିଁ ଅଶ୍ପିନେସି, ଆତିହଁ ଏଞ୍ଜାଣାକି ଏନିକିଁ

ପୁନାୟିମାନେ, ଏଞ୍ଜାସି ନୀଏଁ ପାତେକା ଏଲେକ୍ ପୁଞ୍ଜାହିଲଅସି ।
 ୩ ସାମା ଆମ୍ବାଆସି ମାହାପୁରୁଇଁ ଜୀଞ୍ଜୁ ନରେସି, ଏଞ୍ଜାଣାଇଁ ମାହାପୁରୁ
 ପୁଞ୍ଜାମାନେସି ।

୪ ଏଦାଆଁତାକି ପେଶକା ବମାୟାକି ଡାକାମାନି ବଗୁତି ତିନି କାତା
 ମାର ପୁଞ୍ଜାମାନାୟି, ଦାରୁତିତା ପେଶକା ଇଞ୍ଜିହିଁ ଏନାଇ ହିଲାଇ,
 ଅଡେ ରଣ୍ଡିଏ ମାହାପୁରୁ ପିସ୍ପେ ଅଡେ ରଅସି ହିଲଅସି । ୫ ଇତିହିଁ
 ଲାକପୁରୁ ଆପେ କି ଦାରୁତିତା ଆପେ, ଆମ୍ବାଆରାଇଁ ମାହାପୁରୁ
 ଇନେରି, ପେଶକା ମାତିହିଁ ଜିକେଏ ସାତେଏ ହାରେକା “ପେଶକା”
 ଅଡେ ହାରେକା “ପୁରୁୟା” ମାନୁ, ୬ ଆଡ଼ିଜିକେଏ ମାଙ୍ଗେତାକି ରଣ୍ଡିଏ
 ମାହାପୁରୁ ଇତିହିଁ ଏ ଆବା ତାଣାଟି ବାରେ ଗାଡ଼ି ଆହାମାନେ, ଇଞ୍ଜା
 ମାର ଏଞ୍ଜାଣି ତାକି ନୀତାମାନାୟି; ଇଞ୍ଜା ରଣ୍ଡିଏ ପ୍ରବୁ ଇତିହିଁ ଜୀସୁ
 କ୍ରୀସ୍ତ, ଏଞ୍ଜାଣି ତାଣାଟି ବାରେ ଗାଡ଼ି ଆହାମାନେ, ଅଡେ ମାର ଏଞ୍ଜାଣି
 ତାଣାଟି ନୀତାମାନାୟି ।

୭ ଆଡ଼ିଜିକେଏ ବାରେତାକି ଇ ବୁଦି ହିଲେଏ; ସାମା ଏଚେକା
 ଲକୁ ନୀଏଁ ପାତେକା ପେଶକା ମାନୁ ଇଞ୍ଜି ଅଶ୍ପାମା ପେଶକା
 ବମାୟାକି ଡାକାମାନି ବଗୁ ତିନେରି, ଇଞ୍ଜା ଏଞ୍ଜାରି ଅଶ୍ପୁତି ବାଡ଼ୁୟୁ
 ଉଣା ମାନାକି ଦହଗାଟାରି ଆନେରି । ୮ ସାମା ତାନି ରାହା ମାଙ୍ଗେ
 ମାହାପୁରୁ ନକିତା ନେହିଁ କି ଲାଗେଏ କିୟେଏ; ତିନାଆତିହିଁ ମା
 ଏନାୟି ନସ୍ତ ଆଏ ଅଡେ ତିତି ସାରେ ମାଙ୍ଗେ ଏନି ଲାବା ଆଏ ।

୯ ସାମା ଜାଗ୍ରାତା, ନଲେ ମୀ ତାଣା ମାନି ଅଦିକାରା ନାମୁତା ବାଡ଼ୁୟୁ
 ହିଲଆ ଗାଟାରାକି କସ୍ତ ବାଦା ହୀନାୟି ଆନେ । ୧୦ ବୁଦି ଗାଟାତେରି
 ମୀରୁ, ମିଙ୍ଗେ ଆମ୍ବାଆସି ପେନୁତି ଦେଞ୍ଜୁଡ଼ି ବଜିତା କୁଗାମାନାଣି
 ମେସ୍ତାତିହିଁ, ଏଞ୍ଜାସି ନାମୁତା ଉଣା ମାତିହିଁ, ତାନି ଅଶ୍ପୁତି ବାଡ଼ୁୟୁ
 ଉଣା ମାନାକି ପେଶକା ବମାୟାକି ଡାକାମାନି ବଗୁ ତିଞ୍ଜାଲି ସାସା
 ଆଅସି କି ? ୧୧ ଇଞ୍ଜା ଆମିନି ବାଡ଼ୁୟୁ ହିଲଆ ନାମିତି ତାୟି କି ତାଜି
 ତାକି କ୍ରୀସ୍ତ ହାଡେସି, ଏଞ୍ଜାସି ନୀଏଁ “ବୁଦି” ତଲେ ନାସା ଆହିମାନେସି
 । ୧୨ ଇଲେକିହିଁ ମୀ ତାଣା ମାନି ନାମିତି ତାୟିୟାଁ କପାଟି ପାପୁ କିହାଁ
 ଇଞ୍ଜା ଏଞ୍ଜାରି ବାଡ଼ୁୟୁ ହିଲଆ ଅଶ୍ପୁତି କସ୍ତ ହୀହାନା ମୀ କ୍ରୀସ୍ତତି
 କପାଟି ପାପୁ କିହିମାଞ୍ଜେରି । ୧୩ ଇଦାଆଁତାକି ତିନି କାଦି ନା ତାୟିକି

କସ୍ତ ହନେ, ଆତିହ୍ନି ନା ତାୟି ଏନିକ୍ ନା ତାଣାଟି କସ୍ତ ଆଅସି, ଏଦାଆଁତାକି ନାନୁ ଏଚେଲା ଉଜ୍ଜା ତିନଅଁ ।



ପାଣ୍ଡୁଞ୍ଜି ଆଡ଼ାରି ଅଦିକାରା ଅଡ଼େ ଦାୟିପତି

୧ ନାନୁ ନା ମନତଲେ ମାଞ୍ଜାଲି ଆଡ଼ଅଁ ? ନାନୁ ର ପାଣ୍ଡୁଞ୍ଜି ଆଡ଼ାଡ଼େଏଁ ଆଏ ? ନାନୁ ଏନାଆଁ ମା ପ୍ରବୁ ଜୀସୁଇଁ ମେସାହିଲଅଁ ? ମୀରୁ କି ମାହାପୁରୁ ତାଣା ନା କିତି କାମାତି ପାଡ଼େୟି ଆଏ ? ୨ ନାନୁ ଏଟକାତାରି ତାଣା ପାଣ୍ଡୁଞ୍ଜି ଆହାହିଲାଆତି ଜିକେଏ, ମିଙ୍ଗେତାକି ନାନୁ ସାତେଏ ପାଣ୍ଡୁଞ୍ଜି ଆହାମାନାତେଏଁ, ଇଚିହ୍ନି ପ୍ରବୁ ତାଣା ମୀରୁ ନା ପାଣ୍ଡୁଞ୍ଜିଆହାମାନି ପାଣାତା ଝେଟାମାନି ବୁଟୁ ମୁଦ୍ରା ଲେହେଁ ଆହାମାଞ୍ଜେରି ।

୩ ନାଙ୍ଗେ ନୀହାୟି କିୟାନାରିକି ନାନୁ ଝେଣ୍ଡେ ଝେସ୍ତାନି କାତା ଇଦି । ୪ ନା କାମାତାକି ତିଞ୍ଜା ଉଣ୍ଡାଲି ମାଙ୍ଗେ ଅଦିକାରା ହିଲେଏ ? ୫ ଅର ପାଣ୍ଡୁଞ୍ଜି ଆହାମାନାରି ପ୍ରବୁତି ତାୟିୟାଁ ଅଡ଼େ କେପାଁ* ଲେହେଁ କ୍ରୀସ୍ତାନା ତାଙ୍ଗିନି ବୀହା ଆହାଁ ଏ ଇୟାନି ତଲେ ରେଜାଲି ମାଙ୍ଗେ ଅଦିକାରା ହିଲେଏ କି ? ୬ ଅଡ଼େ ଜୀଞ୍ଜୁତା ନୀତାଲିତାକି କାମାତି ପିସାଲି ନାଙ୍ଗେ ଅଡ଼େ ବର୍ନବାତି ଅଦିକାରା ହିଲେଏ କି ? ୭ ର ଜୁଜୁ କିନାସି ଜୁଜୁତା ମାନି ବେଲା ତାନୁଏ ତାଙ୍ଗେତାକି କାରୁଁ କିନେସିକି ? ଇଞ୍ଜା ଆମ୍ବାଆସି ଅଙ୍ଗୁରି ବାଡ଼ା କିହାଁ ଏମ୍ବାତି ପାଡ଼େୟି ତିନଅସି କି ? ଇଞ୍ଜା ର ଗଡ଼ ତୁନି ମାନ୍ଦାତି ପାଲୁ ଗହଅସି କି ?

୮ ନାନୁ ମାଣ୍ଡସି ଆହାଁ ଇ ବାରେ କାତା ଝେସିମାଞ୍ଜାଇଁ ? ଇଞ୍ଜା ସାସ୍ତ୍ରେରି ଜିକେଏ ଇ ବାରେ କାତା ଝେସିମାଞ୍ଜେଏ କି ? ୯ ଇଚିହ୍ନି ମସାତି ମୋରାତା ଇଲେଇଞ୍ଜି ରାସ୍କି ଆହାମାନେ, “ନପି ମାନି କଡ଼ିତି ଗୁଡ଼ିତା କଡ଼ା ଦହଆଦୁ,” ମାହାପୁରୁ ଝାରଇ ଏ କଡ଼ିତି ଅଣ୍ଡପିମାନେସି କି ? ୧୦ ଏଞ୍ଜାସି ଇଦାଆଁ ମାଙ୍ଗେତାକି ଝେସା ମାଞ୍ଜଅସି ? ହାଅ, ମାଙ୍ଗେତାକି ଇଦି ରାସ୍କି ଆହାମାନେ, ଏନାଆଁତାକି ଇଚିହ୍ନି ଆମ୍ବାଆସି ତାସା କିନେସି ଆସା ତଲେ ତାସା କିନାୟିମାନେ, ଅଡ଼େ ନପି ନାସି ଗାଡ଼ି ବାଗା ବେଟାଆହାଲି କଡ଼ା ଦହନେସି । ୧୧ ମାମ୍ବୁ

* ୯:୫ ୯:୫ ପିତର ☆ ୯:୯ ୯:୯ ଉତିମ ୫:୧୮

ନିଈତାକି ନେହଁ ଜୀଝୁତି ବିଚା ମାଟା ମାଟାମାନମି, ଅଡ଼େ ମୀ ତାଣାଟି ଈ ଦାରତିତି ତାସା ଦାଡ଼ିହଁ ଏଦି ଏନି କାଜା କାତା ଆଏକି ? ୧୨ ଏଟକା ଲକୁ ମୀ ତାଣାଟି ବାଗା ବେଟାଆହାଲି ଅଦିକାରା ମାଟିହଁ, ଏଦାଆଁ କିହଁ ଆଗାଡ଼ା ବେଟାଆହାଲି ମା ଅଦିକାରା ହିଲେଏ କି ? ଆଡ଼ିଜିକେଏ ମାମ୍ମୁଏ ଅଦିକାରା ଲେମ୍ବା ହିଲଅମି । ସାମା ଏନିକଁ ମାମ୍ମୁକ୍ରୀସ୍ତତି ନେହଁ କାରୁ ଝେକ୍ କିନି କାମାତା ଏନି ବାଦା ଖାଆପେ ଇଞ୍ଜଁ ବାରେ ଅରୁହିମାନମି ୧୩ ଆମ୍ବାଆରି ଦେଝୁଡ଼ିତା ପୂଜା କିନାରି ଏଝାରି ଦେଝୁଡ଼ିତି ରାନ୍ଦା ବେଟାଆନେରି, ଇଞ୍ଜା ଆମ୍ବାଆରି ପୂଜା କିନାରି ପୂଜା କିହାଲି ପୂଜା ପିଣ୍ଡାତା ଇତିତି ବଗୁଡ଼ି ବାଗା ବେଟାଆନେରି, ଇଞ୍ଜଁ ମୀରୁ ପୁଞ୍ଜାହିଲଅଡେରି କି ? ୧୪ ☆ଏଲେକିହଁଏ ଆମ୍ବାଆରି ନେହଁ କାରୁଡ଼ି ଝେକ୍ ହି ମାନେରି, ଏଝାରି ନେହଁ କାରୁ ଝେକ୍ ନି ତାଣାଟିଏ ନୀତିନେରି, ଈ କାତା ପ୍ରବୁ ହୁକୁମି ହାହାମାନେସି ।

୧୫ ସାମା ନାନୁ ଈ ବାରେ ଏନାଆଁଖା ଲେମ୍ବାହିଲଅଁ, ଅଡ଼େ ନାଈତାକି ଏଲେ କିଝିଆପେ, ଏଦାଆଁତାକି ରାଡ଼ିମାଞ୍ଜଅଁ; ଇତିହଁ ଆମ୍ବାଆରି ନା ନେହଁ ବଡ଼ପଣତି ଉଜେଏ କିନି କିହଁ ନାନୁ ହାହାହାନାୟି ନେହେଁ । ୧୬ ଇତିହଁ ନାନୁ ନେହଁ କାରୁ ଝେକ୍ ଇ, ଏମ୍ବାଆଁ ନା ବଡ଼ପଣ ଆନାୟି ହିଲେଏ, ଏନାଆଁତାକି ଇତିହଁ ଏଦାଆଁ କିହାଲି ହୁକୁମି ବେଟାଆହାମାଇଁ, ଇଞ୍ଜା ନାନୁ ନେହଁ କାରୁ ଝେକ୍ ଆଡେଏଁ ଇତିହଁ ନାନୁ ଏଡେକା ଡଣ୍ଡ ବେଟାଆନାଡେଏଁ । ୧୭ ଇତିହଁ ନାନୁ ଜାହାରା ମନତଲେ ଈ କାମା କିଇଁ, ଆଡ଼ିହଁ ନାଈତାକି ଦାନା ମାନେ; ସାମା ନାନୁ ନା ମନତଲେ କାମା କିଆଡ଼ିହଁ ଜିକେଏ ମାହାପୁରୁ ନାଈତେ ସେବାକିନି କାମାତି ବନ୍ତୁ ହେରପା ମାଞ୍ଜାନେସି । ୧୮ ଆଡ଼ିହଁ ନା ଦାନା ଏନାୟି ? ଏଦି ଇଦି ନାନୁ ନା ନେହଁ କାରୁତା ମାନି ଅଦିକାରା ଲେମ୍ବାଆନା ନେହଁ କାରୁ ଝେସି ଝେସି ଏ ନେହଁ କାରୁଡ଼ି ଉଜେଏ ଝେକ୍ ଇ ।

୧୯ ନାନୁ ଆମ୍ବାଆରି ହଲେଏଣା ଆଆଡ଼ି ଜିକେଏ, ଏନିକଁ ନାନୁ ହାରେକା ଗାଡ଼ି ଲକୁଣି ବେଟାଆହାଲି ଆଡ଼ିଇଁ, ଏଦାଆଁତାକି ନାନୁ

☆ ୯:୧୪ ୯:୧୪ ମାତି ୧୦:୧୦; ଲୁକ ୧୦:୭

ଜାହାରାଇଁ ବାରେଡି ହଲେଏସି କିତେଏଁ । ୨୦ ଏନିକ୍ ନାନୁ ଜୀହୁଦିୟାଣି କ୍ରୀସ୍ତ ତାକି ଜୀଣା ଆହାଲି ଆଡ଼ିଇଁ, ଏଦାଆଁତାକି ଜୀହୁଦି ଲକୁ ନକିତା ନାନୁ ଜୀହୁଦି ଲେହେଁ ଆହିମାଇଁ; ଏନିକ୍ ମସାତି ଫେରାତା ଦସପି ଆହାମାନାରାଇଁ ଜୀଣା ଆହାଲି ଆଡ଼ିଇଁ, ଏଦାଆଁତାକି ନାନୁ ଫେରାତା ଦସପି ଆଆତି ଜିକେଏ ଫେରାତା ଦସପି ଆଡ଼ି ଲକୁଲେହେଁ ଆଡେଏଁ । ୨୧ ଏନିକ୍ ନାନୁ ମସାତି ଫେରା ପୁନାଆତି ଏଟକା କୁଡ଼ାତି ଲକୁଣି ବେଟାଆହାଲି ଆଡ଼ିଇଁ, ଇଦାଆଁତାକି ନାନୁ ମାହାପୁରୁତି ଫେରାତା ହିଲାଆ ଲକୁ ଆଆନା କ୍ରୀସ୍ତତି ଫେରା ମାନୁଡ଼ି ଆଡ଼ିଜିକେଏ ମସାତି ଫେରାତା ହିଲାଆ ଲକୁ ନକିତା ମସାତି ଫେରାତା ହିଲାଆ ଲକୁଲେହେଁ ଆଡେଏଁ । ୨୨ ଏନିକ୍ ନାନୁ ବାଡ଼ୁୟୁ ହିଲାଆଗାଟାରାଇଁ ଜୀଣା ଆହାଲି ଆଡ଼ିଇଁ, ଏଦାଆଁତାକି ବାଡ଼ୁୟୁ ହିଲାଆ ଗାଟାରି ନକିତା ବାଡ଼ୁୟୁ ହିଲାଆଲେହେଁ ଆଡେଏଁ; ଏନିକ୍ ଜିକେଏ ନାନୁ ଏତର ଜାଣାଇଁ ଗେଲ୍ପାଲି ଆଡ଼ିଇଁ, ଇଦାଆଁତାକି ବାରେ ଲକୁ ଏନିଲେହେଁତାରି ନାନୁ ଏଝାରିଲେହେଁ ଆଡେଏଁ ।

୨୩ ନାନୁ ଏନିକ୍ ନେହଁ କାରୁତି ବରତା ଆଣ୍ଡାଲି ଆଡ଼ିଇଁ, ଏଦାଆଁତାକି ନାନୁ ନେହଁ କାରୁତାକି ବାରେ କିଇଁ । ୨୪ ଆମ୍ବାଆରି କାହିନି ତାଣା ହଣ୍ଡନେରି ଏଝାରି ବାରେଜାଣା ହଣ୍ଡନେରି ସାତା, ସାମା ରଅସିଏ ଜୀଣା ଆହାଁ ଦାନା ବେଟା ଆନେସି, ଇଦାଆଁ ମୀରୁ ପୁଞ୍ଜାହିଲଅତେରି ? ମୀରୁ ଏନିକ୍ ଦାନା ବେଟାଆଡେରି ଏଦାଆଁତାକି ଏଲେକ୍ ହଣ୍ଡୁ । ୨୫ ଆମ୍ବାଆସି ବାଡ଼ହାରା ତଲେ କାହିନି ତାଣା ଆଣ୍ଡିନେସି ଏଝାସି ବାରେ ନେହଁକ୍ ଜାପିନେସି; ଏଝାରି ଗାଡ଼େକେଏ ନାସଡ଼ି ଆନି ଟପେରି ବେଟାଆହାଲି କାହିମାନେରି; ସାମା ମୀରୁ ଏଚେଲାଞ୍ଜା ନାସା ଆଆଗାଟି ଟପେରି ବେଟାଆହାଲି ଏଲେ କିନ । ୨୬ ଏଦାଆଁତାକି ନାନୁ ହଟିମାଇଁ, ସାମା ଗୁରି ହିଲାଆ ତାଣା ଆଏ, ନାନୁ ମୁଟିତଲେ କୁଡ଼କି ଆନି ଦୁକୁ କିହିମାଇଁ, ସାମା ଝାରଇ ଗାଲିତି ଝେନି ଲକୁଲେହେଁ ଆଏ । ୨୭ ଏଟକା ଲକୁତାଣା ନେହଁ କାରୁ ଝେସିହଁ ନାନୁ ଏନିକ୍ ଅପାଆ ଗାଟାତେଏଁ ଆଅଁ ଏଦାଆଁତାକି ନା ଆଜ୍ଞାତି କସ୍ତ ବାଦା ହୀହାନା ଲକୁହିମାଇଁ ।

୧୦

ପେଶକା ବମାୟାଁ ସେବାଟି ଜାଗ୍ରାତା କିନାୟି

୧ ଇତିହାସ ଏ ତାୟିୟାଁ ଅଡ଼େ ତାଜିସ୍ତାତେରି ମା ଆକୁ ଆବାୟାଁ ବାରେ ଦୁନ୍ଦା ଡ଼ଇକା ମାଚେରି । ୨ ଅଡ଼େ ବାରେଜାଣା ସାମଦୁରି ବିଭ୍ରାଟି ହାଚେରି, ଇଞ୍ଜା ବାରେଜାଣା ଦୁନ୍ଦା ଅଡ଼େ ସାମଦୁରିତା ମସା ତାଣାଟି ବାପ୍ତିସ୍ତା* ଅଡ଼େରି । ୩ ଅଡ଼େ ଏଞ୍ଜାରି ବାରେଜାଣା ରଣ୍ଡିଏ ଜୀଞ୍ଜୁତି ରାନ୍ଦା ତିଚେରି । ୪ ଅଡ଼େ ବାରେଜାଣା ରଣ୍ଡିଏ ମାହାପୁରୁ ହୀତି ଜୀଞ୍ଜୁତି ଏୟୁ ଗସ୍ତେରି, ଇତିହାସ ଏଞ୍ଜାରିତଲେ ହାଜିମାଟି ମାହାପୁରୁ ହୀତି ଜୀଞ୍ଜୁତି ପାକା ଖାଲିତି ଏୟୁ ଗସ୍ତେରି ଏ ପାକା ଖାଲି କ୍ରୀସ୍ତ, ୫ ଆଡ଼ିଜିକେଏ ଏଞ୍ଜାରି ବିଭ୍ରାଟି ହାଚେକା ଲକୁତାଣା ମାହାପୁରୁତି ରାହାଁ ହିଲାଆତେ, ଇଞ୍ଜା ଏଞ୍ଜାରି ଲକୁ ହିଲାଆ ଚାୟୁତା ହାହାହାଚେରି, ଇ ବାରେ କାତା ମୀରୁ ପୁନାଆନା ମାଞ୍ଜୁ ଇଞ୍ଜା ନା ମନ ହିଲେଏ ।

୬ ଏଞ୍ଜାରି ଏନିକାଁ ଲାଗେଏ ପଲେଏତାଣି ତାକି ଜୁପକା ଆହାମାଚେରି, ଏଲେକାଁ ମାର ଏଲେତି ଜୁପକା ଆଆୟି, ଏଦାଣିତାକି ଇ ବାରେ କାତା ମାଜେତାକି ପୁଣ୍ଡିକିନାୟି ଆହାମାନେ । ୭ ଏନିକାଁ ଏଞ୍ଜାରି ବିଭ୍ରାଟି ଏଚରଜାଣା ପେଶକା ପୂଜା କିନାରି ଆଡ଼େରି, ଏଲେକାଁ ମୀରୁ ପେଶକା ପୂଜା କିନାତେରି ଆଆଦୁ; ଏନିକାଁ ରାସ୍ତକି ଆହାମାନେ, “ଲକୁ ତିଞ୍ଜା ଉଣ୍ଡାଲି କୁରିତେରି, ଅଡ଼େ ଏନ୍ଦିହାଁ କିହାଲି ନିଜିତେରି ।” ୮ ଏନିକାଁ ଏଞ୍ଜାରିତାଣା ଏଚରଜାଣା ଦାରିକାମା କିହାନା ରଣ୍ଡିଏ ନେରୁ କଡ଼େ ତୀନି ମାଣା ଲକୁ ହାଡ଼େରି, ଏଲେକାଁ ମାର ଦାରିକାମା କିଆପ । ୯ ଏନିକାଁ ଏଞ୍ଜାରି ବିଭ୍ରାଟି ଏଚରଜାଣା ପ୍ରବୁଇଁ ତାୟିପାରି କିହାଁ ରାରୁ ତଲେ ହାଡ଼େରି, ଏଲେକାଁ ମାର ପ୍ରବୁଇଁ ତାୟିପାରି କିଆପ । ୧୦ ଏନିକାଁ ଏଞ୍ଜାରି ବିଭ୍ରାଟି ଏଚରଜାଣା ବାଡ଼ା କିହାଲିଏ ନାସାକିନି ଦୁଡୁ କେୟୁଟି ହାଡ଼େରି, ଏଲେକାଁ ମୀରୁ ବାଡ଼ା କିଆଦୁ ।

୧୧ ଇ ବାରେ ପୁଣ୍ଡିକିନିଲେହେଁ ଏଞ୍ଜାରାକି ଆଡ଼େ, ଅଡ଼େ ଆମ୍ବାଆରି ବେଲାତା ଜୁଗୁରାନ୍ଦି ଦିନା ଏଜିମାଞ୍ଜାନେ, ଏଲେକିହାଁ ମାର ମା ସେଡନା ତାକି ଏ ବାରେ ରାସ୍ତକି ଆହାମାନେ ।

* ୧୦:୨ ୧୦:୨ମୁଞ୍ଜନାୟି

୧୭ ଏଦାଆଁତାକି ଆମ୍ବାଆସି ନାନୁ ତୀରି ଗାଟାତେଏଁ ଇଞ୍ଜିହିଁ ଅଣ୍ଠି ପାନାସି, ଏଞ୍ଜାସି ଏନିକିଁ ତରଗଅସି, ଏଦାଆଁତାକି ଏଞ୍ଜାସି ଜାଗ୍ରାତା ଆପାସି । ୧୮ ମାଣ୍ଡିତାକି ଏନିଲେହେଁତ ତାୟିପାରି କିନାୟି କସ୍ତୁଗାଟାୟି ଆଏ, ଏଦାଆଁ ପିସ୍ପେ ମିଙ୍ଗେତାକି ଏଟକାତି ତାୟିପାରି କିନାୟି ଆହା ହିଲେଏ, ସାମା ମାହାପୁରୁ ଟିକାଣାତାସି, ଏଞ୍ଜାସି ମିଙ୍ଗେ ଏନି ଆଡାଆଗାଟି ତାୟିପାରି କିହାଲି ହିୟଅସି, ସାମା ମୀରୁ ଏନିକିଁ ଅରହାଲି ଆଡିଦେରି, ଏଦାଆଁତାକି ତାୟିପାରି କିଞ୍ଜନିଏ ଏଞ୍ଜାସି ଗେଲ୍ପିନି ଜିରୁ ଜିକେଏ କେପିନେସି ।

୧୪ ଏ ନା ଜୀଞ୍ଜୁତି ତାୟିୟାଁ ଅଡେ ତାଙ୍ଗିସ୍ତାତେରି ପେଣକା ବମାୟାଁ ପୂଜା କିନି ତାଣାଟି ଏଟକା ଆଦୁ । ୧୫ ନାନୁ ବୁଦିଗାଟି ଲକ୍ଷ୍ମଣି ଝେହ୍ନିଲେହେଁ ଝେସିମାଞ୍ଜାଇଁ, ନାନୁ ଏନାଆଁ ଝେସିମାଇଁ ଏଦାଆଁ ମୀରୁ ମୀରୁଏ ଅଣପାଦୁ । ୧୬ ଆମିନି ପ୍ରବୁତି ବଜି ସଲା ତାକି ଜହରା କିନାୟି, ଏଡି କ୍ରୀସ୍ତୁତି ନେତେରିତା ଆଣ୍ଡିହିଲେଏ ? ଆମିନି ରୁଟି ମାର ଡିକ୍‌ହି ମାନାୟି ଏଡି କି କ୍ରୀସ୍ତୁତି ଆଙ୍ଗାତା ଆଣ୍ଡିହିଲେଏ ? ୧୭ ଇତିହିଁ ରୁଟି ରଣ୍ଡିଏ ଆଡାକି ମାର ହାରେକା ଆଡିଜିକେଏ ରଣ୍ଡିଏ ଆଙ୍ଗା ଲେହେଁ, ଏଦାଆଁତାକି ମାର ବାରେଜାଣା ରଣ୍ଡିଏ ରୁଟିତି ବାଗା ।

୧୮ ଆଙ୍ଗାତି ଜାର୍ନା ତଲେ ଆମ୍ବାଆରି ଇସ୍ତାୟେଲ ଲକ୍ଷ୍ମଣ, ଏଞ୍ଜାରାଇଁ ସିନିକିଦୁ ଆମ୍ବାଆରି ପୂଜା କିତି ଉଙ୍ଗା ତିନେରି, ଏଞ୍ଜାରି ପୂଜା ପିଣ୍ଡାତି ପୂଜାତା ଆଣ୍ଡିହିଲଅରି ? ୧୯ ଆଡିହିଁ ପେଣକା ବମାୟାଁ ବଗୁ ଇଞ୍ଜିହିଁ ଏନାୟି ମାନେ, ଅଡେ ପେଣକା ବମାୟାଁ ଇଞ୍ଜିଁ ଏନାଇ ମାନୁ, ଏଦାଆଁ କି ନାନୁ ଝେସିମାଞ୍ଜାଇଁ ? ୨୦ ଆଏ, ସାମା ନାନୁ ଝେସିମାଞ୍ଜାଇଁ, ଏନାଆଁ ଜୀହୁଦିଆଆତାରି ପୂଜା କିନେରି ଏ ବାରେ ଏଞ୍ଜାରି ମାହାପୁରୁ ତାକି ପୂଜା କିଆନା ବୁଡୁୟାଁକି କିନେରି, ଅଡେ ମୀରୁ ବୁଡୁୟାଁ ତଲେ ଆଣ୍ଡାଦୁ, ଇଦି ନା ମନ ଅଣ୍ଡୁଟି ଆଏ । ୨୧ ମୀରୁ ପ୍ରବୁ ବଜିତା ରାସା ଗହ୍ନିତାଣା ଅଡେ ବୁଡୁୟାଁ ଗହ୍ନିତାଣା ଗସାଲି ଆଡଅତେରି; ମୀରୁ ପ୍ରବୁତି ବଜି ଅଡେ ବୁଡୁ ବଜିତା ଆଣ୍ଡାଲି ଆଡଅତେରି । ୨୨ ମାର ଏନାଆଁ ପ୍ରବୁଇଁ କାର୍‌ବି କିନାୟି ? ମାର କି ଏଞ୍ଜାଣି କିହାଁ ଗାଡି ବାଡୁୟୁ ଗାଟାତାୟି ?

☆ ୧୦:୧୭ ୧୦:୧୭ ମାଡି ୨୭:୨୭-୨୮; ମାର୍କ ୧୪:୨୨-୨୪; ଲୁକ ୨୨:୧୯,୨୦

୨୩ ବାରେ କିହାଲି ମାର ଆଡ଼ିନାୟି, ସାମା ବାରେ ମା ତାକି ନେହାୟି ଆଏ, ବାରେ କିହାଲି ଆଡ଼ିନାୟି, ସାମା ବାରେ ମା ତାକି ଲାବାଗାଗାୟି ଆଏ । ୨୪ ଆମ୍ବାଆସି ଜାହାରାତାକି ଅଣ୍ଠାଆପେସି, ସାମା ବାରେଜାଣା ତାକି ନେହାଣି ଅଣ୍ଠାଆପେସି । ୨୫ ମନତି ନେହୁକି ଇଟାଲି ହାଟା ବାଜାରାତା ପାର୍ପି ଆହିମାନି ଉଜ୍ଜା, ଆମ୍ବାଆରାଇଁ ଖେନାଆନା ଅଡ଼େ ଇଟାଣି ଅଣ୍ଠାଆନା ତିଷ୍ଟୁ । ୨୬ ଦାମ୍ବୁପତିତା ରାସ୍ତକି ଆହାମାନେ; “ଇତିହୁଁ ଦାର୍ତ ଅଡ଼େ ଏମ୍ବାଆଁ ମାନାୟି ବାରେ ମାହାପୁରୁଷାୟି ।”

୨୭ ନାମାଆତାରି ମିଙ୍ଗେ ତିଷ୍ଟାଲି ହାଟାତିହୁଁ, ଇଞ୍ଜା ମୀରୁ ହାଜାଲି ମନ କିତିସାରେ, ଅଡ଼େ ଏମ୍ବାଆଁ ଏନାଆଁ ତିଷ୍ଟାଲି ହାପକିଆନେ, ମୀ ଅଣ୍ଠା ତାକି ଇଟାଣି ଖେନାଆନା ତିଷ୍ଟୁ । ୨୮ ସାମା ଆମ୍ବାଆସି ମିଙ୍ଗେ ଏଲେଇଞ୍ଜାନେସି, ଇଦି ପେଣ୍ଟକା ବମାୟାକି ତାକି କିଞ୍ଚିଆହାମାନେ, ଆତିହୁଁ ଏଞ୍ଜାଣି ତାକି ଇଞ୍ଜା ମୀ ଅଣ୍ଠା ତାକି ତିନାଆଦୁ; ୨୯ ମୀ ଅଣ୍ଠା ତାକି ଇଞ୍ଜାଁ ଖେସିମାଞ୍ଜୁଆଁ, ସାମା ଏଞ୍ଜାଣି ଅଣ୍ଠା ତାକି । ଏନାଆଁତାକି ନା ମନତଲେ ମାନାୟି ଏଟକା ଲକୁତି ନେହାଣି ଲାଗେଏତାଣି ପୁନାଣି ତଲେ ବିଚାରା ଆନେ ?

୩୦ “ନାନୁ ମାହାପୁରୁଇଁ ଜହରା କିହାନା ଆମିନି ରାନ୍ଦା ତିଞ୍ଜିମାଇଁ, ଏ ରାନ୍ଦା ତାକି ନାଙ୍ଗେ ଏନାଆଁତାକି ରଅସି ଲାଜାକିହୁଁ ଜଲାନେସି ?”

୩୧ ଏଦାଆଁତାକି ମୀରୁ ତିଷ୍ଟୁ ଉଣ୍ଟୁ କି ଏନାଆଁ କିଦୁ, ଏଦାଆଁ ମାହାପୁରୁତି ଗାଞ୍ଜୁରମି ତାକି କିଦୁ । ୩୨ ଜୀହୁଦି ଆପେ, ଜୀହୁଦିଆଆତାରି, ଇଞ୍ଜା ମାହାପୁରୁତି କୁଲମିତି ଲକୁ ଆପାରି, ଆମ୍ବାଆରାକି କସ୍ତ ହୀନାତେରି ଆଆଦୁ । ୩୩ ଏନିକିଁ ନାନୁ ଜିକେଏ ଜାହାରାତାକି ଅଣ୍ଠାଆନା ହାରେକା ଲକୁତି ଗେଲ୍ପି ଆୟାଲିତାକି ଏଞ୍ଜାରି ନେହାଣି ଅଣ୍ଠାଆଇଁ, ଅଡ଼େ ବାରେ କାତାତା ବାରେ ଜାଣାଇଁ ରାହାଁ କିୟାଲି ଅଣ୍ଠାଆଇଁ ।

୧୧

୧ ☆ନାନୁ ଏନିକିଁ କ୍ରୀସ୍ତ କିତିଲେହେଁ କାମା କିହିମାଇଁ, ମୀରୁ ଜିକେଏ ନାନୁ କିହିମାନି ଲେହେଁ କିଦୁ ।

ପ୍ରାତାନା କିନାଟି ତାୟ୍ ଚୁକ୍ନାୟି

୨ ନାନୁ ମିଙ୍ଗେ ଗାଝୁରମି କିହିମାଞ୍ଜାଇଁ ଏନାଆଁତାକି ଇଚିହ୍ ମୀରୁ ନାଙ୍ଗେ ବାରେବେଲା ଅଶ୍ପିମାଞ୍ଜାଦେରି ଅଡେ ନାନୁ ଆମିନି ମେରା ହୀହାମାଞ୍ଜାଇଁ, ଏଦାଆଁ ବାରେ ମାନୁଞ୍ଜି ଆହିମାଞ୍ଜେରି । ୩ ସାମା କ୍ରୀସ୍ତ ବାରେ ଆବାୟାଁ ତାୟ୍ ଚୁଲହେଁ ଅଡେ ଆବା ଇୟାନି ତାୟ୍ ଚୁଲହେଁ ଇଞ୍ଜା ମାହାପୁରୁ କ୍ରୀସ୍ତ ତାୟ୍ ଚୁଲହେଁ, ଇଦାଆଁ ମୀରୁ ପୁଞ୍ଜୁ ଇଞ୍ଜୁ ନା ଅଶ୍ପୁ । ୪ ଆମିନି ଆବା ତାନି ତାୟ୍ ଚୁକ୍ନାୟି ପ୍ରାତାନା କିନେସି, ତାୟ୍ ଆନି କାତା ଖେହ୍ନେସି, ଏଞ୍ଜାସି ତାନି ତାୟ୍ ଚୁ ହୀଣି ପାଶ୍ପି କିନେସି । ୫ ସାମା ଆମିନି ଆୟାଟି ତାନି ତାୟ୍ ଚୁଗାଆନା ପ୍ରାତାନା କିନେ ଅଡେ ମାହାପୁରୁ ଅଶ୍ପୁତି ବଲୁ ଖେକ୍ନେ ଏଦି ତାନି ତାୟ୍ ଚୁ ଲାଜା ପାଶ୍ପି କିନେ ଇଚିହ୍ ତାନି ତାୟ୍ ଚୁ ହିଶ୍ପି ଆଡି ଇୟା ସମାନା । ୬ ଇଚିହ୍ ତାୟ୍ ଚୁଗାଆଗାଟି ଆୟାଟି ତାନି ତାୟ୍ ବାଶାୟାଁ ରାଡହା କତାପେ; ଇଚିହ୍ ଇୟାନାକି ତାୟ୍ ରାଡନାୟି କି ହିଶ୍ନାୟି ଲାଜାତି କାତା ଆଡିହ୍ ଏଦି ତାୟ୍ ଚୁଗାପେ । ୭ ଆବା ମାହାପୁରୁତି ଖାଶା ଇଞ୍ଜା ଗାଝୁରମି ଲେହେଁ ଆଡାକି ତାନି ତାୟ୍ ଚୁ ଚୁକ୍ନାୟି ଲଡା ହିଲେଏ, ସାମା ଇୟା ଆବାତି ଗାଝୁରମି ଲେହେଁ । ୮ ଇଚିହ୍ ଆବା ଇୟାନି ତାଶାଟି ଗାଡି ଆହାହିଲଅସି ସାମା ଇୟା ଆବା ତାଶାଟି ଗାଡି ଆହାମାନେ । ୯ ଅଡେ ଇୟା କି ଆବା ଗାଡି ଆହାହିଲଅସି ସାମା ଆବାକି ଇୟା ଗାଡି ଆହାମାନେ । ୧୦ ଏଦାଆଁତାକି ଦୁଡୁୟାଁ ତାକି ଡକ୍ତି ତାନି ଡକ୍ତି ଅଦିକାରାତି ସିନାଲେହେଁ ତାୟ୍ ଚୁ ଚୁକ୍ନାୟି କତାପେ । ୧୧ ଆଡିଜିକେଏ ପ୍ରୁ ତାଶା ଆବା ତାଶାଟି ଆୟାଟି କାଜାୟି ଆଏ, ସାମା ଇୟା ତାଶାଟି ଆବା କାଜାସି ଆଏ, ୧୨ ଇଚିହ୍ ଆୟାଟି ଏନିକ୍ ଆବା ତାଶାଟି ଗାଡି ଆହାମାନେ । ଏଲେକିହ୍ ଏ ଆବା ଜିକେଏ ଇୟା ତାଶାଟି ଗାଡି ଆହାମାନେସି, ସାମା ବାରେ ମାହାପୁରୁ ତାଶାଟି ଗାଡି ଆହାମାନେ ।

୧୩ ମୀରୁ ମୀରୁଏ ବିଚାରା କିହାଁ କତାଦୁ, ତାୟ୍ ଚୁଗାଆନା ମାହାପୁରୁ ନକିତା ପ୍ରାତାନା କିନାୟି ଇୟାନାକି ନେହେଁ କି ? ୧୪ ମାଣ୍ଡକି ମାଙ୍ଗେ ଖେସିମାଞ୍ଜାନେ ଆବା ଲାମ୍ବା ତାୟ୍ ଚୁ ବାଣାଁ ପିହ୍ନାୟି ତାଙ୍ଗେତାକି ଲାଜାତି କାତା । ୧୫ ସାମା ଆୟାଟି ଲାମ୍ବା

ତାୟିଁ ବାଣୀୟାଁ ପିସ୍ତି ସାରେ ତାଙ୍ଗେତାକି ଗାଝୁରମି ସମାନା, ଇଚିହିଁ ତାୟିଁ ପୁସ୍ତିକ ଆୟାଲି ଇୟାନାକି ଲାମ୍ବା ତାୟିଁ ବାଣୀୟାଁ ହୀପକି ଆହାମାନେ । ୧୭ ସାମା ଆମ୍ବାଆସି ଏ କାତାତାକି ବାଦିବାଦା କିହାଲି ଅଶ୍ପିତିହିଁ ଏଞ୍ଜାସି ପୁନାପେସି, ମାଙ୍ଗେ ଇଲେତି ଦେରା ହିଲେଏ, ଇଞ୍ଜା ମାହାପୁରୁ କୁଲମିତା ଜିକେଏ ହିଲେଏ ।

ପ୍ରବୁତି ବକ୍ତି

୧୭ ସାମା ମୀ ଆଶୁଞ୍ଜି ଆନାୟି ନେହାୟି ଆଆନା ସାମା ଲାଗେଏ ପଲେଏତାୟି ଆହିମାନେ, ଏଦାଆଁତାକି ମିଙ୍ଗେ ନେହାଁତେରି ଇଞ୍ଜାଲି ଆଡାଆନା ଇ ହୁକୁମି ହୀହାମାଞ୍ଜାଲି । ୧୮ ଏଦାଆଁତାକି ଇଚିହିଁ ନାନୁ ତଲିଏ ଝେଞ୍ଜିମାଲି, କୁଲମି ଲେହେଁ ରୁଣ୍ଡା ଆନାଟି, ମୀ ବିତ୍ରା ଗଚି ଗଚି ଆହିମାଞ୍ଜେରି, ଇଞ୍ଜା ଇ କାତା ବିତ୍ରା ଏଚେକା ସାତା ଇଞ୍ଜାଁ ନାନୁ ନାମିମାଲି । ୧୯ ଏନିକିଁ ମୀ ବିତ୍ରାଟି ଆମ୍ବାଆରି ସାତା ତାୟିପାରିତା ଜୀଣା ଆଡାରି ଏ ତଞ୍ଜାଆନେରି, ଏଦାଣିତାକି ମୀ ବିତ୍ରା ଗଚି ଗଚି ଆନାୟି ପିଗଞ୍ଜି ଆଏ । ୨୦ ଏଚେତା ମୀରୁ କୁଲମିତା ରୁଣ୍ଡା ଆଦେରି, “ଏଦି ପ୍ରବୁତି ବକ୍ତି ଆଏ,” ୨୧ ଏଦାଆଁତାକି ଇଚିହିଁ ବକ୍ତି ତିନାଟି, ରଅସି ଅଡେ ରଅଣାଲି କାଆନା ତାମି ରାନ୍ଦା ତିନେରି, ଏଦାଆଁତାକି ରଅସି ହାକିଟି ମାନାଟି ଅଡେ ରଅସି ହଚାହାଁ ଡୟିମାନେସି । ୨୨ ଏନାଆଁ ମିଙ୍ଗେ ତିଞ୍ଜା ଉଣ୍ଡାଲି ଇଲକା ହିଲାଉ ? ମୀରୁ ଏନାଆଁ ମାହାପୁରୁ କୁଲମିତି ମାନଞ୍ଜି ଆହି ହିଲଅତେରି, ଅଡେ ଆମ୍ବାଆରାକି ହିଲାଉ ଏଞ୍ଜାରାଲି ଲାଜା କିହିମାଞ୍ଜେରି, ନାନୁ ମିଙ୍ଗେ ଏନାଆଁ ଝେସ୍ତାଲି ? ମିଙ୍ଗେ ଏନିକିଁ ଗାଝୁରମି କିୟାଲି ? ଇଦାଆଁତାକି ମିଙ୍ଗେ ଗାଝୁରମି କିହିମାଞ୍ଜାଅଁ ।

୨୩ ଇଚିହିଁ ନାନୁ ପ୍ରବୁ ତାଣାଟି ବେଗାଆହାମାନି ଜାପୁନାଣି ମିଙ୍ଗେ ଜାପୁହି ମାଞ୍ଜାଲି, ଏଦି ଇଦି ପ୍ରବୁ ଜୀସୁ ସାଡୁୟାଁ କେୟୁତା ହେର୍ପିଆଡି ଲାଆଁୟାଁ ରୁଚି ଅହାନା, ମାହାପୁରୁଲି ଜହରା କିହାନା, ଏଦାଆଁ ତିକିହାନା ଏଲେଇଚେସି, ୨୪ ଇଦି ମିଙ୍ଗେତାକି ନା ଆଜା; ମାଙ୍ଗେ ଅଶ୍ପାଲିତାକି ଇଦାଆଁ କିଦୁ । ୨୫ ଏଲେକିହିଁଏ ତିଚି ତାୟୁ ଗହନି ସଲା ଅହାନା ଏଲେଇଚେସି, ଇ ସଲା ନା ନେତେରିତା ତୀରିକିତି ପୁଃନି ରାଜିମାନା; ମୀରୁ ଇ ସଲାଟି ଏଚର ଦେବା ଗହ୍ଦେରି ଏଚର

ଦେବା ନାଲୋ ଅଶ୍ଵାଲିତାକି କିଦୁ । ୨୬ ଇଚିହିଁ ଏଚର ଦେବା ମୀରୁ
 ଈ ରୁଚି ତିଞ୍ଜେରି ଅଡ଼େ ଈ ସଲ୍ଲାଟି ଗହ୍‌ଦେରି, ଏଚର ଦେବା ମୀରୁ
 ପ୍ରବୁତି ଖାନି ଦିନା ପାତେକା ତାନି ହାକିତି କାରୁ ଝେକ୍‌ଦେରି ।

୨୭ ଇଚିହିଁ ଆମ୍ବାଆସି ଜଗେ ଆଆନା ପ୍ରବୁ ବଜିତି ରୁଚି ତିନେସି
 ଅଡ଼େ ଈ ସଲ୍ଲାଟି ଗହ୍‌ନେସି, ଏଞ୍ଜାସି ପ୍ରବୁତି ଆଲ୍ଲା ଅଡ଼େ ନେତେରିତି
 ଦାୟି ଆନେସି । ୨୮ ଏଦାଆଁତାକି ମାଶ୍‌ସି ତଲିଏ ତାନୁଏ ତାଙ୍ଗେ
 ତାୟିପାରି କିହାଁ କଡାହାଁ ଈ ରୁଚି ତିଶ୍‌ମେସି ଅଡ଼େ ଈ ଗହ୍‌ନି ସଲ୍ଲାଟି
 ଗସ୍‌ପେସି । ୨୯ ଇଚିହିଁ ଆମ୍ବାଆସି ପ୍ରବୁତି ଆଲ୍ଲାତି ଏନାୟି ଇଞ୍ଜି
 ଅଶ୍ଵାଆନା ତିନେସି ଅଡ଼େ ଗହ୍‌ନେସି ଏଞ୍ଜାସି ତାନି ମୁହେଁ ତଣ୍ଡ
 ବେଟାଆହାଲି ତିନେସି ଅଡ଼େ ଗହ୍‌ନେସି । ୩୦ ଏଦାଆଁତାକି ମୀ
 ବିତ୍ରାଟି ହାରେକା ଲକୁ ବାଡ଼ୁୟୁ ହିଲ୍ଲାଆଗାଟାତେରି ଇଞ୍ଜା ହାରେକା
 ଲକୁ ନମେରି ଗାଟାରି ଅଡ଼େ ହାରେକା ଜାଣା ହାହା ହାଜାମାନେରି
 । ୩୧ ସାମା ମାର ତଲିଏ ଜାହା ଜାହାରାଇଁ ତାୟିପାରି କିତିହିଁ ମା
 ମାହାପୁରୁ ମାଲୋ ବିଚାରା କିୟାଆତେସିମା । ୩୨ ଅଡ଼େ ଦାରତି ତଲେ
 ଏନିକ୍ ମାର ତଣ୍ଡ ପ୍ଲୁଃଆୟି, ଏଦାଆଁତାକି ପ୍ରବୁତି ତାଣା ବିଚାରା
 କିଞ୍ଜି ଆହାଁ ସାସ୍ତି ବେଟାଆହି ମାନାୟି । ୩୩ ଏଦାଆଁତାକି ନା ତାୟିୟା,
 ମୀରୁ ପ୍ରବୁତି ବଜି ତିଞ୍ଜାଲି ତାକି ରୁଣ୍ଡା ଆନାଟି ମୀରୁ ରଅତେରି
 ରଅଣାଇଁ କାଦୁ । ୩୪ ମୀରୁ ରୁଣ୍ଡା ଆନାୟି ଏନିକ୍ ମାହାପୁରୁତି
 ତଣ୍ଡ ବେଟାଆହାଲି ଆଏ, ଏଦାଆଁତାକି ଆମ୍ବାଆସି ହାକି ଆହାମାନେସି
 ଏଞ୍ଜାସି ତାନି ଇଜ ତିନାପେସି, ଅଡ଼େ ଆଗାଡ଼ା ଝେସ୍ତାନି କାତା ନାନୁ
 ଖାଡ଼ିସାରେ ତେଲ୍‌ହି କିୟାଇଁ ।

୧୨

ସୁଦୁଜୀଞ୍ଜୁତି ଦାନା

୧ ତାୟିୟା ଅଡ଼େ ତାଙ୍ଗିସ୍ତାତେରି ସୁଦୁଜୀଞ୍ଜୁ ଦାନାତି କାତା
 ମୀରୁ ନେହିଁ କି ପୁଞ୍ଜୁ ଇଞ୍ଜି ନାନୁ ଅଶ୍ଵିମାଇଁ । ୨ ମୀରୁ
 ପୁଞ୍ଜାମାଞ୍ଜେରି, ଏତିବେଲା ମୀରୁ ଜୀହୁଦିଆଆତାତେରି ମାଚେରି,
 ଏଚେତା ଏନିକ୍ ସାଲ୍ଲି ଆହିମାଚେରି, ଏଲେକିହିଁ ଏ ନାଡ଼ିକିଞ୍ଜି
 ଆହାନା ଜୀଞ୍ଜୁ ହିଲ୍ଲାଆଗାଟି ପେଶ୍‌କା ବମାୟାତି ଜେଡ ହାଜିମାଚେରି
 । ୩ ଏଦାଆଁତାକି ନାନୁ ମିଙ୍ଗ ଝେସିମାଞ୍ଜାଇଁ, ମାହାପୁରୁତି ସୁଦୁଜୀଞ୍ଜୁ

ତଳେ ସାଲୁଣି ଆହାନା ଆମ୍ବାଆସି ଜିକେଏ ଜୀସୁଇଁ ବାକା ଇଟାଲି ଆଡ଼ଅସି, ଅଡ଼େ ଆମ୍ବାଆସି ସୁଦୁଜୀସୁ ପୁଃଆତାସି ଜୀସୁଇଁ ପ୍ରବୁ ଇଞ୍ଜିଁ ଖେସାଲି ଆଡ଼ଅସି ।

୪ *ସୁଦୁଜୀସୁ ହାନି ଦାନା ଏଟ୍‌କା ଏଟ୍‌କାତାୟି ସାମା ଏ ରଣ୍ଡିଏ ସୁଦୁଜୀସୁ । * ସେବା ଏଟ୍‌କା ଏଟ୍‌କାତାୟି ସାମା ପ୍ରବୁ ରଅସିଏ । ୬ କାମା କିନି ବାଡ଼୍‌ମୁ ଏଟ୍‌କା ଏଟ୍‌କାତାୟି ସାମା ମାହାପୁରୁ ରଅସିଏ, ଏଞ୍ଜାସି ବାରେ ତାଣା ବାରେ କାମା କିନେସି । ୭ ସାମା ବାରେ ଜାଣାତାତି ସୁଦୁଜୀସୁତି ଗୁଣୁ ତହୁନି ଦାନା ବାରେ ଲକ୍ଷୁତି ନେହେଁତାକି ହୀପକିଆନେ । ୮ ରଅଣାକି ସୁଦୁଜୀସୁ ତଳେ ବୁଦିତି କାରୁ ଖେସାଲି ହୀନେ, ଅଡ଼େ ରଅଣାକି ଏ ସୁଦୁଜୀସୁ ତଳେ ବୁଦିତିକାତା ଜାପୁହାଲି ହୀନେ, ୯ ଅଡ଼େ ରଅଣାକି ଏ ସୁଦୁଜୀସୁ ତଳେ ନାମାଲି, ଅଡ଼େ ରଅଣାକି ଏ ରଣ୍ଡିଏ ଜୀସୁତି ଦାନା ତଳେ ରଗଟି ନେହଁ କିୟାଲି ବାଡ଼୍‌ମୁ ହୀନେ, ୧୦ ରଅଣାକି କାବାଆନି ବାଡ଼୍‌ମୁତି କାମାୟାଁ କିୟାଲି, ଅଡ଼େ ରଅଣାକି ମାହାପୁରୁ ଅଣ୍‌ପୁତି କାତା ଖେକହାଲି, ଅଡ଼େ ରଅଣାକି ଏଟ୍‌କା ଏଟ୍‌କାତି ଜୀସୁୟାଁଇଁ ପୁଞ୍ଜାଲି ଆଡ଼ିନି ବାଡ଼୍‌ମୁ, ଅଡ଼େ ରଅଣାକି ପୁନାଆତି ପୁଃନି ହାଡ଼ା ଜଲାଲି, ଅଡ଼େ ଏଟ୍‌କାତାରାକି ପୁନାଆତି ହାଡ଼ାତି ଅର୍ତ୍ତ ପୁଣ୍ଡିକିନି ବାଡ଼୍‌ମୁତି ଦାନା ହୀପକିଆନେ । ୧୧ ସାମା ଏ ରଣ୍ଡିଏ ଜୀସୁ ତାନି ମନ କିତିଲେହେଁ ବାରେଜାଣାତି ଏଟ୍‌କା ଏଟ୍‌କାତି ଦାନା ହୀହାନା ଇ ବାରେ କାମା କିହିମାନେ ।

ରଣ୍ଡିଏ ଆଜ୍ଞାତି ଆଜ୍ଞା ଉଡ଼େଲି

୧୨ *ଇତିହଁ ଏନିକଁ ଆଜ୍ଞା ରଣ୍ଡିଏ, ଅଡ଼େ ଆଜ୍ଞାତି ଏଟ୍‌କା ଏଟ୍‌କା ବାଗାୟାଁ ମାନୁ, ସାମା ଆଜ୍ଞାତି ବାଗାୟାଁ ହାଡ଼େକା ଆଡ଼ିଜିକେଏ ରଣ୍ଡିଏ ଆଜ୍ଞା ଆନେ, ଏଲେକିହଁ ଏ କ୍ରୀସୁ ।

୧୩ ଇତିହଁ ମାର ଜୀହୁଦି କି ଜୀହୁଦିଆଆତି ଜିକେଏ, ହଲେଏସି ଆପେସି ହଲେଏସି ଆଆପେସି, ବାରେତାୟି ରଣ୍ଡିଏ ଜୀସୁତଳେ ରଣ୍ଡିଏ ଆଜ୍ଞା ଆହାଲି ବାପ୍ତିସ୍ତ* ଆହାମାନାୟି; ଅଡ଼େ ବାରେତାୟି ରଣ୍ଡିଏ ଜୀସୁତଳେ ଗସି ମାନାୟି ।

☆ ୧୨:୪ ୧୨:୪ ରନି ୧୨:୭-୮ ☆ ୧୨:୧୨ ୧୨:୧୨ ରନି ୧୨:୪,୫ * ୧୨:୧୩ ୧୨:୧୩ପୁଞ୍ଜନାୟି

୧୪ ଏଦାଆଁତାକି ଆଜ୍ଞା ରଣ୍ଡିଏ ବାଗା ଆଏ, ସାମା ଆଜ୍ଞାତି ଏଟ୍‌କା ଏଟ୍‌କା ବାଗାୟା ଆଣ୍ଡାନା ର ଆଜ୍ଞା ଆହାମାନେ । ୧୫ କଡା ଏଲେଇନେ ନାନୁ କେୟୁଡେଏ ଆଏ, ଏଡି ଆଜ୍ଞାତି ବାଗା ଆଏ, ଏଦାଆଁତାକି ଏଡି ଆଜ୍ଞାତି ବାଗା ଆଏ ଏଲେକ୍‌ ଆଏ । ୧୬ ଅଡେ କିୟୁ ଏଲେଇନେ ନାନୁ କାନୁ ଆଏ, ଏଡି ଆଜ୍ଞାତି ବାଗା ଆଏ, ଏଦାଆଁତାକି ଏଡି ଆଜ୍ଞାତି ବାଗା ଆଏ ଏଲେକ୍‌ ଆଏ । ୧୭ ବାରେ ଆଜ୍ଞା କାଣ୍‌କା ଆନୁ, ଆତିହ୍ ଏନିକ୍‌ ଝେନାୟି ? ବାରେ ଆଜ୍ଞା କୀର୍‌କା ଆନୁ ଆତିହ୍ ଆନିଟି ମୁଞ୍ଜିନାୟି ? ୧୮ ସାମା ମାହାପୁରୁ ଆଜ୍ଞା ଉଡେଲିକ୍‌ ରଣ୍ଡା ରଣ୍ଡାଆଁ କିହ୍ ତାନି ମନତଲେ ଆଜ୍ଞାତା ଆଟ୍‌ହାମାନେସି । ୧୯ ଅଡେ ଏ ବାରେ ଆଜ୍ଞାତି ରଣ୍ଡିଏ ବାଗା ଆତିହ୍‌ମା ଆତିହ୍‌ ଆଜ୍ଞା ଆନିୟା ? ୨୦ ସାମା ସାତେଏ ଆଜ୍ଞାତି ବାଗାୟା ହାରେକା, ସାମା ଆଜ୍ଞା ରଣ୍ଡିଏ ।

୨୧ ନୀ ତାଣା ନାଜେ ଲଡା ହିଲେଏ ଇଞ୍ଜ୍‌ କାନୁ କେୟୁଡି ଏଲେଇଞ୍ଜାଲି ଆଡେଏ, ଇଞ୍ଜା ନୀ ତାଣା ନା ଲଡା ହିଲେଏ ଇଞ୍ଜ୍‌ ତାୟୁ କଡାତି ଏଲେଇଞ୍ଜାଲି ଆଡେଏ । ୨୨ ଅରଞ୍ଜାକି ଆଜ୍ଞାତି ଆମିନି ଆଜ୍ଞା ଉଡେଲି ବାଡ଼ୟୁ ହିଲାଆଗାଟାଇ ଇଞ୍ଜ୍‌ ପୁଟିହ୍ ଜିକେଏ ଏଞ୍ଜି ବାରେ ଲଡାତା ମାନୁ; ୨୩ ଅଡେ ଆଜ୍ଞାତି ଆମିନି ଆଜ୍ଞା ଉଡେଲି ଲଡାହିଲାଆ ଗାଟାଇ ଇଞ୍ଜ୍‌ ଅଣ୍‌ପିନାୟି, ଏ ବାରେ ଆଜ୍ଞାତି ଆଜ୍ଞା ଉଡେଲିକାକ୍‌ ମାର ହାରେକା ଜାଡ଼ନୁ କିନାୟି; ଅଡେ ମା ଲଡାହିଲାଆ ଆଜ୍ଞା ଉଡେଲି ହାରେକା ନେହ୍‌ ତଞ୍ଜିକିୟାନୁ, ୨୪ ସାମା ମା ଅଜିତି ଆଜ୍ଞା ଉଡେଲି ନେହ୍‌ କ୍‌ ତଞ୍ଜା ଆନାୟି ଲଡା ଆଏ, ୨୫ ସାମା ଏନିକ୍‌ ଆଜ୍ଞାତି ବିତ୍ରା ଗଡ଼ହା ଆଏ, ଇଞ୍ଜା ଆଜ୍ଞାତି ବାଗାୟା ସମାନା ତଲେ ବାରେଜାଣାତି ନେହ୍‌ଣି ଅଣ୍‌ପିନୁ । ଏଦାଆଁତାକି ଲଡାହିଲାଆ ଆଜ୍ଞାତି ହାରେକା ଅଜି କିହାନା ମାହାପୁରୁ ଜାଟୁ କିହାମାନେସି । ୨୬ ଏଦାଆଁତାକି ର ଆଜ୍ଞା କସ୍ତ ବେଟାଆଡ଼ିସାରେ ବାରେ ଆଜ୍ଞା ତାନିତଲେ ଦୁକୁ କିନୁ, ସାମା ର ଆଜ୍ଞା ଗାଞ୍ଜୁରମି ବେଟାଆଡ଼ିସାରେ ବାରେ ଆଜ୍ଞା ତାନିତଲେ ରାହ୍‌ କିନୁ ।

୨୭ ଏଲେକିହ୍‌ଏ ମୀରୁ କ୍ରାସ୍ତା ଆଜ୍ଞାତି ବାଗାୟାତେରି, ଅଡେ ର . ର . ଲକୁ ର . ର . ଆଜ୍ଞାତି ବାଗାୟା ଲେହ୍‌ । ୨୮ *ଅଡେ

ମାହାପୁରୁ କୁଲମିତା ତଲିଏ ପାଣ୍ଡୁଓଁ ଆଡ଼ାରାଇଁ, ଇଞ୍ଜା ତାୟୁ ମାହାପୁରୁ ଅଣ୍ଟପୁତି ବଲୁ ଖେହ୍ନାରାଇଁ, ତାୟୁ ଜାପୁନାରାଇଁ, ଏଲେକିହିଁ ହାରେକା ଲକୁଣି ନିପହାମାନେସି; ଅଡ଼େ କାବାଆନି କାମା କିନାରାଇଁ, ତାୟୁ ରଗିଟି ନେହିଁ କିନାରାଇଁ, ଇଞ୍ଜା ଲକୁଇଁ ସାରେମି କିନାୟି, ସାଲୁଓଁ କିନାରି ବାଡ଼ୟୁ ଅଡ଼େ ଏଟକାତି ପୁନାଆତି ହାଡ଼ା ଜଲିନି ଦାନା ହାହାମାନେସି । ୨୯ ବାରେଜାଣା କି ପାଣ୍ଡୁଓଁ ଆହାମାନାରି ? ବାରେଜାଣା କି ମାହାପୁରୁ ଅଣ୍ଟପୁତି ବଲୁ ଖେହ୍ନାରି ? ବାରେଜାଣା କି ଜାପୁନାରି ? ବାରେଜାଣା କି କାବାଆନି କାମାକିନାରି ? ୩୦ ବାରେଜାଣା କି ନେହିଁ କିନି ବାଡ଼ୟୁତି ଦାନା ବେଟା ଆହାମାନାରି ? ବାରେ ଜାଣାକି ଏଟକା ହାଡ଼ାତଲେ ଜଲିନେରି ? ବାରେଜାଣା କି ଏଟକା ହାଡ଼ାତି ଅର୍ଡ଼ ଖେହ୍ନେରି ? ୩୧ ସାମା ବାରେଡେରି ନେହିଁ ଦାନା ବେଟାଆହାଲି ଅଣ୍ଟପାଦୁ, ସାମା ଏ ବାରେକିହିଁ ଅଡ଼େ ହାରେକା ଆଗାଡ଼ା ମାନି ର ନେହିଁ ଜିରୁ ତସିମାଞ୍ଜାଇଁ ।

୧୩

ଜୀଞ୍ଜୁନନାୟି

୧ ଇତିହିଁ ନାନୁ ମାଣ୍ଡସିୟାଁ ଅଡ଼େ ଦୁଡୁୟାଁ ହାଡ଼ାତଲେ ଜଲିଇଁ, ସାମା ନା ଜୀଞ୍ଜୁନନାୟି ହିଲେଏ, ଆତିହିଁ ନାନୁ ଚିଣି ଚିଣି ଆନି ଜିଣ୍ଡା ଅଡ଼େ ଟାପୁଡ଼ି ଖେନି ହାଡ଼ାଲେହେଁ ତାଡେଏଁ । ୨ ଇତିହିଁ ନାନୁ ମାହାପୁରୁ ଅଣ୍ଟପୁତି ବଲୁ ଖେହ୍ନି ବାଡ଼ୟୁ ମାନେ, ଅଡ଼େ ବାରେ ଡ଼ଗୁମାନାଣି ଇଞ୍ଜା ବୁଦିତିକାତା ପୁନାଡେଏଁ, ଅଡ଼େ ହରୁଇଁ ଏଟକା ଗୁତି କିହାଲି ନାଞ୍ଜେ ହାରେକା ନାମୁ ମାତି ଜିକେଏ, ସାମା ନା ଡ଼ାଣା ଜୀଞ୍ଜୁନନାୟି ହିଲେଏ, ଆତିହିଁ ନାନୁ ଏନାଡେଏଁ ଆଏ । ୩ ଇତିହିଁ ନାନୁ ହିଲୁଆଗାଟି ଲକୁଡାକି ତିଞ୍ଜାଲି ବାରେ ଦନ ହାଇଁ, ଅଡ଼େ ନାନୁ ନା ଆଙ୍ଗାତି ଖେହାଲି ତାକି ହେରପିଇଁ, ସାମା ନା ଡ଼ାଣା ଜୀଞ୍ଜୁନନାୟି ହିଲେଏ ଇତିହିଁ ନାଦି ଏନି ଲାବା ଆଏ ।

୪ ଜୀଞ୍ଜୁନନାୟି ଅରୁହିନାୟି, ଜୀଞ୍ଜୁନନାୟି ନେହାଁଣି ଅଣ୍ଟପିନାୟି, ଡ଼ାହାରା କିଆଗାଟାୟି, ବଡ଼ପଣ ଆଆଗାଟାୟି, ଆଞ୍ଜାରା କିଆଗାଟାୟି । ୫ ଲାଗେଏ କିହିଁ ଲେମ୍ବେଏ, ଜାହାରା ତାକି ଅଣ୍ଟପେଏ, ବିରିବିରା

☆ ୧୩:୨ ୧୩:୨ ମାତି ୧୭:୨୦; ୨୧:୨୧; ମାର୍କ ୧୧:୨୩

ଆଏ, ଲାଗେଏ କିହାଲି ଅଶ୍‌ପୁତା ଇଚେଏ । ^୭ ଲାଗେଏତି କାମାତାକି ରାହାଁ ଆଆଗାଗାୟି, ସାମା ସାତାତା ରାହାଁ କିନାୟି; ^୮ ଜୀଝୁ ନନିତାଣା ବାରେ ଅରହିନାୟି, ବାରେ ତାଣା ନାମିନାୟି, ବାରେ ତାଣା ବାସୁଁ ହୀନାୟି, ବାରେ କାତାତା ସାସା ଆହୁନାୟି ।

୮ ଜୀଝୁନନାୟି ଏଚେଲା ରାଏ; ସାମା ମାହାପୁରୁ ଅଶ୍‌ପୁତି ବଲୁ ଝେକହା ମାନାୟି, ଦିନା ଝାଡ଼ିସାରେ ମିତି ଜିକେଏ ଆନେ; ଏଚକା ଏଚକା ଜଲିନି ହାଡ଼ା ମାତି ଜିକେଏ ଏଦି ର ଦିନା ସାପି ଆନେ; ବୁଦିତିକାତା ମାତି ଜିକେଏ ଏଦି ମେଶ୍‌ଜାହାନେ । ^୯ ଇଚିହିଁ ମାର ରଚାଣିଏ ପୁନାୟି ଅଡ଼େ ମାହାପୁରୁ ଅଶ୍‌ପୁତି ବଲୁ ଇଚେକେଏ ଝେକହାଲି ଆଡ଼ିନାୟି । ^{୧୦} ସାମା ପୁରା ଆନାୟି ଝାଡ଼ିହିଁ ଉଜେଏତାୟି ମେଶ୍‌ଜାହାନେ ।

^{୧୧} ନାନୁ ଉଣା ମାଚିବେଲା ଉଣା କକାରି ଲେହେଁ ଜଲି ମାଚେଏଁ, ଉଣା କକାରି ଲେହେଁ ଅଶ୍‌ପିମାଚେଏଁ, ଉଣା କକାରି ଲେହେଁ ପୁଞ୍ଜିମାଚେଏଁ; ନାନୁ ପାତାଆଡ଼ି ମାଶ୍‌ସି ଆୟାଲିଏ ନାନୁ ଉଣା କକାରି କାତା ପିସାଡୁସ୍ତେଏଁ । ^{୧୨} ଇଚିହିଁ ନାଏଁ ମାର ଡ଼ଗୁମାନି କାତା ଲେହେଁତି ଦାପେଣିତା ମେସିମାନାୟି, ସାମା ଏଚିବେଲା ମୁମ୍‌ମୁମ୍‌ତୁ ମେସ୍‌ପି ଆନାୟି; ନାଏଁ ନାନୁ ଏନିକିଁ ପୁଞ୍ଜାମାଲ୍, ସାମା ଏଚିବେଲା ନାଜେ ଏନିକିଁ ପୁଞ୍ଜାମାଞ୍ଜାନେସି, ନାନୁ ଜିକେଏ ଏଲେକିଁ ତାୟୁ ପୁଲ୍ ।

^{୧୩} ଏଦାଆଁତାକି ନାମିନାୟି, ଆସା କିନାୟି, ଜୀଝୁନନାୟି, ଇ ତାନିଗଟା କାଲେଏତାଇ, ସାମା ଇ ବିତ୍ରାଟି ଜୀଝୁନନାୟି ବାରେକିହାଁ କାଜାୟି ।

୧୪

ମାହାପୁରୁ ଜୀଝୁତି କାତା ପୁନାୟି

^୧ ଜୀଝୁ ନନାଣି ପାରାଦୁ, ଅଡ଼େ ସୁଦୁଜୀଝୁତି ଦାନା ବେଟାଆହାଲି ବାରେତି କିହାଁ ଏନିକିଁ ମାହାପୁରୁ ଅଶ୍‌ପୁତି ବଲୁ ଝେକହାଲି ଆଡ଼ିଦେରି, ଇଦାଆଁତାକି ହାରେକା ଅଶ୍‌ପାଦୁ । ^୨ ଇଚିହିଁ ଆମ୍ବାଆସି ଏଚକା ଏଚକାତି ହାଡ଼ାତଲେ ଜଲିନେସି, ଏଞ୍ଜାସି ମାଶ୍‌ସିୟାଲ୍ ଜଲଅସି, ସାମା ମାହାପୁରୁଲ୍ ଜଲିନେସି, ଆମ୍ବାଆସି

ଏଦାଆଁ ତେଲହଅସି, ସାମା ଏଝାସି ସୁଦୁଜୀଝୁ ବାଡ଼ୁୟୁଟି ଡ଼ଗୁାମାନାଣି
 ଝେହନେସି ।^୩ ସାମା ଆମ୍ବାଆସି ମାହାପୁରୁ ଅଣ୍ପୁତି ବଲୁ ଝେହନେସି,
 ଏଝାସି ଲକୁଇଁ ସାୟେମି କିହାନା, ସାସା ଅଡ଼େ ବାସୁତି କାତା
 ଝେହନେସି ।^୪ ଆମ୍ବାଆସି ଏଟକାତି ହାଡ଼ାତଲେ ଜଲିନେସି ଏଝାସି
 ଜାହାରା ନାମୁତା ପାଡ଼ିକିହାଁ କତିନେସି, ସାମା ଆମ୍ବାଆସି ମାହାପୁରୁ
 ଅଣ୍ପୁତି ବଲୁ ଝେକନେସି ଏଝାସି କୁଲମିଇଁ ନାମୁତା ପାଡ଼ିକିନେସି ।

^୫ ମୀରୁ ବାରେତେରି ଏଟକା ହାଡ଼ାତଲେ ଜଲାନୁ ଇଞ୍ଜି ନା
 ଅଣ୍ପୁ, ସାମା ମୀରୁ ମାହାପୁରୁ ଅଣ୍ପୁତି ବଲୁ ଝେହଦୁ ଇଦି ହାରେକା
 ନା ଅଣ୍ପୁ; ଆମ୍ବାଆସି ଏଟକା ଏଟକାତି ହାଡ଼ାତଲେ ଜଲିନେସି
 ଏଝାସି କୁଲମିତି ପାଡ଼ିକିହାଲି ଏ କାତାତି ଅର୍ତ୍ତ ଝେହଅସି ଇତିହ
 ଏଦାଣିକହାଁ ଆମ୍ବାଆସି ମାହାପୁରୁ ଅଣ୍ପୁତି ବଲୁ ଝେକନେସି ଏଝାସି
 କାଜାସି ।^୬ ଏଦାଆଁତାକି ତାୟିୟାତେରି ନାନୁ ମୀ ତାଣା ଝାହାନା
 ମାହାପୁରୁତି ଝେକହ ବଲୁ, ରୁଦିତିକାତା, ମାହାପୁରୁ ଅଣ୍ପୁତି କାତା
 ଝେକନାଣି କି ଜାପୁନି କାତା ଝେହଆନା, ଏଟକା ଏଟକାତି ହାଡ଼ାତଲେ
 ଜଲିଇଁ, ଆତିହ ଏମ୍ବାଆଁ ନାନୁ ମୀ ଏନି ଲାବା କିତେଏଁ ।

^୭ ପୀରୁଡ଼ି ଅଡ଼େ ସେରଜି ଲେହେଁତି ଜୀଝୁ ହିଲାଆଗାଟି ବାଜାୟାଁ
 ଉକିତିହ ଜିକେଏ ଏମ୍ବାଆଁ ତାନି ତିସା ହଏ ଇତିହ ପୀରୁଡ଼ି
 ଏନିକ ଡ଼ାହିମାନେ ସେରଜି ଏନିକ ଡ଼ାହିମାନେ ଏଦାନି ତିସା
 ଏନିକ ପୁନେରି ? 「ଇଞ୍ଜା ତୀଡ଼ି ଉକିନାସି ନେହ କ ଉକଅସି
 ଆତିହ ଆମ୍ବାଆସି ଜୁଦୁ ତାକି ତିୟାରା ଆନେସି ।^୮ ଏଲେକିହ ଏ
 ମୀରୁ ଜିକେଏ ଏଟକା ହାଡ଼ାତଲେ ନେହ ତୀରିତଲେ ଜଲୁଅତେରି,
 ମୀରୁ ଏନାଆଁ ଜଲିତେରି ଏନିକ ପୁନେରି, ଇତିହ ମୀରୁ
 ଜଲିନାୟି ଗାଲିତି ଜଲିନିଲେହେଁ ଆନେ ।^{୧୦} ଦାରଡିତା ହାରେକା
 ତିସା ମାନେ, ଅଡ଼େ ଆମିନି ତିସାତି ଅର୍ତ୍ତ ହିଲାଆଗାଟାଇ ଆଏ ।
^{୧୧} ସାମା ନାନୁ ଏ ଜଲିନି ହାଡ଼ା ତେଲହଅଁ ଆତିହ ଆମ୍ବାଆସି
 ଜଲିନେସି ନାନୁ ଏଝାଣାକି ପୁନାଆତାତେଏଁ ଲେହେଁ ଆଇଁ, ଅଡ଼େ
 ଏଝାସି ନା ତାଣାଟି ପୁନାଆତାସି ଲେହେଁ ଆନେସି ।^{୧୨} ଏଲେକିହ ଏ
 ମୀରୁ ଜିକେଏ ଜୀଝୁତି ଦାନା ବେଟାଆହାଲି ଅଣ୍ପି ମାନାକି କୁଲମିତି
 ପାଡ଼ିକିହାଲି ଗାଡ଼ି ବେଟାଆହାଲି ଅଣ୍ପପାଦୁ ।

୧୩ ଆତ୍ମାଆସି ଏଟକାତି ହାଡ଼ାତଲେ ଜଲିନେସି, ଏଞ୍ଜାସି ଏନିକ୍ଟି ଏମ୍ବାତି ଅର୍ଡ଼ ଝେସାଲି ଆଡ଼ିନେସି, ଏଦାଆଁତାକି ପ୍ରାଡ଼ାନା କିପେସି । ୧୪ ଇତିହିଁ ନାନୁ ଏଟକା ହାଡ଼ାତଲେ ପ୍ରାଡ଼ାନା କିଇଁ, ଇତିହିଁ ନା ଜୀଝୁ ପ୍ରାଡ଼ାନା କିନେ, ସାମା ନା ଅଣ୍ପୁ ଏମ୍ବାଟି ଏନି ଲାଡ଼ା ହିଲେଏ । ୧୫ ଆତିହିଁ ନାନୁ ଏନାଆଁ କିନାୟିମାନେ, ନାନୁ ସୁଦୁଜୀଝୁ ତଲେ ପ୍ରାଡ଼ାନା କିଇଁ; ଇଞ୍ଜା ବୁଦିତଲେ ଜିକେଏ ପ୍ରାଡ଼ାନା କିଇଁ; ସୁଦୁଜୀଝୁ ତଲେ ଜହରା ପାରୁ ପାଟିଇଁ, ଅଡ଼େ ବୁଦିତଲେ ଜିକେଏ ଜହରା ପାରୁ ପାଟିଇଁ । ୧୬ ନାନୁ ଖାରଇ ସୁଦୁଜୀଝୁ ତଲେ ମାହାପୁରୁଇଁ ଜହରା କିଦି, ଏମ୍ବାଆଁ କୁଗାମାନାସି ପୁନାଆନା ଏନିକ୍ଟି ନୀ ପ୍ରାଡ଼ାନାତା ଡାୟୁ ଆଡ଼େନି ଇନେସି । ୧୭ ଇତିହିଁ ନାନୁ ନେହିଁକିଁ ମାହାପୁରୁଇଁ ଜହରା କିହିମାଞ୍ଜି ସାତା, ସାମା ଏଟକାତାସି ପାତାଆଅସି ।

୧୮ ନାନୁ ମୀ ବାରେକିହାଁ ହାଡ଼େକା ଗାଡ଼ି ଏଟକାତି ହାଡ଼ାତଲେ ଜଲିଇଁ ଇଞ୍ଜାଁ ନାନୁ ମାହାପୁରୁଇଁ ଜହରା କିହିମାଇଁ; ୧୯ ଆଡ଼ିଜିକେଏ ନାନୁ ଏନିକ୍ଟି ଏଟକାତାରାଇଁ ଜାପୁହାଲି ଆଡ଼ିଇଁ, ଏଦାଆଁତାକି କୁଲମିତା ଦସ ମାଣା ଏଟକାତି କାତାୟାଁ ଜଲିନି କିହାଁ ବୁଦିତଲେ ପାସାଗଟା କାତା ଝେହୁନାୟି ନେହେଁ ।

୨୦ ଏ ଡାୟିୟାଁତେରି ବୁଦିତା ଡ଼ଣା କକାରି ଲେହେଁ ଆଆଦୁ, ସାମା ଲାଗେଏ ପଲେଏ କାତାତାକି ଡ଼ଣା କକାରି ଲେହେଁ ଆଦୁ, ସାମା ବୁଦିତା ଅଡ଼େ ଅଣ୍ପୁତା ପାତାଆଡ଼ି ଲକୁଲେହେଁ ଆଦୁ । ୨୧ ମସା ମେରାତା ରାସ୍‌କି ଆହାମାନେ,

“ପ୍ରବୁ ଏଲେ ଇଞ୍ଜିମାନେସି, ଏଟକା ଦେସାଡ଼ି ଜଲିମାନି ହାଡ଼ାତଲେ,
ଏଟକା ଲକୁଡ଼ି ଗୁଡ଼ି ତଲେ

ନାନୁ ଇ ଲକୁଣି ଜଲିଇଁ,

ଆଡ଼ିଜିକେଏ ଏଞ୍ଜାରି ନା କାତା ଝେନଅରି ।”

୨୨ ଏଦାଆଁତାକି ଏଟକା ହାଡ଼ାତଲେ ଜଲିନାୟି ନାମୁ ଗାଟାରାକି ର ସିନାଲେହେଁ ଆଏ, ସାମା ନାମାଆ ଗାଟାରାକି ସିନା ସମାନା; ଅଡ଼େ ଅରଞ୍ଜାକି ମାହାପୁରୁ ଅଣ୍ପୁଡ଼ି ବଲୁ ଝେକନାୟି ନାମାଆ ଗାଟାରାକି ସିନାଲେହେଁ ଆଏ, ସାମା ନାମିନାରାକି ସିନା ସମାନା ।

୨୩ ଅଡ଼େ ଜିକେଏ ବାରେ କୁଲମିତି ଲକୁ ରୁଣ୍ଡା ଆତିହିଁ, ଇଞ୍ଜା ବାରେଜାଣା ଏଟକା ଏଟକା ହାଡ଼ାତଲେ ଜଲିନେରି, ଅଡ଼େ

ପୁନାଆତାରି କି ନାମାଆତାରି ଏମ୍ବାଆଁ ୱାନେରି, ଆତିହିଁ ମିଙ୍ଗେ ବାୟା ଆତାରି ଇଞ୍ଜିଁ ଇନଅରି କି ? ୨୪ ସାମା ବାରେଜାଣା ମାହାପୁରୁ ଅଣ୍ପୁତି ବଲୁ ୱେକ୍‌ନେରି, ରଅସି ପୁନାଆତାସି କି ନାମାଆତାସି ୱାନେସି, ଆତିହିଁ ଏଞ୍ଜାସି ନାନୁ ପାପୁ ଗାଟାତେଏଁ ଇଞ୍ଜିଁ ପୁଞ୍ଜା କଡିନେସି ଅଡେ ଏଞ୍ଜାସି ବାରେ ଲକୁତାଣା ଦହଗାଟାସି ଇଞ୍ଜିଁ ବିଚାରା ଆନେସି । ୨୫ ଅଡେ ତାନି ହିୟାତା ତୁଗ୍ଗାମାନି ପାପୁତି ଅଣ୍ପୁ ବାରେ ତଞ୍ଜାଆନେ; ଇଞ୍ଜା ଏଞ୍ଜାସି ମୁନୁ କୁତାହାଁ ମାହାପୁରୁଁ ଜହରା କିନେସି, ଇଞ୍ଜା “ସାତେଏ ମାହାପୁରୁ ମୀ ତାଣା ମାନେସି ଇଞ୍ଜିଁ ଇନେସି ।”

କୁଲମିତି ମେରା

୨୬ ଏଦାଆଁତାକି ଏ ତାୟିୟାଁ ଅଡେ ତାଞ୍ଜିସ୍ତାତେରି, ଏନାଆଁ କିନାୟିମାନେ ? ମୀରୁ ରୁଣ୍ଡା ଆନାଟି ଆମ୍ବାଆରି ର ପାରୁ, ଆମ୍ବାଆରି ର କାତା ଜାପନାୟି, ଆମ୍ବାଆରି ମାହାପୁରୁ ତସାମାନି ବଲୁ ୱେକ୍‌ନାୟି, ଆମ୍ବାଆରି ଏଟ୍‌କା ଏଟ୍‌କାତି ହାଡା ଜଲିନାୟି, ଆମ୍ବାଆରି ହାଡାତି ଅର୍ତ ପୁଣ୍ଡିକିନାୟି, ଇଲେକଁ ବାରେତାକି ଏନାୟି ଆଆତଁ ଏନାୟି ମାନେ, ଇ ବାରେ କୁଲମିତି ପାଡିକିହାଲି କିଞ୍ଜିଆଡେ । ୨୭ ଆମ୍ବାଆରି ଏଟ୍‌କା ହାଡାତଲେ ଜଲିନେରି ଇତିହିଁ ରିଆରି ଆଆତଁ ତାନିଜାଣା ପାଲି କିହିଁ ଜଲ୍‌ପେରି ଅଡେ ରଅସି ତାନି ଅର୍ତ ୱେସ୍‌ପାସି । ୨୮ ସାମା ଆମ୍ବାଆସି ଅର୍ତ ତେଲ୍‌ହି କିନାସି ହିଲଅସି ଇତିହିଁ ଏଞ୍ଜାସି କୁଲମିତା ପାଲେଏ ମାଣ୍‌ମେସି, ଇଞ୍ଜା ତାନୁ ତାନି ହିୟାତା ମାହାପୁରୁଁ ୱେସ୍‌ପାସି । ୨୯ ଅଡେ ରିଆରି କି ତାନି ଜାଣା ମାହାପୁରୁ ଅଣ୍ପୁତି ବଲୁ ୱେସ୍‌ପେରି, ଅଡେ ଏଟ୍‌କାତାରି ୱେସିମାନାଣି ନେହିଁ କଁ ୱେଣ୍‌ମ୍ବାରି । ୩୦ ସାମା ଏମ୍ବାଆଁ କୁଗାମାନାରି ବିତ୍ରା ଆମ୍ବାଆରାକି ମାହାପୁରୁତି ଏନି ବଲୁ ୱାଡିସାରେ ନଟ୍‌କେଏ ୱେସିମାନାସି ପାଲେଏ ମାଣ୍‌ମେସି । ୩୧ ଇତିହିଁ ଏନିକଁ ବାରେଜାଣା ଜାପିନେରି, ଇଞ୍ଜା ବାରେଜାଣା ସେଡନା ଆନେରି, ଏଦାଆଁତାକି ରଅ ରଅତେରି ମାହାପୁରୁ ଅଣ୍ପୁତି ବଲୁ ୱେସାଲି ଆଡିଦେରି । ୩୨ ସାମା ମାହାପୁରୁତି ବଲୁ ୱେହ୍‌ନି ବାଡୁନ୍ତୁ ୱେହ୍‌ନାଣି ତାଣାଟି ଲପ୍‌କି ଆନାୟି ମାନେ । ୩୩ ଏଦାଆଁତାକି ଇତିହିଁ

ମାହାପୁରୁ ଗଡ଼ହା କିନି ମାହାପୁରୁ ଆଏ, ସାମା ହିତ୍‌ଡ଼ିତି ମାହାପୁରୁ । ଏନିକି ମାହାପୁରୁ ସୁଦୁ ଲକ୍ଷ୍ମି କୁଲମିତା ଆଡ଼େ ।

୩୪ ଏଲେକି ଇୟାସିକା କୁଲମିତା ପାଲେଏ ମାଣମ୍, ଇତିହି କାତା ଜଲ୍ଲାଲି ଏଡ଼ି ହେଲ ବେଟା ଆହାହିଲାର, ମସା ମୋରାତା ରାସ୍‌କି ଆହାମାନି ଲେହେଁ ଏଡ଼ି ମାନି ତଲେ ମାନାପୁ । ୩୫ ସାମା ଇୟାସିକା ଏନାଆଁ ପୁଞ୍ଜାଲି ଅଣ୍‌ପିତିହି, ତାମି ଇଜ ତାମି ତକ୍ରାୟାଣି ଝେଣ୍‌ମ୍, ଇତିହି କୁଲମିତା କାତା ଜଲ୍ଲିନାୟି ଇୟାନାକି ଲାଜାତି କାତା ।

୩୬ ମାହାପୁରୁତି ବଲୁ ମୀ ତାଣାଟି ହଟାମାନେ କି ? ଇଞ୍ଜା ଝାରଇ ମିଙ୍ଗେତାକି ଝାହାମାନେ କି ? ୩୭ ଆମ୍ବାଆସି ନାନୁ ମାହାପୁରୁ ଅଣ୍‌ପୁତି ବଲୁ ଝେହ୍‌ନାଚେଏଁ, ଇଞ୍ଜା ନେହିଁ ଜୀଝୁତି ଦାନା ବେଟାଆହାମାଲ୍ ଇଞ୍ଜା ଅଣ୍‌ପିନେସି, ଆତିହିଁ ନାନୁ ମିଙ୍ଗ ଏନା ଏନାଆଁ ରାଟିମାଞ୍ଜାଲ୍, ଏଡ଼ି ବାରେ ମାହାପୁରୁତି ହୁକୁମି ଏଦାଆଁ ଏଝାସି ପୁନାପେସି । ୩୮ ସାମା ଆମ୍ବାଆସି ତେଲ୍‌ହଅସି ଆତିହିଁ ଏଝାସି ଏନାଆଁ ତେଲ୍‌ହାଆନା ମାନାପେସି ।

୩୯ ଏଦାଆଁତାକି ତାୟିୟା, ମାହାପୁରୁ ଅଣ୍‌ପୁତି ବଲୁ ଝେକ୍‌ହାଲି ଅଣ୍‌ପେମାଞ୍ଜୁ; ଇଞ୍ଜା ଏଟକାତି ହାଡା ଜଲ୍ଲାଲି କାହିକିଆଦୁ । ୪୦ ସାମା ବାରେ କାମା ନେହିଁ ତଲେ ସୁସ୍ତି ତଲେ କିନାୟିମାନେ ।

୧୫

କ୍ରୀସ୍ତ ହାକିଟି ନିଙ୍ଗିନାୟି

୧ ନା, ତାୟିୟା ଅଡେ ତାଙ୍ଗିସ୍ତାତେରି, ନାନୁ ମୀ ତାଣା ଆମିନି ନେହିଁ କାରୁ ଝେକ୍‌ହାମାଚେଏଁ, ଆମିନି କାରୁ ମୀରୁ ତୀରିତଲେ ଆସାମାଚେରି ଆମିନି ତାଣା ତୀରିତଲେ ମାଞ୍ଜାମାଞ୍ଜେରି, ନାନୁ ଏନିକି ମୀ ତାଣା ଝେକ୍‌ହାମାଚେଏଁ, ଏଦାଆଁ ମିଙ୍ଗେ ଅଣ୍‌ପି କିହିମାଞ୍ଜାଲ୍ । ୨ ମିଙ୍ଗେ ଝେକ୍‌ହା ମାଞ୍ଜାନି ନେହିଁ କାରୁ ମୀରୁ ଜାଣେ ଆସା ମାଟିହିଁ, ଇ ନେହିଁ ବଲୁ ତାକି ମୀରୁ ଗେଲ୍‌ପି ଆହାମାଞ୍ଜେରି, ଆଆତ ମୀରୁ ଉଜେଏ ନାମୁ ଗାଟାତେରି ଆହାମାଚେରି ।

୩ ଇତିହିଁ ନାନୁ ଆମିନି ଜାମ୍‌ନାଣି ବେଟା ଆହାମାଚେଏଁ, ଏ ବିତ୍ରାଟି ଇ କାଜା କାତା ମିଙ୍ଗେ ହାହାମାଞ୍ଜାଚେଏଁ, ଇତିହିଁ କ୍ରୀସ୍ତ ଦାମ୍ ପତିତା ରାସ୍‌କି ଆହାମାନି ଲେହେଁ ମା ପାପୁ ତାକି ହାଡେସି ।

୪ ☆ମୁସ୍‌ସି ଆଡେସି, ଇଞ୍ଜା ଦାମ୍‌ସୁ ପତିତା ରାସ୍‌କି ଆହାମାନି ଲେହେଁ; ତାନିଦିନା ତାୟୁ ହାକିଟି ଖେଣ୍ଡେ ନିଜିଡେସି । ୫ ☆ଏଝାସି କେପା* ଅଡେ ବାରେଜାଣା ସୀସୁୟାଣି ତଞ୍ଜାଆଡେସି । ୬ ତାୟୁ ରଣ୍ଡିଏ ଦେବା ପାସା ଖାଞ୍ଜାଟିଏ ଆଗାଡ଼ା ତାନି ଜେଟ ହାନି ତାୟିୟାୟି ତଞ୍ଜାଆଡେସି; ଏଝାରି ବିତ୍ରାଟି ହାଡ଼େକା ଲକୁ ନୀଞ୍ଜୁପାଡେକା ନୀଡ଼ାମାନେରି, ସାମା ଏଡେକା ଲକୁ ହାହାମାନେରି । ୭ ଏଡେଟିଏ ଏଝାସି ଜାକୁବଇଁ ଇଞ୍ଜା ତାୟୁ ବାରେ ପାଣ୍ଡୁଝି ଆଡ଼ାରାଇଁ ତଞ୍ଜାଆଡେସି ।

୮ ☆ବାରେଡି ତାୟୁ ଲେଞ୍ଜୁ ପୂରାଆଆନା ଜାର୍ନାଆଡ଼ି ଲେହେଁ ତାଡେସି ନାଜେ ଜିକେଏ ତଞ୍ଜା ଆୟାଡେସି । ୯ ☆ଇଡିହିଁ ମାହାପୁରୁତି କୁଲମିତି ଲକୁଇଁ ସାସି ହୀହିମାତାକି ପାଣ୍ଡୁଝି ଆହାମାନାରି ତାଣା ବାରେକିହାଁ ନାନୁ ଉଣାଡେସି, ଇଞ୍ଜା ପାଣ୍ଡୁଝିଆହାମାନି ଦରୁ ବେଟାଆହାଲି ପାଡ଼ା ଆଆଗାଟାଡେସି । ୧୦ ସାମା ନାନୁ ଏନ୍ଦି ଆହାମାଇଁ, ଏଡି ମାହାପୁରୁ କାର୍ମାମେହ୍‌ନି ତାଣାଟି ଆହାମାନେ, ଇଞ୍ଜା ନା ତାକି ତାନି କାର୍ମାମେହ୍‌ନାୟି ଉଜେଏ ଆହା ହିଲେଏ, ସାମା ନାନୁ ଏ ବାରେଜାଣା କିହାଁ ହାଡ଼େକା କାମା କିହାମାଇଁ, ଆଡ଼ିଜିକେଏ ନାନୁ ଆଏ, ସାମା ମାହାପୁରୁତି କାର୍ମାମେହ୍‌ନାୟି ଏଦାଆଁ କିହାମାନେ । ୧୧ ଏଦାଆଁତାକି ନାନୁ ଆପେ କି ଏଝାରି ଆପେରି ଏଲେକିହିଁ ମାମ୍‌ସୁ ଖେସିମାନମି ଅଡେ ମୀରୁ ଜିକେଏ ଏଲେକିହିଁ ନାମାମାଞ୍ଜେରି ।

ମୀର ହାକିଟି ନିଜିନାୟି

୧୨ କ୍ରୀସୁ ହାକିଟି ନିଜାମାନେସି ଇଞ୍ଜାଁ ଇ କାକୁ ଖେସ୍‌ପି ଆହିମାନେ, ଆଡିହିଁ ହାଡ଼ାରି ଖେଣ୍ଡେ ନିଜିନାୟି ହିଲେଏ ଇଞ୍ଜାଁ ଏନ୍ଦିକିଁ ମୀ ବିତ୍ରାଟି ଏଚରଜାଣା ଏଲେ ଇଞ୍ଜାମାନେରି ? ୧୩ ହାଡ଼ାରି ଖେଣ୍ଡେ ନିଜିନାୟି ହିଲେଏ, ଇଡିହିଁ କ୍ରୀସୁ ଜିକେଏ ଖେଣ୍ଡେ ନିଜା ହିଲଅସି । ୧୪ ଇଞ୍ଜା କ୍ରୀସୁ ହାକିଟି ଖେଣ୍ଡେ ନିଜା ହିଲଅସି, ମାମ୍‌ସୁ ଖେକ୍‌ହିମାନାୟି ବାରେ ଉଜେଏତାୟି, ଅଡେ ମୀ ନାମ୍‌ସୁ ଜିକେଏ ଉଜେଏତାୟି । ୧୫ ଅଡେ ମାମ୍‌ସୁ ମାହାପୁରୁତି ମିଡି ଖେହ୍‌ନିଲେହେଁ

☆ ୧୫:୪ ୧୫:୪ ମାଡି ୧୨:୪୦; କାମା ୨:୨୪-୩୨ ☆ ୧୫:୫ ୧୫:୫ ଲୁକ ୨୪:୩୪; ମାଡି ୨୮:୧୬,୧୭; ମାର୍କ ୧୨:୧୪; ଲୁକ ୨୪:୩୬; ଜହ ୨୦:୧୯ * ୧୫:୫ ୧୫:୫ ପିତର
 ☆ ୧୫:୮ ୧୫:୮ କାମା ୯:୩-୭ ☆ ୧୫:୯ ୧୫:୯ କାମା ୮:୩

ତଞ୍ଜାଆନେ, ଏନାଆଁତାକି ଇଚିହଁ ମାମ୍ବୁ ମାହାପୁରୁ କପାଟି ଇ କାତା ସାକି ହାତମିମା କି କ୍ରୀସ୍ତୁଇଁ ନିକହାମାନେସି, ସାମା ହାଡ଼ାରି ନିଙ୍ଗାଅରି, ଆତିହଁ ଏଝାସି କ୍ରୀସ୍ତୁଇଁ ଜିକେଏ ନିକହା ହିଲଅସି । ୧୭ ଏଲେଆହଁ ହାଡ଼ାରି ନିଙ୍ଗାହିଲଅରି, ଆତିହଁ କ୍ରୀସ୍ତୁ ଜିକେଏ ନିଙ୍ଗା ହିଲଅସି । ୧୭ ଇଞ୍ଜା କ୍ରୀସ୍ତୁ ନିଙ୍ଗା ହିଲଅସି ଇଚିହଁ ମୀ ନାମ୍ବୁ ଜିକେଏ ଉଜେଏତାୟି ଆନେ, ଇଞ୍ଜା ମୀରୁ ନୀଏଁ ପାତେକା ମୀ ପାପୁ ତଲେ ମାଞ୍ଜାମାଞ୍ଜେରି । ୧୮ ଆତିହଁ ଆମ୍ବାଆରି କ୍ରୀସ୍ତୁ ତାଣା ନାମାମାଞ୍ଜାନା ହାହାମାନେରି, ଏଝାରି ଜିକେଏ ନାସା ଆହାମାନେରି । ୧୯ ମାର୍ ଝାରଇ ଇ ଜୀଝୁତାକି କ୍ରୀସ୍ତୁଇଁ ଆସା କିହିମାନାୟି, ଆତିହଁ ମାର୍ ବାରେ ମାଣସିୟାଁ କିହାଁ କାର୍ମା ହିଲାଆଗାଟାୟି ।

୨୦ ସାମା ସାତାତଲେ କ୍ରୀସ୍ତୁ ହାଡ଼ି ଲକ୍ଷ୍ମି ମୂଲୁତି ପାଡ଼େୟି ଲେହେଁ ହାଡ଼ାରି ବିତ୍ରାଟି ଝେଣ୍ଡେ ନିଙ୍ଗାମାନେସି । ୨୧ ଇଚିହଁ ମାଣସି ତାଣାଟି ହାନାୟି ଝାହାମାନାକି ଅଡ଼େ ମାଣସି ତାଣାଟିଏ ହାଡ଼ାରି ବିତ୍ରାଟି ଝେଣ୍ଡେ ନିଙ୍ଗାୟି ଜିକେଏ ଝାହାମାନେ । ୨୨ ଇଚିହଁ ଆଦମ ତାଣାଟି ବାରେ ମାଣସିକି ହାକି ଝାଡ଼େ, ଏଲେକିହଁ ଏ କ୍ରୀସ୍ତୁ ତାଣାଟି ବାରେଜାଣା ଜୀଝୁ ବେଟାଆଡ଼େରି । ୨୩ ସାମା ବାରେଜାଣା ତାମି ପାଲି ଏତିସାରେ ତଲିତି ପାଡ଼େୟି କ୍ରୀସ୍ତୁ, ତାୟୁ କ୍ରୀସ୍ତୁତି ଝାନ୍ତିଦିନାତି କାଡ଼ାମାନାରି ଝେଣ୍ଡେ ନିଙ୍ଗାନେରି । ୨୪ ଏଚେଟିଏ ଜୁଗୁ ରାନ୍ତି ଦିନା ଝାଡ଼େ, ଏଚିବେଲାତା କ୍ରୀସ୍ତୁ ବାରେ କାଜାପାଣା, ବାରେ ଅଦିକାରା, ବାଡ଼ୟୁ ମେକ୍‌ହି ତାୟୁ ଆବା ମାହାପୁରୁକି ସାଲୁଝି କିନି ପାଣା ହେରପିନେସି । ୨୫ ମାହାପୁରୁ ବାରେ ସାଡ଼ୁୟାଁଇଁ ହାରଝି କିହାଁ କ୍ରୀସ୍ତୁତି କତାୟାଁ ଡ଼ଇ ଇଟାଆ ପାତେକା ଏଝାସି ସାଲୁଝି କିନାୟିମାନେ । ୨୬ ତାୟୁତି ସାଡ଼ୁ ସମାନା ହାକିତି ଜିକେଏ ମେକ୍‌ନାୟି ମାନେ; ୨୭ ଏନାଆଁତାକି ଇଚିହଁ ଦାମ୍ବୁପତିତା ରାସ୍‌କି ଆହାମାନେ, “ମାହାପୁରୁ ବାରେତି ତାନି କତାଁ ଡ଼ଇ ଲକ୍‌ନେସି,” ଇଞ୍ଜା ଏଚେତା ଏଝାସି ଏଲେଇନେସି, “ବାରେ ଲକ୍‌ହାମାନେସି,” ଏଦି ସାତା କ୍ରୀସ୍ତୁ ବାରେ ତାନ୍ତୁ ଲକ୍‌ହେସି, ଏ ବାରେ ତାଣା ତାନ୍ତୁ ଆଣ୍ଡା ହାଲଅସି । ୨୮ ଅଡ଼େ ବାରେତି କ୍ରୀସ୍ତୁ କତାୟାଁ ଡ଼ଇ ଲକ୍‌ହି ଜେଟ, ଆମ୍ବାଆସି ବାରେତି ତାନି ତାଣା ଲକ୍‌ହେସି, ମୀରୁଏସି ଜିକେଏ ତାନି ଆବା ମାହାପୁରୁ ଡ଼ଇ ଡ଼ୟିନେସି; ଅଡ଼େ ମାହାପୁରୁ ବାରେତି ଲାକ ସାଲୁଝି

କିନେସି ।

^{୨୯} ହାଡ଼ାରି ନିଜାଆସାରେ, ଆମ୍ବାଆରି ହାଡ଼ାରି ତାକି ବାପ୍ତିସ୍ତା[†] ଅନେରି, ଏଞ୍ଜାରି ଏନାଆଁ କିନେରି ? ଆତିହ^{୯୯} ହାଡ଼ାରି ନିଜାଆସାରେ, ଏଞ୍ଜାରି ତାକି ଏନାଆଁତାକି ବାପ୍ତିସ୍ତା ଆନେରି । ^{୩୦} ଅଡ଼େ ମାର ଜିକେଏ ଏନାଆଁତାକି ବାରେବେଲା ଡ଼ଣ୍ଡ ତଲେ ନାସା ଆନି ତାଣା ହାନାୟି ? ^{୩୧} ତାୟିୟାଁ ଅଡ଼େ ତାଜିସ୍ତାତେରି, ମା ପ୍ରବୁ କ୍ରୀସ୍ତ ତାଣା ମିଜେତାକି ନାନୁ ଆମିନି ବଡ଼ପଣ ଆହିମାୟି, ଏମ୍ବାତି ମାନି କିହାଁ ଏଲେ ଇଞ୍ଜିମାୟି, ନାନୁ ବାରେଦିନା ହାନିଲେହେତି କସ୍ତ ବେଟାଆହିମାୟି । ^{୩୨} ଇତିହ^{୯୯} ମାଣସିକ ଅଣପିନି ଲେହେଁ ଏପିସିୟ ଗାଡ଼ାତା ନାନୁ ଖାରଇ “ଜାଡ଼ା ଜନ୍ତୟାଁ” ତଲେ ଜୁଜୁ କିହାମାୟି, ଆତିହ^{୯୯} ଏମ୍ବାଆଁ ନାଜେ “ଏନି ଲାବା ?” ସାମା ହାଡ଼ାରି ନିଜାଅରି, “ଆତିହ^{୯୯} ଖାଦୁ ମାର ତିନ ଉନ ଇତିହ^{୯୯} ଝିଏ ମାର ହାନାୟି ।”

^{୩୩} ମୀରୁ ନାଡ଼ି ଆଆଦୁ, “ଇତିହ^{୯୯} ପଲୁଆ ଗାଟାରି ତଡ଼ ଚୁନହ^{୯୯} ଲକ୍ଷୁତି ଗୁଣ୍ଡୁ ନସ୍ତ କିନେ ।” ^{୩୪} ମୀରୁ ନେହ^{୯୯} କ^{୯୯} ଜାଗ୍ରାତା ଆଦୁ, ପାପୁ କିଆଦୁ, ଇତିହ^{୯୯} ଆମ୍ବା ଆମ୍ବାଆରାକି ମାହାପୁରୁଇଁ ପୁନି ବୁଦି ହିଲେଏ; ନାନୁ ମୀ ଲାଜା ତାକି ଇ କାତା ଝେସିମାଞ୍ଜାଇ ।

ହାକିଟି ଝେଣ୍ଡେ ନିଜାନ୍ତି ଆଜା

^{୩୫} ସାମା ଆମ୍ବାଆରି ଏଲେଇନେରି, “ହାଡ଼ାରି ଏନିକ^{୯୯} ନିଜାନ୍ତିନେରି ? ଏନିଲେହେତି ଆଜା ତଲେ ଏଞ୍ଜାରି ଝାନେରି ?” ^{୩୬} ବୁଦି ହିଲାଆ ଗାଟାତେରି, ମୀରୁ ଏନାଆଁ ମାଟିମାଞ୍ଜେରି ଏଡ଼ି ହାଆସାରେ ଝେଣ୍ଡେ ଜୀଝୁଆହାଁ ଗଜା ଆଏ । ^{୩୭} ଅଡ଼େ ଏମିନି ଆଜା ଆନେ ଏଦାଆଁ ମୀରୁ ମାଟିହିଲଅତେରି, ସାମା ଗହଁୟାଁ ଆପୁ କି ଏନି ଆନାଁ ଆପେ, ଏଡ଼ି ପାଡ଼େୟି ଲେହେଁ । ^{୩୮} ସାମା ମାହାପୁରୁ ତାନି ଅଣ୍ଡୁ ଲେହେଁ ଏଞ୍ଜାରାକି ଆଜା ହାନେସି, ଅଡ଼େ ବାରେ ପାଡ଼େୟି ତାକି ତାନି ଆଜା ହାନେସି ।

^{୩୯} ବାରେ ଆଜା ରଣ୍ଡିଏ ରଲେଏତି ଆଜା ଆଏ, ସାମା ମାଣସିୟାକି ରଲେତି ଆଜା, ଜନ୍ତୟାକି ରଲେତି ଆଜା, ଅଡ଼େ ପଟାୟାକି ଅର ରଲେତି ଆଜା, ଅଡ଼େ ମୀଣ୍ଡାକି ତାକି ଅର ରଲେତି ଆଜା ।

† ୧୫:୨୯ ୧୫:୨୯ମୁଞ୍ଜିନାୟି

୪୦ ଲାକପୁରୁକି ଆଜ୍ଞା ମାନେ, ଅଡ଼େ ଦାରତିକି ଆଜ୍ଞା ଜିକେଏ ମାନେ, ଲାକପୁରୁତି ଆଜ୍ଞା ରଲେତି ଅଜ୍ଞୁ, ଅଡ଼େ ଦାରତିତି ଆଜ୍ଞାତି ଅଜ୍ଞୁ ଅର ରଲେତାୟି । ୪୧ ଝେଡ଼ାତି ଉଜେଡ଼ି ରଲେତାୟି, ଅଡ଼େ ଲେଞ୍ଜୁତି ଉଜେଡ଼ି ଅର ରଲେତାୟି, ଅଡ଼େ ହୁକାୟିତି ଉଜେଡ଼ି ରଲେତାୟି, ଇଞ୍ଜା ର ହୁକା ଟିଏ ଅର ହୁକାତି ଉଜେଡ଼ି ଅର ରଲେତାୟି ।

୪୨ ହାଡ଼ାରି ନିଜିନାୟି ଜିକେଏ ଏଲେତାୟିଏ, ନାସା ଆନିଲେହେଁ ମାଟ୍ଟକି ଆନେ, ସାମା ନାସା ଆଆଗାଗାୟି ଲେହେଁ ନିଜିନେ; ୪୩ ଲଡ଼ାହିଲାଆ ଗାଗାୟି ଲେହେଁ ମାଟ୍ଟକି ଆନେ ଏଡ଼ି ଗାଞ୍ଜୁରମି ତଲେ ନିଜିନେ; ବାଡ଼ୁଲୁ ହିଲାଆଗାଗାୟି ଲେହେଁ ମାଟ୍ଟକି ଆନେ, ବାଡ଼ୁଲୁ ଗାଗାୟି ଆହାଁ ନିଜିନେ । ୪୪ ଇରଥାତି ଆଜ୍ଞା ତଲେ ମୁସ୍ପିଆନେ ଜୀଞ୍ଜୁତି ଆଜ୍ଞା ତଲେ ନିଜିନେ; ସାମା ଇରଥାତି ଆଜ୍ଞା ମାନେ ଇତିହଁ ଜୀଞ୍ଜୁତି ଆଜ୍ଞା ଜିକେଏ ମାନେ । ୪୫ ଦାମ୍ପୁପତିତା ରାସ୍ପକି ଆହାମାନେ, ତଲିତି ମାଣସି ଆଦମ ଜୀଞ୍ଜୁତି ମାଣସି କିହଁ ଗାଡ଼ି ଆଡେସି; ସାମା ତାୟୁତି ଆଦମ ପୁଣ୍ଡା ହାନି ଜୀଞ୍ଜୁ ଆଡେସି । ୪୬ ସାମା ଜୀଞ୍ଜୁ ଗାଗାସି ନକେଏ ଆଏ, ଆଜ୍ଞା ତଲେତାସି ନକେଏ, ଅଡ଼େ ତାୟୁ ଜୀଞ୍ଜୁ ଗାଗାସି ଆଡେସି । ୪୭ ନକେଏତି ମାଣସି ଆଦମ ଦାରତିତି ମାନି ଇରଥା ତଲେ ଗାଡ଼ି ଆହାମାଡେସି, ଅଡ଼େ ତାୟୁତି ମାଣସି ଲାକପୁରୁଟି ଝାହାମାଡେସି । ୪୮ ଆମ୍ବାଆରି ଇରଥା ତଲେ ଗାଡ଼ି ଆହାମାନେରି, ଏଞ୍ଜାରି ଇରଥାଟି ଗାଡ଼ି ଆଡ଼ି ଏ ମାଣସିଲେହେଁ, ଇଞ୍ଜା ଆମ୍ବାଆରି ଲାକପୁରୁତାରି ଏଞ୍ଜାରି ଲାକପୁରୁଟି ଝାହାମାନି ଏ ମାଣସି ଲେହେଁତାରି । ୪୯ ଅଡ଼େ ମାର ଇରଥାଟି ଗାଡ଼ି ଆହାମାନି ଏ ମାଣସିତି ଝାଣା ଆସାମାନାୟି, ଏଲେକିହଁ ଏଏ ଲାକପୁରୁତି ମାଣସିତି ଝାଣା ଜିକେଏ ଆହନାୟି ।

୫୦ ତାୟିୟାଁ ଅଡ଼େ ତାଜିମ୍ବାଡେରି ନାନୁ ଝେସିମାଞ୍ଜାଇଁ, ନେତେରି ଅଡ଼େ ଉଜ୍ଞା ମାହାପୁରୁତି ରାଜିତି ଅଦିକାରା କିହାଲି ଆଡେଏ, ସାମା ହାନାୟି ହାଆଗାଗାଣି ଅଦିକାରା କିହାଲି ଆଡେଏ ।

୫୧ ☆ମେହଦୁ ନାନୁ ମିଜେ ର ଡ଼ଗୁମାନି କାତା ଝେସିମାଞ୍ଜାଇଁ, ମାର ବାରେ ଜାଣାତାୟି ହାଆୟି, ସାମା ମାର ବାଦଲଞ୍ଜି ଆନାୟି,

୫୭ ଦେବୁଣିଏ, କାନୁ ମିଟି କିନିଲେହେଁ, ତାୟୁତି ତୀତ୍ରି ମହୁରି କାଜା ହାଡ଼ା ଖେଟିସାରେ ମାର ବାରେତାୟି ଅର ଖାଣା ଆନାୟି; ଇତିହିଁ କମ୍ବୁ ତୀନେ ଅଡ଼େ ହାଡ଼ାରି ନାସା ଆଆନା ନିଜିନେରି, ଅଡ଼େ ମାର ବାଦଲଖି ଆନାୟି । ୫୩ ଇତିହିଁ ଇ ମେଣ୍ଟିନି ଆଜାତି ମେଣ୍ଟିଆଗାଟି ହିମ୍ବୁରି ପରନାୟି ମାନେ, ଅଡ଼େ ଇ ହାନି ଆଜାତି ହାଆଗାଟି ହିମ୍ବୁରି ପରନାୟି ମାନେ । ୫୪ ସାମା ଇ ମେଣ୍ଟିନି ଆଜାତି ମେଣ୍ଟିଆଗାଟି ହିମ୍ବୁରି ଅଡ଼େ ହାନି ଆଜାତି ହାଆଗାଟି ହିମ୍ବୁରି ହୁଟିତି ଜେତ, ଇ ରାଡ଼ାମାନି ବଲୁ ସାତା ଆନେ; “ହାକି ନାସା ଆହାମାନେ; ଜୀଣା ଆନାୟି ଆହାମାନେ ।”

୫୫ “ଏ ହାକି ନୀ ଜୀଣା ଆନାୟି ଆମ୍ବିୟା ?

ଏ ହାକି ନୀ ନାସାକିନି ବାଡ଼ୟୁ ଆମ୍ବିୟା ?”

୫୬ ହାକିତି ସାତୁ ପାପୁ, ଅଡ଼େ ପାପୁତି ବାଡ଼ୟୁ ମସାତି ମେରା; ୫୭ ସାମା ଏମିନି ମାହାପୁରୁ ମା ପ୍ରବୁ ଜୀସୁ କ୍ରୀସ୍ତତି ତାକି ମାଜେ ଜୀଣି କିୟାନେସି ଏଝାଣାକି ଜହରା ଆପେ ।

୫୮ ଏଦାଆଁତାକି ଏ ନା ଜୀସୁତି ତାୟିୟାଁ ଅଡ଼େ ତାଜିସ୍ମାତେରି, ପ୍ରବୁତି ସେବାତା ମୀ କସ୍ତତଲେ କାମା କିନାୟି ଉଜେଏ ଆଏ, ଇଦାଆଁ ପୁଞ୍ଜାନା ପ୍ରବୁତି କାମାତା ତୀରିଆହାଁ ବାଡ଼ୟୁ ତଲେ ସେବାତା ହାରେ ହାରେକା ଜାଡ଼ନ୍ଦୁ ଆଦୁ ।

୧୭

ମାହାପୁରୁତି ଲକୁତାକି ଦାନା

୧ *ମାହାପୁରୁ ଲକୁ ତାକି ତାରୁୟାଁ କୃଡ଼ିକିନି କାତା ନାନୁ ଏନିକିଁ ଗାଲାତିୟା କ୍ରୀସ୍ତାନା କୁଲମିତା ଖେସାମାଚେଏଁ, ମୀରୁ ଜିକେଏ ଏଲେକିଁ କିଦୁ । ୨ ମୀରୁ ବେଟାଆହିମାନି ଲେହେଁ ବାରେ ଖାଡ଼ାତି ମୂଲୁ ଦିନା ମୀରୁ ବାରେତେରି ମୀ ଆଡ଼ିନି ଲେହେଁ ମୀ ବିତ୍ତା ଏଚେକା ତାରୁୟାଁ କୃଡ଼ିକିହାଁ ଇଟାଦୁ, ଆତିହିଁ ନାନୁ ଖାଡ଼ିସାରେ ମିଜେ ଅଡ଼େ ତାରୁୟାଁ ରୀସାଲି ଲଡ଼ା ଆଏ । ୩ ଅଡ଼େ ନାନୁ ଖାଡ଼ିଜେତ, ମୀରୁ ଆମ୍ବାଆରାଇଁ ଜଗେ ଇଞ୍ଜିଁ ଆଡ଼ାମାଞ୍ଜେରି ନାନୁ ଏଝାରାକି ଆକୁ

☆ ୧୭:୧ ୧୭:୧ ରମି ୧୫:୨୫,୨୬

ରାଚାହାଁ ଜିରୁସାଲମତା ମୀ ଦାନା ଅହାଲି ପାଣ୍ଡିଲ୍; ୪ ସାମା ନାଙ୍ଗେ ଜିକେଏ ହାଜାଲି ଲତାଆନେ ଇଚିହିଁ ଏଞ୍ଜାରି ନା ତଲେ ଖାପେରି ।

କାମାତାକି ପାଞ୍ଜୁଲତି ଅଶପୁ

୫ ☆ସାମା ନାନୁ ମାକିଦନିୟା ହାଚି ତାୟୁ ମୀ ତାଣା ଖାଲ୍, ଏଦାଆଁତାକି ଇଚିହିଁ ନାଙ୍ଗେ ମାକିଦନିୟାଚି ହାନାୟି ମାନେ । ୬ ଆଆତ ନାନୁ ଖାଡ଼ିସାରେ ଏଚରଦିନା ମୀ ତାଣା ଡ଼ୟିଲ୍, ଇଚିହିଁ ପେନିବେଲା ହାଲ୍‌ଖେ ମାଞ୍ଜାଲି ଅଶପିମାଲ୍, ଏଚେତା ନାନୁ ଆମିନି ଚାୟୁତା ହାଲ୍, ଏମ୍‌ଆଁ ହାନାଚି ମୀରୁ ନାଙ୍ଗେ ଇଚିଞ୍ଜାୟାଦେରି । ୭ ଇଚିହିଁ ନୀଏଁ ନାନୁ ହାନାଚି ମୀ ତାଣା ଗାଡ଼େକା ତାକି ତଞ୍ଜାଆହାଲି ଅଶପି ହିଲଅଁ, ଇଚିହିଁ ପ୍ରବୁ ନାଙ୍ଗେ ହେଲ୍ ହିୟାତିହିଁ, ନାନୁ ମୀ ତଲେ ଏଚରଦିନା ମାଞ୍ଜାଲି ଆସା କିହିମାଲ୍ ।

୮ ☆ସାମା ନାନୁ ପେଡ଼ିକସ୍ତ ଦିନା ପାତେକା ଏପିସିୟ ଗାଡ଼ାତା ଡ଼ୟିଲ୍; ୯ ଇଚିହିଁ ପ୍ରବୁତି କାମା କିହାଲି ଅସାରା ଦାରା ଦେପିଆହାମାନେ, ଆଆତ ଜିକେଏ ନାଙ୍ଗେ ଅପାଆଗାଚାରି ହାଡ଼େକା ମାନେରି ।

୧୦ ☆ତିମତି ମୀ ତାଣା ଖାଡ଼ିସାରେ ଏଞ୍ଜାସି ଏନିକଁ ଆଜାଆନା ମୀ ତାଣା ଡ଼ୟିନେସି, ଏଦାଆଁତାକି ମୀରୁ ଅଶପାଦୁ, ଇଚିହିଁ ନାନୁ ଏନିକଁ ଏଞ୍ଜାସି ଜିକେଏ ଏଲେକିହିଁ ଏ ପ୍ରବୁତି କାମାକିନାସି ।

୧୧ ଏଦାଆଁତାକି ଆମ୍ବାଆତେରି ଏଞ୍ଜାଣାଲ୍ ହୀଣି କିଆଦୁ, ସାମା ଏଞ୍ଜାସି ଏନିକଁ ନା ତାଣା ଖାହାଲି ଆଡ଼ିମାନେସି, ଏଦାଆଁତାକି ଏଞ୍ଜାଣାଲ୍ ହିଡ଼ଡ଼ି ଜୀଞ୍ଜୁତଲେ ଜିରୁ ତସା ପାଶ୍ଟାଦୁ; ଏଦାଆଁତାକି ଇଚିହିଁ ଏଞ୍ଜାସି ତାୟିୟାଁ ତଲେ ଖାଡ଼େସି ଇଞ୍ଜଁ ନାନୁ କାଡ଼ିମାଲ୍ ।

୧୨ ସାମା ତାୟି ଆପଲ ତାକି ଖେସିମାଞ୍ଜାଲ୍, ନାନୁ ଏଟକାତି ତାୟିୟାଁ ତଲେ ମୀ ତାଣା ହାଜାଲି ଏଚେକା ବାଡ଼ିମାଲିତେଏଁ, ସାମା ନୀଏଁ ଖାହାଲି ମନ କିଆତେସି, ସାମା ପାରୁ ସିନିକିହାନା ଏଞ୍ଜାସି ଖାଡ଼େସି ।

ଆକୁତି ରାନ୍ତି କାତା

☆ ୧୭:୫ ୧୭:୫ କାମା ୧୯:୨୧ ☆ ୧୭:୮ ୧୭:୮ କାମା ୧୯:୮-୧୦ ☆ ୧୭:୧୦ ୧୭:୧୦
କେର ୪:୧୭

୧୩ ମୀରୁ ଜାଗ୍ରତା ଆହାଁ ନାମୁତା ତୀରିତଲେ ମାଞ୍ଜୁ, ଅଡ଼େ ସାସା ଗାଟାତେରି ଆହାନା ବାଡ଼ୁୟୁ ଆହଦୁ । ୧୪ ମୀ ବାରେ କାମା ଜୀଞ୍ଜୁ ନନାଣି ତଲେ ଆପେ ।

୧୫ ☆ଏ ତାୟିୟାଁ ଅଡ଼େ ତାଙ୍ଗିସ୍ତାତେରି ସ୍ତ୍ରୀପାନ ଇଲୁ କୁଟମି ଆକାୟାତି ମୂଲୁଏ ନାମିତାରି; ଅଡ଼େ ମାହାପୁରୁ ଲକୁଣି ସେବା କିନି କାମାତାକି ହେରପା କତାମାନେରି ଏଦାଆଁ ମୀରୁ ପୁଞ୍ଜାମାଞ୍ଜେରି । ୧୬ ମୀରୁ ଏଲେତି ଲକୁତି ଅଡ଼େ ତାମିତଲେ ଆଶ୍ଵାନା ଖାହୁତଲେ କାମା କିହିମାନାରାଇଁ ମାନି କିଦୁ, ଏଦାଆଁତାକି ନାନୁ ମିଙ୍ଗ ବାତିମାଲିମାଞ୍ଜାଇଁ ।

୧୭ ସ୍ତ୍ରୀପାନ, ପର୍ତୁନାତ, ଅଡ଼େ ଆକାୟିକ ଖାତାକି ନାନୁ ହାରେକା ରାହାଁ ଆହିମାଇଁ, ଇତିହୁଁ ମୀରୁ ହିଲାଆତାକି ନାଙ୍ଗେ ଏନାୟି ଲଡ଼ା ମାରେ, ଏଞ୍ଜାରି ଏଦାଆଁ ହାହାମାଞ୍ଜାନେରି । ୧୮ ଇତିହୁଁ ଏଞ୍ଜାରି ମୀ ଜୀଞ୍ଜୁତି ଅଡ଼େ ନା ଜୀଞ୍ଜୁତି ରାହାଁ କିହାଁ ମାଞ୍ଜାନେରି; ଏଲେତି ଲକୁଇଁ ଜଟେ ଇଞ୍ଜୁଁ ପୁଞ୍ଜାନା ମାନି କିଦୁ ।

୧୯ ☆ଆସିୟା ଦେସାତା ମାନି କୁଲମିକା ମିଙ୍ଗେ ଜହରା କିହିମାଞ୍ଜାନେରି, ଆକ୍ଞିଲା ଅଡ଼େ ପ୍ରିସ୍ଵିଲା ତାମି ଇଜ ରୁଣ୍ଡା ଆନି କୁଲମି ତଲେ ପ୍ରବୁ ତାଣା ମିଙ୍ଗେ ହାରେକା ଜହରା କିହିମାଞ୍ଜାନେରି । ୨୦ ଇମ୍ପାଆଁ ମାନି ବାରେ ତାୟିୟାଁ ଅଡ଼େ ତାଙ୍ଗିସ୍ତା ମିଙ୍ଗେ ଜହରା କିହିମାଞ୍ଜାନେରି । ମୀରୁ ରଅତେରି ରଅଣାଇଁ ତାୟି ତାୟିୟାଁ ଲେହେଁ କ୍ରୀସ୍ତିତି ଜୀଞ୍ଜୁନହୁଁ ସୁଦୁ ତଲେ ନଶୁଞ୍ଜି ଆହାନା ଜହରା କିଞ୍ଜିଆଦୁ ।

୨୧ ନାନୁ ପାଞ୍ଜୁଲତେଏଁ ନା କେୟୁଟି ରାଟାହାଁ ରାହାଁ ତଲେ ଜହରା କିହିମାଞ୍ଜାଇଁ ।

୨୨ ଆମ୍ପାଆସି ମାହାପୁରୁଇଁ ଜୀଞ୍ଜୁ ନଅସି ଏଞ୍ଜାସି ବାକା ବେଟାଆପେସି ! ମାରାନାତା ମା ପ୍ରବୁ ତବେ ଖାମୁ !

୨୩ ପ୍ରବୁ ଜୀଞ୍ଜୁତି କାର୍ମାମେହନାୟି ମିଙ୍ଗେତାକି ଆୟାପେ; ୨୪ କ୍ରୀସ୍ତ ଜୀସୁ ତାଣାଟି ନା ଜୀଞ୍ଜୁନନାୟି ମୀ ବାରେଜାଣା ତାକି ଆୟାପେ । ଆମେନ ।

ପୁସ୍ତକ ଫେରା

The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଭି (Kuvi)

Contributor: The Word for the World International

ପୁସ୍ତକ ଫେରା, କୁଭି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33